

Paul le Cacheux. 1908. *Actes de la Chancellerie d'Henri VI concernant la Normandie sous la domination anglaise (1422-1435), extrait des registres du Trésor des chartes aux Archives nationales*. Tome 2. Rouen : L'Estringant. Océrisation vérifiée par Cécile Maillard.

CLX. — Paris, 22 janvier 1437 (n. s.).

Rémission à Philippot Elart, mercier de Sées, qui a vendu de sa marchandise aux Français qui occupaient cette ville et leur a dénoncé deux de ses voisins, coupables d'avoir enseigné aux Anglais la cachette où il avait mis son argent. (JJ 173, p. 587, fol. 291 verso.)

Henry, etc., Savoir faisons, etc., nous avoir receu l'umble supplication des parens et amis charnelz de Philippot Elart, mercier, povre homme chargé de femme et d'enfans, demourant en la ville de Sees en Normandie, contenant que, sept ans a ou environ, la femme d'un nommé Guillot le Chastellier se tira devers ledit Philippot Elart et lui demanda s'il avoit point de haubergon a vendre. Lequel lui dist que oyl. Et lors ladicte femme dudit Guillot lui dist qu'elle l'acheteroit volentiers pour son mary. Lequel haubergon il lui vendi la somme de dix frans ; et savoit bien qu'il estoit renommée au pays que ledit Guillot estoit brigant, mais par povreté alors il ne chaloit a beaucoup de povres gens du pays a qui ilz vendissent leurs denrées, mais qu'ilz eussent de quoy vivre. Aussi pareillement en ce mesmes temps se tira devers icellui Philippot un prestre nommé Jehan Lourmel, curé de Claray les Sees, qui lui demanda s'il avoit nuls haubergons, et qu'il en avoit a fere pour deux personnes qui lui nomma, c'est assavoir pour Roger de la Fontaine et Jehan du Val, que l'en disoit oudit pays estre brigans armignaz. Lequel Philippot, qui bien avoit oy dire par ladicte commune renommée qu'ilz estoient brigans armignaz, dist audit prestre qu'il en avoit deux, lesquelz il lui bailla, et les emporta et iceulz detint environ huit jours, et depuis les raporta audit Philippot, et ne les eurent mie lesdis brigans armignaz. Avec ce advint que, six ans a ou environ, vindrent nouvelles aux demourans oudit lieu de Sees que les Armignaz y venoient et qu'ilz estoient ja bien près. Laquelle chose venue a la congnoissance dudit Philippot, soy cuidant sauver d'eulx, s'en fouy aux bois qui sont près d'ilec. Mais si tost qu'il y fut, lesdis Armignaz furent entour ladicte ville de Sees, dont les aucuns d'iceulx se espendirent en villages et es bois ylece entour, et mesmement où estoit ledit Philippot, lequel ilz y trouverent, et de fait le prindrent prisonnier et menerent a Saint Gervais, en la cité dudit lieu de Sees, où iceulx Armignaz estoient desja, et ylece le tindrent certaine grant espace de temps, et le mistrent a raençon. Et depuis sa raençon païée, leur vendi de sa marchandise de mercerie, comme esperons, chausses, aiguillettes et autres merceries, en continuant autant de temps qui furent en ladicte ville, qui dura l'espace de huit sepmaines ou environ ; ce qu'il ne pouvoit autrement faire, car il y estoit demourant, comme les autres de ladicte ville pour sauver son corps et le demourant de ses biens. Et depuis qu'ilz s'en furent partiz et retournez en leur obeissance, icellui Philippot Elart a tousjours depuis esté et demouré jusques xv jours a qu'il s'est absenté du pays et soy destourné en nostre obeissance : Pendant lequel temps souvint audit Philippot que deux ans paravant sadicte prise il avoit enfoui en son jardin en comptant la greigneur partie de sa chevance, laquelle lui virent enterrer un nommé Jehan Richart et sa femme ; par le moien d'une leur fille qu'ilz ont demourant en concubinage avec aucuns Anglois, enseignerent a iceulx Anglois ou a autres ladicte finance, qui par nuit la vindrent deterrer, et ladicte fille desdiz Jehan Richart et sa femme a ce faire presente avec eulx, et icelle emporterent, dont ilz firent et ont fait leur volenté, sans en avoir fait restitution audit Philippot ne voulu faire. Et pour ce, icellui Philippot, lui estant demourant pour lors avec lesdis Armignaz, leur donna a entendre ledit cas et fist tant que par eulx lesdiz Richart et sa femme furent envoieez querir et menez audit Saint-Gervais, où ilz furent prisonniers l'espace de huit jours ou environ, sans y estre durement traictiez ; au bout desquelz huit jours ledit Philippot se consenti qu'ilz feussent delivrés. Lesquelz ledit Philippot ne deust point avoir poursuis par devant icéulx Armignaz ne en leur juridicion, mais par devant les gens et juridicion de feu nostre tres chier seigneur et ayeul le Roy Charles ou de feu nostre tres chier seigneur et pere le Roy d'Angleterre derrenierement trespassez, cui Dieu pardoint. Pour occasion et doubte desquelz cas, ledit Philippot, doubtant rigueur de justice, s'est puis xv jours ença absenté du pays. . . Eu regart au temps qui pour lors estoit, le dangier où estoient les demourans en la duchie de Normandie, et mesmement ceulx dudit pais de Sees, la famine et autres povretez qu'ilz souffroient en pluseurs manieres, et que c'estoit environ le temps ou pou après la derreniere descente et venue des Anglois oudit pays... Si donnons en mandement par ces presentes aux bailliz de Caen et d'Alençon... Donné à Paris, le xxije jour de janvier, l'an de grâce mil quatre cens et vint six et de nostre règne le quint. Ainsi signé : Par le Roy, a la relacion du Conseil. Oger.

CLXI. — Paris, 25 janvier 1427 (n. s.).

Rémission à Jean de Bienfaite, chevalier, de la garnison du château de Courtonne, pour avoir frappé mortellement de son épée, dans le bois de Glos, un certain Guillemin Morel, avec lequel il s'était pris de

querelle, en revenant de l'hôtel d'Henri de Querville, écuyer, où l'on tenait taverne. (JJ 173, p. 586, fol. 290 verso.)

Henri, etc., Savoir faisons, etc., nous avoir oye l'umble supplication de Jehan de Bienfaicte, chevalier, seigneur de Bienfaicte, aagé de xl ans ou environ, chargé de femme et enfans, contenant come, le xxiiij^e jour du mois de juing derrenierement passé, ledit suppliant se feust parti du chastel de Courtonne, où il s'est retrait puis aucun temps ença pour le fait des guerres, et monté sur son cheval pour soy aler esbatre et chacier aux champs, comme chevaliers et escuiers du pays ont acoustumé de fere, et feust venu en l'ostel de Henry de Quierville, escuier, où l'on faisoit taverne. Ouquel il trouva un nomé Guillemain Morel et pluseurs autres, qui desjeunnoient ; avec lesquelz il se desjeunna et s'assit au bout de la table, dont ledit Morel et autres de la compaignie furent bien contens et vouldrent que leur escot ne feust que un. Et après ce, ledit de Quierville, seigneur dudit hostel, appella ledit suppliant pour disner avec lui, et disnerent ensemble ; et après ce qu'ilz eurent disné, ledit Morel vint en la chambre où ilz estoient, et le fist on boire. Et après ce, yssirent tous ensemble de ladicte chambre et alerent en la court dudit hostel et veoir deux compaignons qui luctoient ensemble près d'icellui hostel ; et ce fait, s'en revindrent en ladicte court et monterent tous trois a cheval pour eulx en aler ensemble audit lieu de Courtonne où ilz demouroient. Et quant ilz furent au dessus de l'ostel dudit de Quierville en une montaigne, commencerent a parler de faire courir leurs chevaulx, pour savoir lequel d'eulx seroit le plus tost au presbitere du Mesnil Guillaume ; et commencerent a courir ; et en courant ledit de Quierville print son chemin a soy en aler a l'ostel d'un nommé Laurronneur, et en chevauchant cheut, lui et sondit cheval tout ensemble, se bleça en l'espaule et s'en retourna en sondit hostel, sans ce que lesdis suppliant ne Morel en sceussent riens. Et en courant leursdis chevaulx, iceulx suppliant et Morel prindrent un chemin a eulx en venir parmi le bois de Glos tout droit audit Mesnil Guillaume. Et quant ilz furent oudit bois, ledit suppliant dist audit Morel qu'il s'en vensist et qu'il l'avoit gangnié. Lequel Morel lui dist qu'il n'en estoit riens et qu'il n'estoit que un busart, lui et tous ceulx dudit chastel de Courtonne, et avec ce n'estoient que villains ; et ces paroles recita par pluseurs fois. Pour quoy ledit suppliant, qui cuidoit qu'il ne se feist que esbatre, en descendant de dessus son cheval, lui demanda se c'estoit a bon escient. Lequel Morel lui respondi que oyl, et chevaucha outre et le cuida prendre par le col, et en passant ledit suppliant lui donna du plat de son espée par le dos. Et ce fait, ledit Morel passa tout outre et s'en ala ledit chemin bien avant ou bois, ouquel il trouva le couppel d'un arbre et en fist un gros baston, et descendi de dessus son cheval pour le rompre, et le rompit a grant peine ; et en le rompant ledit suppliant le oy rompre, et comança a regarder où c'estoit, et tantost vit venir ledit Morel droit a lui atout ledit baston et meu de grant courage. Pour laquelle cause icellui suppliant descendi de dessus sondit cheval, où il estoit remonté, tira sadicte espée et vint à l'encontre dudit Morel, qui le venoit frapper de sondit baston. Et ainsi come icellui Morel le cuidoit frapper de sondit baston, fist destourner ledit baston d'une de ses mains, et de l'autre main où il tenoit son espée frappa sur la teste dudit Morel, tant qu'il cheut et son baston aussi. Et incontinant ledit suppliant, courroucié dudit cop, laissa cheoir sadicte espée et recloy audit Morel la playe qu'il lui avoit faite et le vult mener a ung village, qui estoit près d'ilec, pour le fere appareillier, mais il ne se vult oncques partir de la place. Et après ce, ledit suppliant courut après son cheval, qui s'en fuioit envers l'ostel appartenant a un nommé Roquete, et le mist en garde cheux ledit Roquete. Et ce fait, s'en ala en un hamel ylece près, nommé le Boscage, en l'ostel d'un appelé Cousin, et ylece demanda des œufs, des estoupes et unes forces. Mais il ne pot finer d'estoupes, et ot tant seulement deux œufs et unes forces, qu'il apporta où ledit Morel estoit et les mist emprès lui. Et après s'en ala en l'ostel d'un barbier demourant a Preteville, mais il ne le trouva pas, pour ce qu'il estoit alé appareillier ledit Henry de Quierville, qui s'estoit blecié en l'espaule, comme dit est, en ladicte course. Et pour ce envoya ledit suppliant le varlet dudit barbier par devers son maistre lui dire qu'il vensist parler a lui, tantost qu'il auroit fait, en l'ostel d'un appelé de la Croix, où il le actendi. Et tantost que icellui barbier fut venu, le mena où ledit Morel estoit, et le trouverent dormant, et pour ce le firent lever, et lui mist ledit barbier un emplastre en sa teste, et le vult icellui suppliant fere monter dessus son cheval ou sur le cheval dudit barbier, mais pour puissance qu'ilz eussent il n'en vult riens fere et s'en ala tout a pié jusques dehors ledit bois. Et eulx estans hors icellui bois, comança icellui suppliant a compter audit barbier comment le cas d'entre lui et ledit Morel estoit advenu. Et en ce disant icellui Morel le desmenti par pluseurs fois en la presence d'icellui barbier, dont ledit suppliant fut tres desplaisant ; et tempté de l'ennemi, recordant aussi qu'il avoit prins grant peine de le fere appareillier et avoit esté aggresseur au commencement et estoit homme de petit estat, c'est assavoir bouchier, eu regart a la personne dudit suppliant, qui est bien noble homme et de bonne lignée et generacion, tira sadicte espée et en donna a icellui Morel pluseurs cops orbes sur le dos et braz, et tant qu'il cheut en un buisson. Et trois jours après ou environ ledit cas advenu, ainsi come ledit barbier le appareilloit, trouva un espine entre le test et la taye, laquelle espine on ne scet bonnement au vray comment elle se bouta oudit test, sinon que icellui Morel la se y mist ainsi come il aloit parmi lesdis bois et buissons. Depuis lequel cas ainsi advenu, icellui Guillemain Morel a fait pluseurs excès, s'est petitement gouverné, alé et venu aval la ville, au moustier et en ses jardins, et telement que tant par sondit petit et mauvais gouvernement come autrement, xiiij jours ou environ après ladicte bateure, il est a l'occasion d'icelle, alé de vie a trespassement. Pour laquelle cause icellui suppliant, doubtant rigueur de

justice, s'est absenté dudit chastel de Courtonne et du pays... [En punition du cas, ledit chevalier paiera au vicomte d'Orbec une amende de 200 livres tournois, 100 livres le 25 février prochain et les 100 autres livres un an après]. Si donnons en mandement par ces mesmes presentes aux bailli de Rouen et viconte d'Orbec... Donné a Paris, le xxv^e jour du mois de janvier, l'an de grace mil quatre cens et vint six et de nostre règne le quint. Ainsi signé : Par le Roy, a la relacion du Conseil. Montfort.

CLXII. — Paris, 31 janvier 1427 (n. s.).

Rémission à un forgeron de Rouen qui, la veille du jour des Rois, après souper, étant allé reconduire une femme à son hôtel, près du cimetière Saint-Ouen, s'est pris de querelle avec deux valets anglais qui l'insultaient, et a frappé l'un d'eux mortellement d'un coup de dague. (JJ 173, n. 585, fol. 290 recto.)

Henry, etc., Savoir faisons, etc., nous avoir esté humblement exposé de la partie des amis charnelz de Jehan de Riant, mareschal, aagié de xxxvj ans ou environ, natif de la parroisse de Grant Court ou conté d'Eu que, comme tout le temps de sa vie, depuis qu'il eut force de besongnier en forge, il ait continuellement besongnié de sondit mestier, tant en la ville de Rouen, en l'ostel de Pierre Beubin, mareschal, demourant près le pont de Robec, où il a demouré par l'espace de demi an ou environ, come ailleurs. Et il soit ainsi que la veille de la feste des Roys derrenierement passée, pour solennité de la journée, Colette Beubin, mère dudit Perrenet Beubin, mareschal, eust mandé et fait venir souper avec elle une sienne fille nommée Alipson, degerpie de defunct Jehan le Mecteer, demourant en la parroisse de Saint Ouen de Rouen, assez près de l'ostel de sadicte mere et de sondit frere, et eussent fait bonne chiere audit souper avec ledit de Riant, Jehan Bichier et Jehan Oyllart, varlez de forge dudit hostel. Et après icellui souper, lesdis de Riant, Bichier et Oyllart feussent partiz d'icellui hostel environ dix heures, et eust l'un d'iceulx prins une lanterne pour convoier et mener ladicte degerpie dudit le Mecteer en sondit hostel, qui est devant le cimetière Saint Ouen dudit Rouen. Et quant ilz vindrent auprès dudit hostel d'icelle degerpie, ilz trouverent plusieurs compaignons, les aucuns en habit de guise et les autres non, qui portoient flambeaux alumez et approcherent la lumière d'iceulx flambeaux auprès des visages d'iceulx Bichier, Riant et Oyllart, et si leur rompirent et despecerent leur lanterne, en ce faisant semblant qu'ilz eussent intencion et voulenté de les battre. Et ce non obstant, lesdis de Riant, Bichier et Oyllart, qui ne vouloient point avoir de noise ne débat, menerent ladicte degerpie dudit le Mecteer jusques a sondit hostel, et quant elle fut entrée dedans sondit hostel et qu'elle ot fermé son huis, ilz partirent ensemble pour retourner en l'ostel de leurdit maistre. Et en eulx retournant, ledit Bichier dist qu'il seroit bon de congnoistre ceulx qui leur avoient rompu leurdicte lanterne, et qu'ilz estoient alez vers une rue par ou l'on va derrière les murs de Saint Ouen. Et lors partirent ensemble et alerent en ladicte rue derriere lesdiz murs de Saint Ouen. En laquelle rue derrière lesdiz murs, ilz encontrerent deux varlez Anglois, l'un nommé Bris et un autre nommé Pietre, dont ilz ne scevent le seurnom, qui portoient ung flambel ardent. Et commança ledit Pietre a dire audit Jehan de Riant telz paroles : « Parle anglois ; tu scez bien parler anglois. » Lequel de Riant lui respondi tout doucement qu'il ne parlerait point anglois, et qu'il ne saroit. Et tant se departirent et alerent l'un d'un costé et l'autre d'autre en ladicte rue. Et tantost après lesdis de Riant, Bichier et Oyllart retournerent par ladicte rue de derrière lesdiz murs de Saint Ouen, pour eulx aler coucher en l'ostel de leurdit maistre. En laquelle rue ilz encontrerent de rechief lesdiz deux Anglois. Et dist ledit Pietre de rechief audit Jehan de Riant, qui aloit devant bien loing desdiz Bichier et Oyllart, qu'il parlast anglois, et qu'il savoit bien parler anglois. Lequel de Riant se excusa par pluseurs fois, en disant qu'il ne savoit parler anglois. Et lors ledit Pietre, mal content de ce, lui donna un coup de poing sur les espaulles. Auquel Pietre ledit Jehan de Riant dist qu'il ne le frapast plus, et qu'il avoit fait mal de l'avoir feru. Lequel Pietre, qui estoit ja passé oultre ledit de Riant, retourna audit de Riant et lui donna un barbouquet par soubz le menton, et si efforça de le ferir encores. Lequel de Riant, mal content de ce que ledit Pietre l'avoit ainsi par pluseurs fois feru, sans ce qu'il lui eust aucunement deservy ou fait aucun desplaisir, doubtant que ledit Pietre voulsist encores recouvrer a battre et ferir ledit de Riant, pour résister a l'entreprise d'icellui Pietre, qui monstroît semblant de perseverer de lui fere plus grand mal, et pour repeller sa force, sacha une petite dague, qu'il avoit pendue a sa seinture, et en donna deux horions audit Pietre, anglois, l'un, un petit, au dessoubz du nombry et l'autre auprès de l'espaule. Et ce fait, lesdis Oyllart et le Bichier, qui estoient assez loing dudit debat, et aussi ledit Riant partirent ensemble et s'en alerent en l'ostel de leurdit maistre ; et lesdis Anglois s'en alerent par la ville où bon leur sembla, ne scevent lesdis Riant, Bichier et Oyllart en quel lieu. Et depuis ledit Pietre a esté desdiz horions gouverné par maistre Guillaume Coulombel, cirurgien juré en la ville de Rouen, lequel dist alors par pluseurs fois que au plaisir Dieu il seroit tantost en bon point, et se gariroit bien et bel. Lequel Pietre a vescu depuis ledit cas, qui fut ledit jour de la veille des Roys, jusques au xxvi^e jour de janvier derrenierement passé, qu'il est alé de vie a trespasement par mauvais gouvernement, come l'en dit. Pour cause et occasion duquel cas, ledit Jehan de Riant a depuis tousjours esté détenu prisonnier et encores est en noz prisons a Rouen... Si donnons en mandement par ces presentes au bailli de Rouen... Donné a Paris, le derrenier jour de janvier,

l'an de grace mil quatre cens et vint six et de nostre regne le quint. Ainsi signé : Es requestes par vous tenues, esquelles messire Raoul le Sage, maistre Pierre de Marigny et plusieurs autres estoient. Oger.

CLXIII. — Paris, 31 janvier 1427 (n. s.).

Rémission à Guérin Vadon, de La Chapelle près Sées, pour avoir travaillé secrètement à ouvrir, dans une maison attenante à l'église Saint-Gervais de Sées, la brèche par laquelle les Français ont pu pénétrer de nuit dans la forteresse. (JJ 173, n. 593, fol. 294 verso.)

Henry, etc., Savoir faisons, etc., nous avoir receu l'umblé supplicacion des parens et amis charnelz de Guerin Vadon, povre simple homme laboureur en terres labourables, chargé de femme et d'enfans, contenant que, comme six ans a ou environ, les Armignaz vindrent a puissance devant la ville de Sees et es bailliages d'environ, et entre les autres d'iceulx Armignaz y estoit en chief et cappitaine un nommé Loys de Tromagon, chevalier, lequel estoit et est seigneur de Saint Pere de la Chappelle emprès Sees, où estoit pour lors demourant ledit Guerin Vadon, son homme et subget. Et eulx estans enladicte ville de Sees, icellui Tromagon envoya querir icellui Guerin Vadon, Jehan Vadon et Jehan Perrigault, ses hostes et subgez, et tous demourans audit Saint Pere de la Chappelle, dont il estoit et est seigneur. Ausquelz, quand ilz furent venuz devers lui en grant paour, leur dist qu'il convenoit qu'ilz allassent en l'ostel de maistre Mahieu Fontaine, penancier de l'église dudit lieu de Sees, ou a la Tresoriere d'icelle église. Lesquelz y alerent, ne savoient pour quoy ; mais c'estoit pour faire un trou en icelle maison, afin qu'ilz entrassent en l'église et forteresse dudit Sees. Lequel Guerin Vadon, Jehan Vadon et Jehan Perrigault se excuserent de ce faire de tout leur povoir, en remonstrant audit Tromagon et a ceulx de la compaignie comment ce seroit leur destruction totale de corps et de chevance. Lequel leur dist qu'ilz le feroient ou il les destruiroit de corps et de chevance ; et furent retenuz de fait en icellui hostel, et tantost fut l'uis fermé sur eulx, et leur dist on sur leurs vies qu'ilz ne parteissent d'ilec, dont ilz furent moult esmerveilliez, Ouquel lieu ilz trouverent plusieurs autres compaignons laboureurs et des chanoines de ladicte eglise, qui estoient cause de ladicte entrée, qui leur dirent que ilz le feissent hardiement, car jamais ilz ne seroient en autre obéissance que en celle du parti desdiz Armignaz, et qu'ilz gangneroient tout le pays, telement qu'il convint que icellui Guerin Vadon et sesdiz deux compaignons avec lesdiz autres compaignons, pour sauver leur vie et qu'ilz veoient qu'ilz estoient en leur dangier, et se appelloient seigneurs du pays, houassent oudit hostel tant qu'ilz y firent ledit trou, à l'aide d'iceulx autres compaignons qu'ilz y trouverent avec lesdiz chanoines et autres d'icelle ville, qui ledit trou faisoient fere. Et cedit trou fait, s'en retournèrent iceulx Guerin Vadon et les dessusnommez en sa compaignie en leurs maisons audit lieu de Saint Pere de la Chappelle lez Sees, sans ce que ilz feussent cause ne consentans de ladicte entrée ne du trou faire paravant ladicte contrainte ne depuis. Par lequel trou iceulx Armignaz entrèrent dedans ladicte eglise et forteresse et dont ilz furent seigneurs et maistres. Depuis laquelle entrée lui a convenu qu'il ait esté, demouré et conversé avecques eulx et en leur compaignie tant de temps qu'ilz y furent, qui fut le temps de huit sepmaines ou environ. Depuis lequel temps et leur dit partement icellui Vadon a tousjours demouré audit lieu et en nostre obeissance, et encores a fait comme les autres de ladicte ville, noz bons, vrays et loyaulx subgez, sans seurté ne saufconduit de quelque cappitaine que ce soit, jusques xv jours ou trois sepmaines a ou environ qu'il s'est destourné dudit lieu ; pour lequel cas, doutant rigueur de justice, s'est absenté du pays en lieu a nous obeissant puis xv jours ença ou environ... Si donnons en mandement par ces presentes aux bailliz de Can et d'Alençon... Donné à Paris, le derrenier jour de janvier, l'an de grace mil quatre cens et vint six et de nostre regne le quint. Ainsi signé : Es requestes par vous tenues, esqueles messire Raoul le Sage, maistre Pierre de Marigny et plusieurs autres estoient. Oger.

CLXIII*. — Paris, 17 février 1427(n. s.).

Rémission à Jean Mouchet, du hameau de Coupigny, en la paroisse d'Heubécourt, fermier de Charles de Jeucourt, écuyer : au mois d'août 1425, pris et rançonné par les brigands, il a été contraint de leur porter des vivres dans les bois et de les héberger à plusieurs reprises dans son hôtel. (JJ 173, n. 5 96, fol. 295 verso.)

Henry, etc., Savoir faisons, etc., nous avoir receu l'umblé supplicacion des amis charnelz de Jehan Mouchet, chargé de femme et de plusieurs enfans, tant les siens come autres mineurs orphelins dont il a la charge et garde, demourant a deux lieues près de Vernon, en la paroisse de Haubercourt, ou hamel de Compigny, assez près des bois et forests dudit lieu, ou bailliage de Gisors, en un hostel et manoir a lui appartenant, contenant comme, des long temps a, ledit Mouchet et ses predecesseurs ont tousjours fait et tenu leur demeure oudit hostel, lequel leur appartient de long temps et auprès d'icellui sont situez et assis ces heritages dont lui, sa femme et enfans et ses devanciers ou temps passé ont tousjours a la peine de leurs corps et de leurs labours vesqu honnorablement. Et depuis certain temps ença, avoit et a ledit Mouchet

prins a ferme jusques a long temps toutes les terres labourables que nostre amé Charles de Giencourt, escuier, avoit et a audit lieu : a cause de laquelle ferme et pour icelle et autres ses heritages fere valoir s'estoit et est ledit Mouchet tenu en sondit hostel, comme pluseurs autres ses voisins ont fait et encores font chascun jour, et iceulx labouré au mieulx qu'il a peu. Et pour ce que ledit Mouchet estoit et a esté renomé d'estre bien aisé et avoir bonne chevance, pluseurs brigans, frequentans et repairans esdiz bois et forests, se sont par pluseurs fois mis en aguet pour icellui vouloir prendre et amener leur prisonnier. A quoy il a tousjours au mieulx qu'il a peu resisté et tousjours fait son devoir avec noz officiers de ladite ville de Vernon et autres de chassier et aidier a prendre iceulz brigans, ainsi que tenu y estoit et est comme nostre bon [et] loyal subget. Neantmoins, ou mois d'aoust l'an mil IIIIe XXV, ainsi come ledit Mouchet estoit aux champs de nuit et gardoit ses blefz pour les bestes sauvages, iceulx brigans le prindrent et raençonnerent et le tindrent tres durement. A l'occasion de laquelle prinse et pour soy oster et mectre hors de leurs mains, et eviter l'inconvenient de sa personne, lui a convenu par force et contrainte qu'il leur ait accordé et promis paier unes chausses de six escuz d'or et leur porter vivres come pain, vin et chars en ung hostel dedans lesdiz bois loing de tous autres hostelz. Et pour ce fere et accomplir, trois d'iceulx brigans alerent avec lui en son hostel et ne le laisserent point jusques a ce qu'il ot fait et accompli ce que par force leur avoit promis ; laquelle chose par ladite contrainte et a sa grant desplaisance il a fait une foiz seulement. Et avec ce depuis, iceulx brigans sont venuz en sondit hostel par quatre foiz tant de jour come de nuit, et malgré lui ont prins leur repas de boire et mengier comme pain, vin et autres vivres telz qu'ilz y trouvoient. Lesqueles choses il a lui mesmes par chascune fois esté dire et faire savoir a Guillaume le Cop, lieutenant a Vernon du bailli dudit lieu, incontant qu'ilz estoient partiz et qu'il a peu eschapper d'eulx. Pour occasion desqueles choses ainsi par lui commises et pour doubte de trop rigueureuse justice, icellui Mouchet se soit absenté du pays... Si donnons en mandement au bailli de Rouen et des ressors et exempcions dudit bailliage de Gisors... Donné a Paris, le xvije jour de fevrier, l'an de grace mil quatre cens et vint six, et de nostre regne le quint. Ainsi signé : Par le Roy, a la relacion du Conseil. Oger.

CLXIV. — Paris, 20 mai 1427.

Rémision à un gentilhomme anglais et à sa femme, habitant l'hôtel de la Cloche à Rouen, lesquels, ayant découvert des faux-monnayeurs, travaillant dans l'hôtel du Pot-de-Cuivre, voisin de leur demeure, ont consenti, moyennant finance, à ne pas les dénoncer à la justice. (JJ 173, n. 656, fol. 320 verso.)

Henry, etc., Savoir faisons, etc., nous avoir receu l'umble supplicacion de Jehan Hardint, escuier, natif du royaume d'Angleterre, et de Perrecte, sa femme, damoiselle, natifve de nostre pays et duchié de Normandie, comme puis nagaires un nommé Berangier, Jehan des Champs, Jehannin Poissonnier, le jeune, et Marguerite, femme dudit Poissonnier, nagaires demourans en l'ostel où pend l'enseigne du Pot de cuivre, en la parroisse de Saint Patris a Rouen, se feussent efforciez, ou les aucuns d'eulx, de faire et forgier monnoie en icellui hostel. Et en ouvrant en ce, eussent aucunement esté apparceuz par le paige dudit Hardint, nommé Michelet Fromat, et aussi par une fille nomée Michelecte, chamberiere desdis supplians et demourans en leur hostel avecques eulx, où pend l'enseigne de la Cloche, en la ville de Rouen. Et se feust ledit paige, après ce qu'il les ot oys marteler, party de l'estable où il estoit, et alé dire audit suppliant, son maistre, qu'il avoit oy ainsi marteler, et qu'il lui sembloit que c'estoit monnoie qu'ilz faisoient. Lequel suppliant fut de ce moult esmerveillé et ne creut pas son paige legierement, mais demanda a ladite suppliante, sa femme, quelles gens ce povoient estre qui demouroient en icellui hostel du Pot de Cuivre. Laquele lui dist que c'estoit le filz Poissonnier, nouvellement venu demourer oudit hostel ; et pensoit icelle femme que ce feust en ouvrant du mestier de dignanderie, dont icellui Poissonnier, le jeune, estoit ouvrier ; et aussi faisoit ledit suppliant son mary. Et atant se passerent a l'eure ; mais ledit paige leur dist qu'il avoit veu peser monnoie, et lui sembloit qu'elle n'avoit point encores esté frappée en coing. Se esmerveillerent lesdis supplians des paroles dudit page ; et dist ledit suppliant a sondit paige qu'il regardast par un partuis en la chambre où ilz faisoient ladite monnoie ; comme si fist il, et appella ledit suppliant son maistre, en lui disant qu'il venist veoir, et qu'il lui sembloit que c'estoit monnoie. Lequel suppliant saily hors de sa chambre, ala en l'estable, et lui monstra ledit paige par où il regarderoit ; come si fist il, et appercevant ce, dont il fut moult esbahy. Puis retourna en sa chambre querir ladite suppliante, sa femme, pour lui monstrier ce ; et de fait lui monstra par le partuiz que le paige lui avoit enseigné, et veirent a l'eure un homme qui frappoit en coing ; mais il n'apperceurent pas bonnement jusques à celle heure que ce feust monnoie. Et quant ilz l'eurent ainsi apperceu, ilz firent le signe de la croix, comme tous esmeuz. Et dist ledit suppliant qu'il le vouloit aler dire et anoncier a justice ; et ladite suppliante, sa femme, lui dist helas que non fist, et qu'elle aloit a l'eglise soy confesser, et selon ce que son confesseur, ce oy, lui diroit, qu'ele lui diroit et conseileroit sur ce, et le rapporteroit et diroit audit suppliant, son mary, et que ce seroit grant pitié de fere mourir tant de gens, et mesmement lesdiz Poissonnier et sa femme, qui sont tres jeunes gens, chargez de pluseurs petiz enfans. Et ce pendant ledit suppliant dist a sondit paige que se il oyoit plus marteler, qu'il lui venist dire. Et assez tost icellui page, appercevant un qui commença à marteler, et tantost

appella son maistre, ledit suppliant ; lequel regarda par le partuis de ladicte estable et vit un homme frapper monnoie en coing, mais ne savoit quelle monnoie c'estoit, et dist en ceste maniere : « Hé, compaignon, est-ce bien fait ? » Et adonques icellui compaignon se leva et se retrahy sans mot dire. Et ledit suppliant se parti de sondit hostel de la Cloche et ala audit hostel du Pot de Cuivre, et frappa a l'uis, et vint au devant de lui par dedans audit huis la femme dudit Poissonnier, qui lui demanda qu'il vouloit. Et il lui dist qu'il demandoit gens qui faisoient de la monnoie, et elle respondi qu'il n'y en avoit nulz. Et il dist que si et qu'il les vouloit aler veoir; et elle lui dist qu'il n'y enterroit ja. Il dist que si feroit; dont icelle femme commença a crier lors en ceste maniere : « Nostre Dame, nous sommes perduz ! », en plourant très fort, « se ce n'est de vostre grâce ». Et lui demanda ledit suppliant quelz gens c'estoient qui besongnoient ; et elle dist que c'estoit son père et son cousin. Et il lui demanda se ilz estoient plus, et elle dist que non, fors son mary et elle. Et il lui demanda se il avoient beaucoup fait de monnoie, qui dist qu'ilz n'avoient encores riens fait. Et adont il lui dist que il, sa femme et ses gens avoient veu frapper en coing, en lui disant qu'elle lui en monstrast ou qu'il yroit querir la justice, et qu'il vouloit veoir ladicte monnoie. Et lors elle print en sa bourse un blanc breton, et le bailla audit suppliant, qui lui demanda se il avoient point fait d'autre monnoie. Elle respondi par serement que non, et que c'estoit le premier qu'ilz avoient fait. Et print ledit suppliant icellui blanc et le mist en sa manche, et commença de rechief icelle femme a crier : « Nostre Dame ! » et plourer très fort, tant que sesdis pere et cousin vindrent qui faisoient ladicte monnoie, en lui demandant qu'ele avoit et que ledit suppliant lui demandoit, et elle leur dise tantost en ceste maniere : « Helas, nous sommes tous perduz, s'il n'a pitié de nous ! » Lesquelz commancerent lors a eulx agenouillier devant ledit suppliant, plourant très fort et disant qu'ilz estoient perduz, eulx et leurs enfans, se il n'avoit pitié d'eulx. Lequel voiant leur humilité, piteusement leur dist que son page et sa chamberiere le savoient bien avant que lui ne sa femme ; et ladicte jeune femme lui dist qu'il estoit bien en lui d'apaisier sadicte femme et gens. Mais il lui dist qu'il n'en feroit riens. Et lors commancerent a dire et crier tous ensemble qu'ilz estoient perduz. Et en ces entrefaictes vint ledit Poissonnier, mary de ladicte Marguerite, qui estoit a la porte à la garde pour la journée ; demanda que c'estoit, et ledit suppliant lui dist que c'estoit monnoie que on faisoit en son hostel. Et lors s'agenoulla, et commancerent de rechief tous ensemble a crier et demener une grant douleur et pitié. Et leur dist ledit suppliant, meu de pitié, qu'ils demourassent ylec et qu'il s'en aloit au moustier ; et pour ce qu'ilz doubtoient tousjours qu'il ne les alast accuser, il leur afferma que de par lui ilz n'auroient nul mal. Et lui, estant au moustier, se confessa et parla a un prestre par confession qu'il pouvoit faire, en le sommant ou nom de Dieu et des sains de paradis qu'il le conseillast a la vérité et pour le mieulx qu'il en avoit a fere. Lequel prestre fut moult esmerveillé, et fit le signe de la croix, en disant que c'estoit grant pitié de leur fait ; et lui redist encores ledit suppliant moult humblement et a genoulz quele chose il lui en conseilloit a fere et se il le yroit point dire a justice. Il lui dist que non et que ce seroit grant pitié de les faire mourir, et qu'il leur en parleroit, et se Dieu plaist ilz ne s'en entremectront plus, et qu'il laissast la chose en ce point, et il feroit moult grant aumosne. Et encores demanda icellui suppliant audit prestre se il les avoit ainsi veuz s'il les accuserait point ; qui lui dist que non, et que, si Dieu plaist, ja homme n'en mourroit par lui, en disant outre audit suppliant qu'il devoit amer son voisin comme soy mesmes. Et adont s'en retourna ledit suppliant par devers les dessusnomez, lesquelz il trouva tous ensemble en leurs hostelz, et leur dist s'il tenoit le cas ainsi avenu secret, se il en feroient ne useroient jamais plus ; et lui jurerent tous ensemble que non. Et leur afferma que s'il pensoit qu'ilz en vouldissent plus user, sans faulte il les accuseroit, et ilz lui promistrent que non. Et adont quist en sa manche pour cuider trouver ledit blanc breton, qu'ilz avoient ainsi forgé, et plus n'en avoient forgé en coing, comme ilz disoient; mais icellui estoit cheut, et ne le pot trouver. Et encores ne fut pas ledit suppliant de ce content, mais mist le cruxifix sur la table, en la présence d'iceulx quatre personnes, c'est assavoir lesdis trois hommes et la femme, en leur promettant que se ilz vouloient jurer fermement sur icellui que jamais n'en besongneroient, ilz tendroient la chose secreta et n'en auroient mal de par lui; ce qu'ilz jurerent, et outre que se aucun inconvenient ou empeschement leur en ensuivoit, ilz n'accuseroient lui, sa femme ne ses gens dudit recelement, et leur jura par sa foy que jamais ne les encuseroit, mais qu'il n'en feissent plus. Et atant s'en vult ledit suppliant partir, mais ilz lui dirent qu'il disneroit avec eulx, jurans qu'il n'en partiroit jusques il eust disné, et disnerent ensemble. Et en disnant lui demanderent comment ilz le pourroient contenter, et lors lui promistrent donner cent frans et six marcs d'argent, avec une douzaine de vaisselle d'estain ; et outre promistrent baillier ausdis paige et chamberiere douze frans, et d'icelles sommes respondi ledit Jehannin Poissonnier pour tous, sans obligacion faire. Et après envoyerent querir ladicte suppliante pour disner avec eulx, et pour lui recorder la maniere du faire, et elle leur dist qu'elle n'en vouloit riens oyr parler, et dist audit suppliant son mary qu'elle avoit parlé a son confesseur et que tout yroit bien se Dieu plaist. Et atant s'en revindrent lesdis suppliant et sa femme en leur hostel de la Cloche, et dist ledit suppliant a sesdis paige et chamberiere qu'ilz auroient douze frans et qu'ilz tenissent la chose secreta. Et après ledit Jehannin Poissonnier bailla audit suppliant six frans pour baillier a sesdis paige et chamberiere, lesquelz il ne leur a encores point bailliez, pour ce que, incontinant ou assez tost après, il monta a cheval et parti pour aler devant Pontorçon, où a présent est le siege, en la compaignie de nostre bailli de Rouen. Pour occasion duquel recelement de non avoir ce dénoncé a justice, promesses d'argent et autres choses dessusdictes et desdiz six frans ainsi receuz, lesdiz supplians doubtent d'estre durement traictiez... Si donnons en

mandement par ces mesmes presentes a nostredit bailli de Rouen... Donn   a Paris, le xxme jour de mai, l'an de grace mil quatre cens et vint sept et de nostre regne le quint. Ainsi sign   : Par le Roy, a la relacion de mons. le Regent de France, duc de Bedford, mons. le cardinal d'Angleterre, vous et autres presens. J. Milet.

CLXV. — Paris, 5 juin 1427.

R  mission    fr  re Laurent Anquetil, religieux de l'abbaye de Mortemer, et fermier de l'h  tel de la Lande en la for  t de Lyons, pour avoir recueilli et soign   un brigand bless   dans sa maison. (JJ 173, n. 692, fol. 336 recto.)

Henry, etc.. Savoir faisons, etc., nous avoir receu l'umblle supplicacion de frere Laurens Anquetil, prestre, povre religieux de l'abbaye de Mortemer, en la forest de Lions, de l'ordre de Citeaux, contenant que, des cinq ans a ou environ, il print a ferme de l'abb   de ladicte eglise un hostel avec plusieurs terres labourables et autres choses, nomm   icellui hostel la Lende sur Lions, qui sont des appartenances de ladicte abbaye. Lequel hostel est un hostel plat, assis en ladicte forest de Lyons, s  par   et loing de toutes autres villes et hostelz. Or est vray que, depuis demi an en  a ou environ, ledit suppliant, en venant de ladicte abbaye de Mortemer, o   il avoit dit et celebr   la messe ce jour, oudit hostel de la Lende, trouva dix ou douze brigans ou autres gens embastonnez de lances, de picques, d'esp  es et d'autres armeures, et entre les autres y en avoit un nomm   Jehannequin de Villiers, escuier, navr   et bleci   de plusieurs plaies. Et pour ce dist l'un de la compaignie audit suppliant, et de fait lui fist jurer par le sacrement de la messe qu'il avoit celebr   ce jour et par plusieurs autres grans seremens, que il tendroit secret ce que par lui et autres de sa compaignie lui seroit dit. Et ce fait, lui dirent les aucuns de ladicte compaignie que il failloit que il norrist, gardast et feist guerir en son hostel celui de sa compaignie qui ainsi estoit bleci   et navr  , nomm   Jehannequin de Villiers, natif dudit pays, et que ce feust le plus secr  tement que faire se pourroit et telement que de ce ne feust aucunes nouvelles dont inconvenient s'en peust ensuir de la personne dudit Jehannequin, en jurant et faisant grans seremens que se ainsi n'estoit par lui fait, ilz bouteroient le feu en ladicte abbaye et oudit hostel de la Lende, le murdroient et tueroient et si ardroient dedans le feu. Et adonc ledit suppliant, qui v  ritablement ne savoit quelz gens s'estoient qui parloient a lui, except   ledit Jehannequin, veant les grans menaces que ilz lui faisoient, se accorda a la requeste par eulx a lui faicte, et de fait fut ledit Jehannequin de Villiers, acompaigni   de son paige, men   audit hostel de la Lende. Et l   ledit suppliant, doubtant la mort et les menaces qui faictes lui avoient est  , a norry icellui suppliant et gard   oudit hostel par l'espace de cinq sepmaines ou environ ; pendant lequel temps il a est   gary de ses plaies et navreures ; et de fait s'est parti dudit hostel et s'en est al   ne scet o   ledit suppliant. Et combien que ledit suppliant, qui est prestre, religieux, en tous ses fais et besongnes ait est   de bonne vie et renomm  e et nostre bon, vray et loyal subget et obeissant, et que il n'eust os   reveler ne aucune chose dire de la garde qu'il faisoit dudit Jehannequin et de sondit paige, tant pour doubte de perdre son *Per omnia* comme pour doubte de la mort et pour les menaces qui faictes lui avoient est   par les dessusdis, neantmoins icellui suppliant doubte que pour ce que ledit Jehannequin de Villiers et les autres de sa compaignie tenoient lors et encores font, si comme l'on dit, le parti contraire a nous, que par le moien de ce que dit est on lui vueille donner et fere empeschement en son corps et en ses biens... Si donnons en mandement par ces presentes au bailli de Rouen et des ressors et exempcions de Gisors et de Vernon ... Donn   a Paris, le cinquiesme jour de juing, l'an de grace mil quatre cens et vint sept et de nostre regne le quint. Seell  es de nostre seel ordonn   en l'absence du grant. Ainsi sign   : Par le Conseil. CHEMBAUT.

CLXVI. — Paris, 12 juin 1427.

R  mission    Jehannin le Poissonnier, chaudronnier de Rouen, et    sa femme, coupables du crime de fausse monnaie, (JJ 173, n. 682, fol. 332 recto.)

Henry, etc., Savoir faisons, etc., nous avoir receu l'umblle supplicacion des parens et amis charnelz de Jehannin le Poissonnier, povre jeune homme, aagi   de xxj a xxij ans ou environ, et de Marguerite, sa femme, aagi  e de xvij ans ou environ, chargez de trois petiz enfans dont l'ainsn   n'a pas trois ans, contenant que puis No  l en  a le pere d'icelle Marguerite, nomm   Guillaume Berengier, demourant a Rouen, lequel a iceulx mariez avoit par plusieurs foiz expos   que il avoit perdu sa chevance et que ilz lui pourroient bien aidier a la recouvrer se ilz vouloient, en les induisant et requerant que ilz lui voulsissent fondre du billon et matiere pour et afin de fere de la monnoie de Bretagne. A quoy lesdiz mariez, doubtans leurdit pere et en faveur de lui, se feussent consentuz et accordez, et de fait se sont entremis de fondre en leur fournel de dinanderie, dont ilz sont du mestier, pour fere ladicte monnoie jusques au nombre de quinze livres de matiere ou monnoie ou environ, ne scevent proprement le nombre, et fondirent ladicte matiere en la presence dudit Berengier, de Jehan des Champs, monnoier, et de ung nomm   Loys le Barrois,

lesquelz participoient ou dit fondaige. Et pour avoir aucunes choses necesseres a icellui fondaige, lesdiz povres mariez, par l'induction de leur dit pere, aient baillié a icellui deux tasses ou hanaps d'argent, pesans deux marcs ou environ, afin de prendre et avoir prouffit en ce comme leur dit pere. Laquelle matiere fondue par icellui Jehannin en une table il mist depuis par bendes ; et après, sadicte femme, par le commandement de son dit pere, tailla lesdictes bandes en petites pieces, et certains jours après ensuivans, furent lesdictes pieces batues par lesdis Berengier et des Champs en l'ostel dudit Poissonnier, afin de les mettre en essence de ladite monnoie. En faisant laquele chose, et ainsi que ledit Berengier ou des Champs essaioient a mettre en coing d'icelle monnoie une ou deux pieces, ilz furent trouvez sur le fait par un nommé Jehan Hardoint, Anglois, qui se efforça de les accuser a justice. Pour obvier a laquele chose ilz appointerent avec ledit Hardoint et lui promistrent paier la some de cent livres tournois, six marcs d'argent et une douzaine de vaisselle d'estain, et lui donnerent a disner, presente sa femme, et lui promistrent que jamais ilz n'en feroient plus, et avec ce promistrent donner douze livres tournois a la meschine et au paige dudit Hardoint, qui leur avoient veu fere ledit ouvrage par ung trou qui estoit en son estable. Et parmy ce ledit Hardoint promist que jamais il n'en parleroit. Desqueles choses ainsi promises, come dit est, icellui Hardoint a depuis receu dudit Poissonnier la somme de six livres tournois. Et ce fait, certain temps après, lesdis Berengier, des Champs et Barrois vindrent en l'ostel d'icellui Poissonnier et emporterent lesdictes matieres et aucuns instrumens que ilz avoient et s'en alerent en un village nommé Bappaumes, près dudit lieu de Rouen, et ylec ont forgé de ladite monnoie certain nombre, come ledit Poissonnier leur a oy dire, et d'icelle a ledit Berengier apporté audit Poissonnier et à sa femme jusques a la somme de soixante solz ou environ, laquele ilz refuserent plusieurs fois ; et ce nonobstant la laissa icellui de Berengier en l'ostel desdis mariez. Et après ce, ilz, non sachans le grant peril qui s'en povoit ensuir, se sont efforciez de la mettre et employer, et en ont baillié a un boulangier nommé Trevet jusques au nombre de vint cinq pieces ou environ, lequel les leur rapporta depuis, et lui furent restituées en bonne monnoie, et huit pieces a un nommé Philippot demourant aux Maillez audit Rouen, lequel Philippot en a esté trouvé saisi par justice. Pour occasion duquel cas, ledit Poissonnier a esté emprisonné audit lieu de Rouen et detenu prisonnier par l'espace de onze semaines, où il est encores en grant povreté et misere et sadicte femme absente en dangier, pour son jeune aage, de vivre en dissolution de son corps, et iceulx trois povres petiz enfans de demourer comme orphelins... Si donnons en mandement par ces mesmes presentes a nostre bailli de Rouen... Donné a Paris, le xije jour de juing, l'an de grace mil CCCC XXVII et de nostre regne le quint. Ainsi signé : Par le Conseil. Greslé.

CLXVII. — Paris, 28 juin 1427.

Rémision à un laboureur de la Londe en Vexin, pour avoir, de complicité avec le curé dudit lieu, tué, dépouillé et jeté dans un puits un Anglais qui était venu loger chez lui et voulait piller sa maison. (JJ 702, n. 702, fol. 340 verso.)

Henry, etc., Savoir faisons, etc., nous avoir receu l'umblé supplicacion des parens et amis charnelz de Jehannot Coignée, povre homme laboureur, chargé de femme et d'enfans, prisonnier a Gisors, contenant que come sept ans a ou environ, par le temps de la famine et chier temps qui fut environ le mois d'avril, en un certain jour au soir, trois heures ou environ après soleil couchié, en la ville de la Londe en Weuguessin le Normant vint ung Anglois qui menoit trois beufs et un cheval. Lequel Anglois a ladite heure se loga en l'ostel dudit Coignée, qui pour lors estoit tout seul en son hostel, malade demi an avoit. Et quant icellui Anglois fut ou dit hostel, il demanda a avoir du pain. Lequel Coignée lui respondit que il n'en avoit point ne de quoy en avoir, et que sa femme estoit alée a Rouen querir de l'orge a son col, laquele il attendoit. Lequel Anglois se courrouça de ce et se print a icellui Coignée et le bati ; lequel ne se povoit aidier par ladite maladie, et lui en co[n]vint partir son hostel, et s'en ala en l'ostel messire Gieuffroy Yart, prestre, curé dudit lieu de la Londe, auquel il dist qu'il ne s'osoit tenir en sa maison pour ledit Anglois. Lequel curé lui dist que si feroit et que il yroit avecques lui. Et en ce mouvement partirent et alerent en l'ostel dudit Coignée ; et quant ilz y vindrent trouverent ledit Anglois qui cherchoit et fouilloit par ledit hostel dudit Coignée. Auquel ledit prestre dist que c'estoit malheureusement fait. Et tantost que ledit Anglois les apperceut, il vint droit a eulx, son espée tirée, et leur couru sus. Et quant ilz virent qu'il venoit ainsi a eulx, ledit prestre s'avança et frappa d'un baston qu'il tenoit sur icellui Anglois et l'abati a terre et mourut ylec. Et ce fait, icellui prestre et Coignée, qui a paine se povoit aidier, aida audit prestre a le gecter en un puis près d'ilec. Et ledit prestre, après ce fait, print lesdiz beufs et cheval qu'il vendi ou en fist ce que bon lui sembla, sans ce que ledit Coignée en eust aucune chose a son prouffit, et trouverent sur lui en monnoie viij deniers, une espée, uns esperons et ung crenequin, que ledit prestre print et porta en sa maison, que depuis autres Anglois lui osterent. Pour lequel cas ledit Jehannot Coignée a esté prins et mis prisonnier audit lieu de Gisors, où il est en voie de briefment finer ses jours... Si donnons en mandement par ces presentes au bailli de Rouen et des exempcions de Gisors... Donné a Paris, le xxviije jour du mois de juing, l'an de grace mil quatre cens et vint sept et de [nostre] regne le quint. Ainsi signé : Par le Roy, a la relacion du Conseil. Oger.

CLXVI». — Paris, 28 juin 1427.

Rémission à Denis Aulde, laboureur d 'Aulnay-sur-Odon, lequel, ayant été mis en défaut par le bailli de Caen aux assises d'Evrecy, dans une cause qu'il soutenait contre Richard Aullet, du Mesnil-Oger, a allégué, sous la foi du serment, une excuse reconnue fausse et pour ce motif a été comme parjure condamné au pilori. (JJ 173, a. 703, fol. 341 recto.)

Henry, etc., Savoir faisons, etc., nous avoir oy l'umblé supplicacion de Denis Aulde, nostre homme lige et subget, povre homme laboureur, chargé de femme et d'enfans, aagié de xxx ans ou environ, demourant en la parroisse d'Aunoy ou diocese de Bayeulz, contenant que, depuis un an ença, il requis certaine execucion estre faicte par vertu de ses lettres contenantes xv solz de rente de obligacion d'un nommé Richard Aullet, demourant au Mesnil-Ogerin, des arrerages de sa rente; contre laquele execucion il mist opposition devant le viconte de Caen ; sur le fait de laquele opposition tant ait esté procedé que par doleance prinse par ledit Aullet ladicte cause soit devolue par devant nostre bailli de Caen en ses assises d'Evrecy, tenez ou mois d'avril derrenierement passé ; esqueles assises ledit suppliant n'ait peu estre ne comparoir, et pour ce ait esté mis en default a l'encontre dudit Aullet. Et il soit ainsi que, pour vouloir mectre au neant ledit default, ledit suppliant qui est simples homs, en certaines assises tenues par nostredit bailli en ce present mois de juing, ait dit et proposé en jugement, après le serement ou de lui dire verité sur ce, que au jour que ledit default fut donné il estoit malade telement qu'il n'eust peu venir ne comparoir a l'heure que lesdictes assises se tenoient. Sur quoy ledit Aullec eust dit et proposé au contraire, et par especial que ledit jour il avoit esté en la ville de Tury. Sur quoy il eust esté interrogué, et sur ce par grant simplece et inadvertance respondu qu'il estoit vray, non cuidant offenser par ce que dit sera cy après. Et tantost oye sa confession, fut envoié en prison, disant qu'il estoit parjure. Et pour ladicte cause a fait amende, et après ce a esté condempné comme parjure, et pour ladicte cause a fait amende et après ce a esté condempné a estre pillorié. Et combien que veritablement ledit povre suppliant eust esté emprís d'une maladie qui bien souvent le prent en la poitrine, telement qu'il est aucunesfois par l'espace de trois ou quatre heures qu'il ne se peut aidier ne a tres grant paine avoir son alaine, et eust ladicte maladie eue l'espace de trois heures ou environ, laquele chose il ne puisse ne pourroit bonnement prouver ne verifíer sinon par sa femme et enfans, pour ce que povres gens ne dient et ne monstrent tousjours pas à un chascun ne a ses voisins leurs maladies et essoines, mais les celent le plus secretement qu'ilz peuvent, et que un nostre sergent feust venu par devers lui et fait commandement qu'il alast ledit jour en ladicte ville de Tury pour le fait d'une taille et assiette dont il s'estoit meslé, laquele ville de Tury est a trois lieues de ladicte ville d'Aunoy et ainsi n'eust peu estre ne comparoir a sadicte journée, et que a cause dudit serement par lui ainsi fait il n'actendist d'autruy avoir aucun prouffit, fors tant seulement a la servacion de son droit, et s'il n'estoit point forgié ne induit de ce dire de personnes quelzconques, neantmoins ledit povre suppliant se doute que en brief ladicte sentence soit contre lui mise a execucion et que par ce il et sesdiz femme et petiz enfans et autres de son sang et ligne soient a tousjours mais notez d'aucune note d'infamie... Si donnons en mandement a nostredit bailli de Caen... Donné a Paris, le xxvijie jour de juing, l'an de grace mil quatre cens et vint sept et de nostre regne le quint. Ainsi signé : Par le Roy, a la relacion du Conseil. Adam.

CLXVIII. - Paris, 5 juillet 1427.

Rémission à Guerouldin La Boe, marchand de Rouen, impliqué dans le complot qui faillit, en 1424, livrer la ville aux Français. (JJ iy3, n. 742, fol 3 52 verso.)

Henry, etc., Savoir faisons, etc., nous avoir receu L'umblé supplicacion de Guerouldin la Boe, marchant de la ville de Rouen, chargé de femme et de trois petiz enfans, contenant que, trois ans a ou environ, un nommé Laurens Buset, de ladicte ville de Rouen, dist audit suppliant que il voudroit que celui qui se disoit daulphin feust en ladicte ville, et que lui, sa femme et enfans ne pvoient pas mourir de fain, en semblant et demonstrent en disant lesdictes paroles que ledit Buset feust comme desesperé. Desqueles paroles ledit suppliant fut bien desplaisant et en blasma fort ledit Buset, en lui defendant que plus ne les recordast devant lui ne autres, et lui disant que se il avoit necessité, que il vendist une de ses maisons. Et pour ce que il avoit aucune acointance avec ledit Buset, afin de le oster hors de deplaisance et que il eust argent a fere sa marchandise, trouva voie et maniere de lui fere vendre une ou deux de sesdictes maisons, et ne ot onques icellui suppliant congnoissance que ledit Buset eust entencion d'estre consentant de la machinacion et traison pourpensée de ladicte ville, mais lui sembloit que povreté et desplaisance lui faisoient dire lesdictes paroles. Et combien que depuis ilz aient plusieurs foiz parlé ensemble, ce non obstant icellui suppliant n'en oy puis parler audit Buset ne autre, jusques a trois ou quatre jours après ce que noz ennemis orent failli a entrer en ladicte ville de Rouen, que un barbier d'icelle, surnommé Baudry, lui dist la maniere comme ladicte ville avoit esté vendue et cuidée livrer ausdiz ennemis et la cause qui les avoit destourbez de y entrer et que se ilz y feussent entrez ilz n'eussent fait aucun mal aux habitans d'icelle ville, excepté aux Anglois, et que ainsi l'avoient promis. Desqueles paroles ledit suppliant fut moult esmerveillé et dict audit

Baudry que ce n'estoit point chose a croire, et que se lesdiz ennemis feussent entrez en ladite ville, pluseurs povres hommes et mauvais d'icelle se feussent aliez avecques eulx et l'eussent pillée, robée et destruite du tout, en defendant par ledit suppliant audit Baudry que plus ne lui en parlast. Lesqueles paroles ledit suppliant ne revela point aux gens et officiers de nostre justice, doubtant le faire pour l'amour que il avoit a ceulx qui les avoient dictes et que il ne cuidoit point que ilz en feussent consentans, mais tantost après les dist et revela particulièrement a autres ses amis secrez, afin que justice en eust congnoissance par autre que par lui ; par le moien de l'un desquelz la chose a esté revelée a noz gens et officiers de la justice dudit lieu, lesquelz ont mandé deux ou trois foiz ledit suppliant, qui sans contrainte a dit et confessé les choses dessusdictes. Pour occasion de laquelle cause il a esté longuement et encores est detenu prisonnier es prisons dudit lieu de Rouen... Si donnons en mandement par ces mesmes presentes au bailli de Rouen... Donné à Paris, le cinquiesme jour de juillet, l'an de grace mil quatre cens et vint sept et de nostre regne le quint. Ainsi signé : Par le Roy, a la relacion de mons. le Regent. J. Millet.

CLXIX. — Paris, 19 août 1427.

Rémision à Jean Coacq, écossais, pour le meurtre d'un Anglais faisant partie d'une bande de pillards qui rançonnaient la ville d'Escouché. (JJ 1 74, n. 58, fol. i3, verso.)

Henry, etc., Savoir faisons, etc., nous avoir receu l'umblé supplicacion de Jehan Coacq, natif du pais d'Escoce, contenant comme puis pou de temps ença, ainsi qu'il aloit en la ville d'Escouchie, qui est près de la ville d'Argenthen et lui estant en icelle, trouva pluseurs compaignons, eulx disans du pais de Gales, qui estoient logiez en icelle ville d'Escouchie et qui n'avoient, come on disoit, adveu d'aucun cappitaine. Lesquelz compaignons pilloient les bonnes gens d'icelle ville d'Escouchie et leur ostioient pluseurs de leurs biens meubles, comme draps de lit, chevaux, jumens, chapperons a homme, coctes a femme et iceulx biens raençonnoient et faisoient raençonner ausdictes bonnes gens. Lequel suppliant, ce veant, dist a deux d'iceulx compaignons que c'estoit mal fait a eulx de ainsi tourmenter iceulx bonnes gens, et que, se ce venoit a congnoissance de justice, qu'ilz en seroient pugniz griefment. Lesquelz deux compaignons, ou au moins l'un d'eulx, et desquelz il ne scet les noms, lui respondirent en anglois telz moz : « Wastant toustron, ou je te rompray la teste ». Et de fait tira sa dague l'un d'iceulx et lui en donna ung cop par la joe. Lequel suppliant, veant qu'il n'avoit pas la force contre eulx, se departi et s'en ala en l'ostel où il estoit logié. Et assez tost après qu'il fut en sondit logis, vindrent iceulx deux compaignons, et en leur compaignie pluseurs autres, qui de fait assaillirent ledit suppliant en sondit logis et en sa chambre. Lequel suppliant, voyant leur male volenté, leur dist telz moz ou semblables : « Messires, vous ne entrerez point ceans pour le present ». Lesquelz compaignons lui respondirent : « Si ferons a tes despens et y morras » : Et adont quant icellui suppliant vit que il ne pavoit de eulx eschapper, dist en soy : « Cy me fault vivre ou mourir ; Dieu me soit en aide! » Et lors iceulx compaignons le commancerent a assaillir fort et ferme, et il suppliant, en soy defendant, en navra ung et a l'autre il donna ung coup ou deux d'un baston appelé vouge, dont mort assez tost après s'en ensuy. Lors lui, veant les autres perseverer aleur assault et emprinse, dist : « Je requier, s'il y a en ceste compaignie gentil homme, qu'il me mene a justice ». Adont en y ot ung, qui fist cesser les envaissemens, et mena ledit suppliant es prisons d'Argenthen, esqueles il a tousjours depuis esté et encores est de present... Si donnons en mandement par ces mesmes presentes au bailli de Caen ... Donné a Paris, le xix e jour du mois d'aoust, l'an de grace mil quatre cens et vint sept et de nostre regne le quint. Ainsi signé : Par le Roy, a la relacion du Conseil. J. de Drosay.

CLXX. — Rouen, 28 août 1427.

Rémision à Jean Salvart, maçon, inculpé de complicité avec Richard Mittes et Alexandre de Berneval dans le complot qui avait pour but de livrer la ville de 48 Rouen aux Français, au moment de la bataille de Verneuil. (JJ 174, n. 14, fol. 6 recto.)

Henry, etc., Savoir faisons, etc., avoir esté exposé a nostre tres chier et tres amé oncle Jehan, regent nostre royaume de France, duc de Bedford, de la partie des parens et amis charnelz de Jehan Salvart, maçon, demourant en nostre ville de Rouen, que certain temps au devant de la bataille de Vernueil, un nommé Ricart Mictes, lors demourant en nostredite ville de Rouen, s'adreça audit Salvart et lui dist que nostre adversere Charles, nagaires soy disant daulphin, et nostre tres chier et tres amé oncle le duc de Bourgogne estoient en bonnepaix et accord et avoient traictié entre eulx et que nostredite ville de Rouen seroit bientost prise par force, en advertissant ledit Salvart que, se il advenoit que nostredit adversere ou ses gens feussent dedans ladite ville, que il advisast comment l'on pourroit faire du chastel. A quoi ledit Salvart respondit audit Ricart Mictes que il advisast bien ce qu'il disoit et que c'estoit un grant fait a fere et que il ne croit point que tele chose se peust fere, veu comment les choses que nostredit adversere et ses gens entreprennoient se portoient. Sur quoy lui dist ledit Mictes que la chose se feroit et que certainement il l'avoit oy dire a certaines personnes qui le disoient bien savoir, et que ledit Jehan Salvart n'en feist aucune

doubte. Et certain temps après, ledit Salvart et un nommé maistre Alixandre de Breneval, maçon, se trouverent oudit chastel de Rouen, où l'on besongnoit sur le fait des taches de maçonnerie, et parlerent ensemble de ce que ledit Ricart Mictes avoit dit audit Jehan Salvart et dont ledit Salvart avoit parlé audit maistre Alixandre, et regarderent et adviserent que, se il advenoit que nostredicte ville de Rouen feust prinse et conquisee par force et qu'il faulst fere nouvel serement et changier seigneur, que l'en pourroit bien remedier contre ledit chastel par faire mines et par asseoir canons pour rompre les pons et la porte, afin que ceulx qui seroient dedans ledit chastel ne peussent issir et saillir dedans la ville. Et en après ce, ledit Ricart Mictes trouva ledit Jehan Salvart et maistre Alixandre, et demanda audit Salvart se ilz avoient advisé ensemble sur ce dont il avoit paravant parlé a lui. Lequel lui respondi que oyl, ou cas que ladicte ville seroit ainsi prise et conquisee comme ledit Ricart Mictes avoit donné a entendre audit Salvart, qui dist audit Mictes qu'il ne creoit point que il se peust fere. Et assez tost après ladicte bataille de Vernueil, ledit Jehan Salvart eut souvenance de ce que ledit Mictes lui avoit dit que nostredicte ville de Rouen seroit conquisee par force par nostredit adversere, et pour ce ala devers ledit Mictes et lui dist et remonstra que ce qu'il lui avoit dit ne pouvoit estre vray et que c'estoit mauvaise semence a semer par la ville et qu'il gardast bien qu'il ne lui en parlast plus ne a nul autre. Et au temps que ledit Mictes parla premierement audit Salvart du fait de nostredit adversere, icelui Mictes bailla audit Salvart unes lettres en lui disant : « Regardez que il y a dedans » . A quoy ledit Salvart respondi qu'il n'estoit point clerc et que il ne les sauroit lire et que il ne sauroit que il y avoit dedans. Pour quoy ledit Mictes lui dist que il les fist lire audit maistre Alixandre. Et pour ce icelui Salvart porta lesdictes lettres audit maistre Alixandre sans ce qu'il sceust se il les lut et que elles contenoient ne en quel nom elles estoient faictes. Mais quant ledit Alixandre les ot veues, il dist que c'estoient des lettres dudit Ricart Mictes et que aucun mauvais garçon les avoit faictes, et tantost les depecha. Et nagaires, c'est assavoir devant quaresme derrain passé, un nommé Jehan Blondel vint devant ledit Salvart et lui demanda se il venoit aucunes gens ou gens d'armes, qu'ilz vouldissent entrer a Rouen, se il y vouldroit entendre et que son compere Ricart Mictes lui mandoit. Lequel Salvart lui dist qu'il ne lui en parlast plus et que jamais il ne seroit en place où il ne tenist le serement qu'il auroit fait a nous, comme autresfoiz avoit respondu. Pour lesqueles causes ledit Jehan Salvart a esté pris, arresté et detenu prisonnier en noz prisons a Rouen et son procès sur ce fait, moiennant nostre justice, a esté par sentence de nostre bailli de Rouen condempné pour estre decapité et son corps mis a nostre justice et par icele sentence ont esté tous ses biens declairez estre a nous acquis, forfait et confisque, et par vertu de ladicte sentence et pour icele mettre a execucion a esté mené au lieu publique de nostredicte ville de Rouen, où il eust miserablement finé ses jours se sur ce nostre grace et misericorde ne lui estoit par nostredit oncle impartie. . • Si donnons en mandement a nostredit bailli de Rouen ... Donné a Rouen, le xxviije jour d'aoust, l'an de grace mil cccc et vint sept et de nostre regne le cinquiesme. Ainsi signé : Par le Roy, a la relacion de mons. le Regent le royaume de France, duc de Bedford. J. Milet.

CLXXI. — Rouen, 31 août 1427.

Rémission à Alexandre de Berneval, maçon, inculpé de complicité avec Jean Salvart dans le complot ourdi par Richart Mittes pour livrer la ville de Rouen aux Français. (JJ 174, n. 29. fol. 10 verso.)

Henry, etc., Savoir faisons, etc., avoir esté exposé a nostre tres chier et tres amé oncle Jehan, regent nostre royaume de France, duc de Bedford, de la partie des parens et amis charnelz de Alixandre de Breneval, maçon, aagé de lx ans ou environ, chargé de femme et de cinq enfans, que, trois ans a ou environ, Jehan Salvart, maçon, dist audit Alixandre que un nommé Ricart Mites, compere dudit Salvart, lui avoit dit que il avoit oy dire que celui qui nagaires se appelloit daulphin, nostre adversaire, et nostre tres chier et tres amé oncle le duc de Bourgoigne estoient d'acord ensemble et avoient entencion de prendre nostre ville de Rouen. Desqueles paroles icelui Alixandre, qui est un tres simple homme, eust esté moult esmerveillié et courroucié et eust respondu sur ce audit Salvart ses paroles ou semblables : « Je ne croy point que les paroles que vous m'avez dictes soient véritables, ne il n'en est aucune apparence et ne sont que bourdes et frivoles ; aussi je n'en vueil point ouïr parler ne moy entremectre de teles choses, car au plaisir de Dieu, je garderay le serement que je ay fait au Roy mon souverain seigneur tant come je vivray ». Et atant se departirent lors l'un de avec l'autre sans plus parler de la matiere. Et depuis ledit Alixandre se trouva avec ledit Jehan Salvart où ils besongnoient ensemble en nostre chastel de Rouen, lequel Jehan Salvart recorda lesdictes paroles audit Alixandre qui n'en avoit plus aucune souvenance, et en fu tres fort courroucié. Et ainsi qu'ilz regardoient ledit chastel, ilz distrent entre eulx que c'estoit un tres bel chastel et seroit grant dommage de y faire mal et que ja jour de leur vie ne se entremectroient de teles choses, mais s'il advenoit que Dieu ne vouldist que nostredicte ville feust conquisee par force, comme autrefois avoit esté, et qu'ilz feussent contrains par la force de ceulx qui tendroient nostredicte ville, si ne sauroient ilz trouver maniere pour grever ledit chastel sinon par faire mines comme l'en avoit autrefois fait ou pour asseoir un canon pour abatre la herche ou le pont d'icelui chastel, n'est recors ledit Alixandre lequel ilz distrent. Et lors se departirent et alerent en leurs affaires. Et assez tost après, ledit Jehan Salvart monstra 'audit Alixandre une petite lettre ou cedula, de la largeur et longueur de deux doiz ou environ, et lui dist que ledit Ricart Mites

lui avoit bailliées. Lesqueles lettres icelui Alixandre ne pot lire pour ce qu'elles estoient trop menu escriptes et que, quant il lui souvint dudit Mites, il ot le sang tout esmeu et troublé, et par desplaisance les rompi et dessira et ne scet qu'ilz contenoient, et dist audit Jehan Salvart que sur toute l'amour qu'il avoit a lui jamais ne lui parlast de la besoingne. Esqueles choses ledit Alixandre ne pensoit a aucune mauvaistié, ne onques depuis ledit temps de trois ans ou environ il ne oy parler de ladicte besongne ne il n'a eu congnoissance du dampnable propos et mauvaise volenté que ledit Mites et ses complices ont puis nagaires voulu acomplir etcommectre. Et pour ce que ledit Alixandre n'a denoncé a nostre justice les choses dessusdictes ainsi par lui oyes, il a esté et encores est detenu prisonnier en nos prisons à Rouen, où il est en grant povreté et misere, et mesmement a l'occasion d'une grosse bosse qu'il a en une jambe, et si est malade de fievres et en dangier de briefment finer ses jours esdictes prisons .. . Si donnons en mandement a nostre bailli de Roen... Donné a Rouen, le derrenier jour d'aoust, l'an de grace mil quatre cens sept et de nostre regne le cinquiesme. Ainsi signé : Par le Roy a la relacion de mons. le Regent de France, duc de Bedford. J. Milet.

CLXXII — Paris, 6 septembre 1427.

Rémision à Etienne Drouin, de Family, qui, dénoncé aux Français par Etienne de la Roche, habitant de cette paroisse, a, pour se venger, révélé la cachette où ledit de la Roche avait déposé ses biens et a contribué la faire piller par des voleurs. (J J 1 74, n. 36, fol. i3 recto.)

Henry, etc., Savoir faisons, etc., nous avoir oye l'umble supplicacion de Estienne Drouyn, povre homme laboureur de braz, chargé de femme et de trois petiz enfans, demourant en la parroisse de Saint Jehan de Family, ou diocèse de Lisieux, aagé de trente ans ou environ, contenant que, quatre ans a ou environ, ledit suppliant fut prins par pluseurs foiz par noz adverseres et ennemis et mis la premiere foiz a soixante escuz d'or de raençon et de ce lui convint bailler pleige ; lequel lesdis ennemis emmenerent a la Ferté-Bernard, où ilz habitoient lors. Et depuis que il ot delivré sondit pleige de ladicte somme, fut prins de rechief de nosdis ennemis et mené prisonnier à Nogent le Retrou, où il fu detenu prisonnier par l'espace de sept sepmaines. Durant lequel temps il fu en la fosse par l'espace d'un mois, et lui firent endurer moult grant destresse de corps, comme froit, fain et autres tourmens, et lui convint paier tres grant raençon. En paiant lesqueles raençons, lesdis ennemis distrent audit suppliant et affermerent que ilz l'avoient prins a l'instance et pourchas de Estienne de la Roche, de ladicte parroisse de Family, et depuis l'ont dit a pluseurs autres personnes. Et tantost après, c'est assavoir environ trois ans et demi a, vint ung autre jeune homme, nommé Robin Marie, varlet servant a ung nommé Rogier Micousins, lors tenant le parti de nosdis ennemis, qui avoit austresfois demouré par l'espace de trois ans ou environ en ladicte parroisse de Family, comme varlet servant ou hamel où demeure ledit suppliant, passant par ladicte parroisse de Family trouva d'aventure ledit suppliant, car onques puis ne l'avoit veu que il s'en estoit alé hors du pais avec nosdis ennemis, et entre autres choses dist audit suppliant que il avoit oy dire qu'il avoit moult souffert de paine et tourment et soustenu moult de dommaiges et tout au pourchas dudit de la Roche. Et adonc ledit suppliant, recordant de ces tourmens, injures et dommaiges, croiant que tout lui eust esté fait par le pourchas dudit de la Roche, et considerant que audit de la Roche ne a autre n'avoit onques fait mal ne desloialté, et pour ce enflambé de tristesse et yre, encusa lors audit Robin une muce ou retrait, estant assez près d'iceulx lieux en la parroisse de la Halleboudiere, en laquele ledit de la Roche avoit retrait aucuns de ses biens, et lors se departi de lui ledit Robin et briefment après, lui et sondit maistre, auquel ledit suppliant paravant n'avoit aucune congnoissance, retournerent par devers ledit suppliant, afin qu'il les menast a ladicte muce. Lequel par courroux et desespoir, et pour soy vengier dudit de la Roche, lequel y reputoit son ennemi et tempté de l'ennemi, les mena lors a ladicte muce et y prindrent des biens audit de la Roche au dessoubz de la valeur de xij a xv 1. ou environ, desquelz biens onques n'en tourna riens au prouffit dudit suppliant, et s'en alerent et departirent ledit Micousin et sondit varlet, ne onques puis ledit suppliant ne les vit, jusques a ce que ledit Robin s'est venu rendre a nostre parti ; pour lequel cas icelui povre suppliant, doubtant rigueur de justice, s'est absenté du pais... Si donnons en mandement a nostre bailli de Rouen... Donné a Paris, le sixiesme jour du mois de septembre l'an de grace mil quatre cens et vingt sept et de nostre regne le quint. Seellées de nostre seel ordonné en l'absence du grant. Ainsi signé : Par le Conseil. Oger.

CLXXIII. — Paris, 10 septembre 1427.

Rémision à Pater Regnart, marchand de Caen, pour avoir mis en circulation de la fausse monnaie, qu'il avait reçue au retour d'un voyage en Flandre. (J J 174, n. 53, fol. 21 verso.)

Henry, etc., Savoir faisons, etc., nous avoir oye l'umble supplicacion des parens et amis charnelz de Pater Regnart, demourant a Caen, chargé de femme et de pluseurs petiz enfans, aagé de xxxv ans ou environ, contenant comme puis nagaires ledit Pater, qui est marchand frequentant les foires et marchiez de nostre royaume, feust parti de ladicte ville de Caen, et pour le fait de sadicte marchandise alé ou pais de Flandres, et en soy retournant dudit pais, qui a esté puis Pasques ença, eust par cas d'aventure trouvé en l'ostellerie

où il estoit logié deux hommes qui se disoient marchans et aler oudit pais de Flandres semblablement pour le fait de leur marchandise, lesquelz se disoient estre du pais du Maine. Et lui estant en ladicte hostellerie avec lesdiz deux hommes, qu'il ne congnoissoit et les cuidoit estre bons marchans, tira de sa bourse un salut d'or et le vult aler changier pour paier son hostesse de ce qu'il lui devoit pour sa despense ; mais ilz lui distrent qu'ilz avoient de la monnoie assez pour le lui changier et de l'autre et de fait lui changierent ledit salut. Et après ce, commencerent a dire qu'ilz avoient apporté de la monnoie de leur pais, qui les chargoit, et qu'ilz vouldroient bien trouver de l'or pour leurdicte monnoie. Et lors ledit Pater leur demanda a veoir d'icelle monnoie, qui lui monstrerent des blans bretons et deniers noirs forgiez a nostre coing. Et quant ledit suppliant les eut veues, leur demanda se lesdiz deniers estoient bons et de nostredit coing, qui lui disdrent que oyl et qu'ilz avoient esté forgiez en nostre monnoie du Mans, et veritablement sembloient ilz estre bons. Et après lesdictes paroles, leur demanda ledit suppliant combien ilz lui donneroient de ladicte monnoie pour ung cliquant de Flandres, et après aucunes paroles eues entre eulx, affermanz toujours ladicte monnoie estre bonne et de nostredit coing, lui distrent qu'ilz bailleroient xxx s. t. pour cliquant. Et finalement ledit Pater, cuidant icelle monnoie estre bonne, comme dessus est dit, leur vendi de sesdiz cliquans jusques a la valeur de xxx x l. t. de ladicte monnoie, dont il y avoit de ix x l. t. en bretons et le demourant esdiz deniers. De laquelle monnoie, assez tost après qu'il fu arrivé en ladicte ville de Caen, bailla une partie a Guillaume l'Orfevre, frere de sa femme, pour employer en marchandise de beurre ou autre, et l'autre a distribuer en ses affaires et besoignes, sans savoir que en icelle eust aucune mauvaistié, parce que lesdiz eulx disans marchans avoient affermé que c'estoit de ladicte forge du Mans, et en oultre dit qu'ilz eussent employée a Rouen en marchandise, se ce ne feust la haste qu'ilz avoient de aler a la foire de Bruges, qui pour lors se tenoit, en disant avec ce qu'ilz retourneroient dedans brief a ladicte ville de Caen. Neantmoins pour ce que on a voulu et veult dire que lesdiz deniers sont de monnoie contrefaite et y a mauvaistié, ledit Guillaume l'Orfevre a esté prins et emprisonné en noz prisons dudit lieu de Caen, où il est encores detenu et les biens d'icellui Pater prins et arreztez en nostre main... Si donnons en mandement aux bailli et viconte de Caen ... Donné a Paris, le x e jour de septembre, l'an de grace mil quatre cens et vint sept et de nostre regne le quint. Soubz nostre seel ordonné en l'absence du grant. Ainsi signé : Par le Conseil. J. Talence

CLXXIV. — Rouen, 13 septembre 1427.

Rémision à plusieurs habitants de Berjou, qui, pillés par des Anglais revenant du siège de Pontorson, se sont mis à leur poursuite, et, en assaillant une charrette où ils croyaient retrouver leurs biens, ont tué par mégarde un jeune enfant. (JJ 174, n. 19, fol. 7 verso.)

Henry, etc., Savoir faisons, etc., nous avoir receu la supplicacion de Jehan Salles, Gueren Hebert, Perrin Martin et Jovet le Bailli, povres jeunes hommes laboureurs, chargiés de femmes et d'enfans, contenant que, au temps que le siège de Pontorson derrain tenu par nostre tres chier et amé cousin le conte de Warrewik, aucuns gens d'armes dudit siège, Anglois et autres, en eulx retournant passerent par la parroissede Berjou, en la viconté de Condé, ou bailliage de Mortaing, et firent en ladicte parroisse plusieurs grans griefs, especialement en un hamel de ladicte parroisse, nommé le hamel de Coulon, dont sont lesdiz supplians, et ilec prindrent plusieurs biens appartenans ausdiz supplians, et iceulx biens emporterent et amenerent avec eulx plusieurs bestaulx et firent plusieurs autres maulx et outrages excessivement torçonnièrement, par manière de pillerie et roberie, contre le gré et volenté desdiz supplians. Lesquelz furent de ce tres grandement courrouciez et merris, pour ce que sans cause et sans raison on leur pilloit, tolloit et ostoit leurs biens, dont ils devoient vivre et gouverner eulx, leurs femmes et enfans. Et come gens cheuz en desesperacion, par temptacion de l'ennemi, partirent et se mistrent a heure d'une lieue de nuit ou environ, pour poursuir leurs biens et cuidans iceulx trouver et recouvrer. Et en cheminant iceulx supplians trouverent d'aventure une charrecte chargée de plusieurs biens, harnois et autres choses, estans en sacs et en pouches, qui estoient liez de cordes en la charrecte. Lesquelz supplians, cuidans qu'il y eust de leurs biens, assaillirent ceulx qui menoient et conduisoient ladicte charrecte, sans en touchier ou ferir aucun lors. Et en ce conflict et debat advint que ledit Jovet le Bailli, qui ne savoit riens, ne cuidoit point qu'il eust aucun enfant ou personne en ladicte charrecte, en coppant une des cordes ou lieues de quoy iceulx biens estoient liez en la charrecte, par cas de meschief et de fortune, et parce qu'il estoit nuit et que l'en n'y veoit comme gouste, frappa et bleça un enfant, natif du pais de Bretagne, qui estoit envelopé en une robe dedans la charrecte, de l'aage de viij a ix ans ou environ, un seul cop telement que mort s'en est ensuie. Et prindrent lesdiz supplians partie des biens qui estoient en la charrecte et les emporterent, en recompensacion des biens que l'en leur avoit tolez et ostez. Lesquelz biens ainsi prins en ladicte charrecte depuis lesdiz supplians ont renduz et restituez a Guillaume Haudain, Anglois, pour estre renduz et restituez audit Guillaume et a ses compaignons, a qui l'en disoit que iceulx biens estoient. Desquelz biens ledit Guillaume Haudain print les siens, et les autres, par son ordonnance et consentement, furent bailliez en garde en l'ostel des religieus d'Argenthen, pour estre renduz ausdiz compaignons ... Si donnons en mandement par ces mesmes presentes au bailli de (sic) et a tous noz autres justiciers et officiers... Donné a Rouen, le xij e

jour de septembre, l'an de grace mil cccc xxij et de nostre regne le quint. Ainsi signé : Par le Roy, a la relation du Conseil. J. MILBT.

CLXXV. — Paris, 15 septembre 1427.

Rémission à Etienne Guérard, qui, dans une taverne tenue à Thiberville par un Anglais, s'est pris de querelle avec une femme de mauvaise vie et l'a frappée mortellement d'un coup de couteau. (JJ 174, n. 58, fol. 23 verso.)

Henry, etc. Savoir faisons, etc., nous avoir receu L'umblé supplication des parens et amis charnelz de Estienne Guerard, filz Thomas Guerard, povre jeune homme vefve, chargé d'enfans, nagaires demourant en la parroisse de Saint-Taurin de Thiberville, en la viconté d'Orbec, ou balliage de Rouen, contenant comme, le lundi xvij me jour de decembre derrenierement passé ou environ, ledit Estienne Guerard, Thomas Lamperiere, de Saint Marc de Fresnes et Marion Piel de ladite parroisse de Thiberville, estans en l'ostel Denis le Chantre, d'icelle parroisse de Thiberville, où un certain Anglois par lui, ses gens et serviteurs faisoit fere et tenir taverne de vin, par amour et bonne compaignie, pour boire et fere bonne chiere, sans penser a aucun mal, feust survenue oudit hostel dudit Denis le Chantre et en ladite taverne Agnès, en son vivant vefve de feu Mahieu le Chantre, qui estoit de dissolue vie, petit estat et mauvais gouvernement, qui avoit esté concubinaire à plusieurs, dont elle disoit avoir trois enfans bastars, et qui avoit acoustumé d'avoir et tenir communement en sa maison une ou plusieurs fillecetes pour esbatre les compaignons, et mesmement s'estoit esbatue plusieurs foiz avec et en la compaignie dudit Estienne Guerard, comme il est voix et commune renommée. Laquelle Agnès, aussi comme toute esmeue, eschauffée ou yvresse ou autrement, meue de mauvaise volenté et felon courage, eust adrecé son regard et sa parolle envers ledit Estienne Guerard, qui ne disoit lors riens a icelle Agnès et ne pensoit a aucun mal, mais faisoit bonne chiere avec ceulx de sa compaignie ; et eust dit icelle Agnès audit Estienne Guerard ces paroles ou semblables en substance : « Estienne Guerard, truant, houllier que tu es, il est temps que tu t'en viengnes ; se tu ne t'en viens, je t'en feray bien venir ». A quoy respondi ledit Estienne Guerard en effect : « Par l'ame de mon père, je ne m'en yray ja pour toy ; je ne despens rien du tien ». Oye laquele response, ladite Angnès, en perseverant en son mauvais courage et propos, dist audit Estienne Guerard : « Si feras maintenant, tu t'en venras ». Et se aproucha icelle Agnès dudit Estienne Guerard et de fait mist la main a lui et a sa robe, et lui donna deux ou trois coups du poing sur la teste et en plusieurs parties de son corps, et tant que pour les paroles, injures et vilennies que faisoit icelle Agnès, il convint que icelui Estienne Guerard se levast de la table où il estoit assis, pour cuider evader et résister aux noises et entreprises d'icelle Agnès. Laquele Agnès, voyant ledit Estienne Guerard levé sus de ladite table, se print au corps dudit Estienne, et ledit Estienne a icelle Agnès, et se entreprirent et tindrent tellement que ladite Agnès se escouy dudit Estienne et le gecta ou bouta contre un degré. Lequel Estienne se redreça et s'en ala seoir derechief a ladite table ; et lui estant a ladite table et soy sentant ainsi injurié et vilenné par icelle Agnès, corne tout courroucié, dist a icelle Agnès ces paroles en effect : « Agnès, ne te aprouches mais huy de moy, car par Dieu et par l'ame de mon père, se tu te aprouches mais huy pour moy ferir, injurier ou faire aucun mal, je te donneray du coustel parmy le corps ». A quoy respondi ladite Agnès ces paroles en effect : « Par la sainte vertu de Dieu, je ne te crains riens, ne toy ne ton coustel, et te promet que je te feray destruire ou destruiray du corps ou des biens ». Et en disant ces paroles ou assez tost après, ladite Agnès, en perseverant en sa fureur et en son mauvais courage et propos, s'accoursa sur et a l'encontre dudit Estienne Guerard et lui donna un coup de poing sur la teste ou sur son corps. Et en ce conflict ledit Estienne Guerard, moult courroucié, par temptacion de l'ennemi, et comme marry des injures et vilennies que lui faisoit icelle Agnès, et en soy defendant d'elle, tira son coustel en le mectant au devant et entre eulx deux, et en donna un seul coup ou corps et ou ventre d'icelle Agnès, laquele Agnès par ce moien, le lendemain qui fu jour de mardi, ala de vie a trespas. Pour occasion duquel fait et cas dessusdit, ledit Estienne Guerard... pour doubte de rigueur de justice, s'est absenté du pais... [Ledit Etienne sera puni civilement, tiendra prison fermée deux mois au pain et a l'eau et paiera à l'Hôtel-Dieu dix livres parisis.] Si donnons en mandement aux bailliz de Rouen, Caux, Evreux et Caen... Donné a Paris, le XV e jour de septembre, l'an de grace mil quatre cens et vint sept et de nostre regne le quint. Ainsi signé : Par le Conseil. G. Ferrebouc.

CLXXVI. — Paris, 19 septembre 1427.

Rémission à Simon Broutin, de Tillières-sur-Avre, qui s'est pris de querelle avec un de ses voisins, nommé Jean le Couturier, à propos d'un furet que ce dernier refusait de lui rendre, et l'a frappé mortellement d'un coup d'épieu. (JJ 174, n. 68, fol. 28 verso.)

Henry, etc., Savoir faisons, etc., nous avoir receue l'umblé supplication des parens et amis cbarnelz de Simon Broutin, aagé de xl ans ou environ, natif de la Boulaye, en la parroisse de Revercourt en la chastelenie de Bruroles ou diocese de Chartres, chargé de femme et trois petiz enfans, contenant comme,

le lundi xje jour d'aoust nagaires passé, environ trois heures après midi, ledit suppliant, qui lors demouroit en la ville de Tilleries, en nostre duchié de Normandie, ou bailliage d'Evreux, estant dessoubz le porche de la maison où il demouroit, où il faisoit des liens pour lier gerbes, sans penser a autres choses, se feust venu et comparu devant lui un sien voisin, nommé Jehan le Cousturier, auquel ledit suppliant eust dit teles paroles ou semblables en substance : « Mon voisin, Thibault d'Acon, escuier, a nagaires esté devers monsieur de Blandé savoir s'il vous avoit donné une furecte, pour ce que pluseurs foiz vous avez dit audit Thibault et a moy que ledit seigneur du Blondé vous avez (sic) donnée celle que vous avez. Et toutes voies icelui seigneur de Blandé lui a dit que onques en sa vie ne vous donna furecte. Par quoy il est advis audit Thibault que ladicte furecte que vous avez a present est la sienne, et que c'est proprement celle c qu'il me bailla pour fere saillir a mon furet ou mois de mars derrenierement passé et laquele furecte je vous baillay après ce que mon furet l'ot saillie, et me baillastes la vostre pour mecre avecques mondit furet. Laquele furecte il m'a depuis demandée et demande toutes les foiz qu'il me voit. Et vous vous estes excusé et excusez en disant audit Thibault et a moy que pour lors que la Hire, capitaine de gens d'armes tenant le parti de noz ennemis, estoit passé a grant compaignie de noz ennemis par ceste ville de Tilleres, en alant devant la ville de Rouen, aucuns des gens dudit la Hire vous avoient ostée ladicte furecte. Et ledit Thibault apperçoit bienque la furecte que vous avez est sienne, veu que ledit seigneur de Blandé ne la vous a point baillée ; et dit icelui Thibault que vous la lui celez et detenez par mauvetié et que l'excusacion que vous lui avez dicte n'est pas bonne. Ainçois lui avez donné mal a entendre, mesmement que ledit seigneur de Blandé tesmoingne et certiffie que onques ne vous donna furecte; et vous supplie que la lui baillez et rendez et que vous m'en faciez avoir paix a lui, en tant qu'il la me demande et que je la vous ay baillée. Et se vous ou moy en ayons a fere d'une, nous en tinerons assez par le moien de noz amis. » A quoy ledit Jehan le Cousturier respondi audit suppliant teles paroles ou en substance : « La furecte que j'ay ne fut onques audit Thibault, et la m'a baillée mon frere Perrin Guichart. » Et lors icelui suppliant dist audit le Cousturier de rechief par bonne amour telz motz : « Mon voisin, je vous supplie que pour une furecte ledit Thibault ne soit point mal content de nous, et que vous ne prenez point de guerre a lui ; car vous et moy n'avons que fere d'avoir debat a icelui Thibault, et je suis bien certain, s'il la vous treuve, et il est le plus fort, qu'il la vous ostera. Et sachiez pour tout vray que aussi feroie je moy mesmes, se je la vous voy tenir, on a aucun de voz gens, veu que je suis fort pressé de la rendre et que vous la detenez sans cause. » Par lequel Jehan le Cousturier fut dit audit suppliant en tele manière : « La furecte que j'ay ne fu onques audit Thibault et ne l'aura point ; ne onques icelui Thibault ne vous ne feustez si hardiz, ne voz mères ne porterent onques si hardiz enfans, que vous ne lui la mosissiés oster, non pas tant seulement un des plus petiz peulz de ma robe par mal talent, et vueil bien que vous sachiez que je feray si bien votre besongne a monsieur de Tilleries que vous le appercevrez et que vous ne serez pas assez hardi de vous veoir devant lui. » A quoy ledit suppliant respondi qu'il faisoit mal de le menacier dudit seigneur de Tilleres. Et ledit Cousturier, en continuant en rigoureuses paroles, dist a icelui suppliant qu'il avoit prins, vendu et fait mourir trois mil, voire quatre, des connins dudit seigneur de Tilleres et qu'ilz lui avoient valu cent livres, voire cent escuz d'or, dont il rendroit compte une foiz. Et lors icelui suppliant, soy veant ainsi injurié sans cause et contre raison a cause de larrecin par ledit Cousturier, lui dist comme eschauffé qu'il mentoit, et que onques n'avoit vendu aucuns connins et que ledit Cousturier le savoit bien, et toutes les gens du pais et si n'avoit esté puis quaresme prenant aux connins, sinon deux foiz avec et en la compaignie dudit Cousturier, et que lors qu'il y avoit esté ce avoit esté pour ledit seigneur de Tilleres mesmes, en disant a icelui Cousturier, qu'il faisoit mal de lui en donner charge et blasme. Sur quoy icelui Cousturier respondi telz moz audit suppliant : « Ne te chaille je te feray bien ta besongne ». Après laquele parole, ledit suppliant lui pria qu'il lui vouldist bailler son furet. Et lors icelui Cousturier lui dist qu'il le alast querir avec lui. Lequel suppliant y ala, et alerent jusques a l'uis de l'ostel d'icelui Cousturier. Et eulx estant audit huis, icelui Cousturier, qui estoit chargé de vin, dist a icelui suppliant, qui pareillement avoit fort beu, telz motz : « N'entre point en ma maison, je renie Dieu, se tu y entres, je te fendray la teste de ceste hache que je tiens ! » Par lequel suppliant fu respondu que ledit Cousturier lui baillast et rendist son furet et le laissast en paix. Et lors icelui Jehan le Cousturier gecta audit suppliant sondit furet par terre dehors l'uis de sa maison. Lequel suppliant print sondit furet, et incontinant le porta en sa maison. Et ainsi qu'il s'en aloit et portoit ledit furet, ledit Jehan le Cousturier et sa femme, esmeux et plains de l'ennemy, issirent de leur maison et suivirent ledit suppliant, en lui disant tres malgracieuses paroles et injurieuses, et l'appelerent faulx traicte, larron, robeur de ses voisins. Et en proferant par lesdiz Cousturier et sa femme lesdictes paroles, icelui Cousturier print deux pierres en ses deux mains, et alerent lui et sa femme après ledit suppliant jusques près du porche de la maison où il demouroit. Lequel suppliant, soy veant ainsi injurié et precipité, et estant fort esmeu, desplaisant et eschauffé desdictes injures, et non sachant que fere ne que dire, print un espié en sa main, et yssi de sa maison, et demanda ausdiz Cousturier et sa femme pour quoy ilz le injurioient ainsi et que ledit Cousturier pourroit bien tant fere qu'il auroit aucune chose. Et lors icelui Cousturier, non content et en perseverant de mal en pis, commança à appeller ledit suppliant faulx traicte, larron, et que avant qu'il feust un an il yroit en la maison d'icelui suppliant, et lui osteroit et prendroit devant soy mesmes son harnois a chacer aux connins avec son furet, et si n'oseroit pas dire que ce feust mal fait. Sur quoy et pluseurs paroles entre eulx, entre lesquelles ledit Cousturier dist audit suppliant qu'il avoit un frere pendu a

Evreux et l'autre tué à Conches, et qu'il les alast querir. Et encores en disant lesdictes paroles, ledit Cousturier appela ledit suppliant faulx traicte, larron, en disant fi de lui. Et lors ledit suppliant, ainsi actainné et precipité, aproucha dudit Cousturier et le fery du trenchant de son espie sur la teste un cop, duquel icelui Cousturier chey a terre, et encores lui donna un autre cop sur le braz du manche dudit espie, duquel coup ou cops, xiiij jours ou environ après, icelui Cousturier ala de vie a trespas. Pour occasion duquel cas icelui suppliant... s'est parti et absenté du pais... Si donnons en mandement par ces mesmes presentes aux bailli d'Evreux et viconte dudit lieu... Donné a Paris, le xix e jour de septembre, l'an de grace mil quatre cens et vint sept et de nostre regne le quint. Scellés de nostre seel ordonné en l'absence du grant. Ainsi signé : Par le Conseil. Chembaut.

CLXXVII. — Paris, septembre 1427.

Rémission à Guillaume le Mire, écuyer, pour avoir tué d'un coup de vouge, lors de la représentation d'un mystère à Fauguernon, un certain Roger Christofle, ancien brigand, auquel il reprochait la mort de son père, (JJ 174, n. 67, fol. 28 recto.)

Henry, etc., Savoir faisons, etc., nous avoir receu l'umble supplicacion de Guillaume Le Mire, escuier, et extrait de noble lignée, jeune homme de vint ans ou environ, clerc non marié, nostre homme lige et subject, demourant en nostre pais et duchié de Normandie, contenant que, comme après la descente oudit pais de feu nostre tres chier seigneur et pere le Roy d'Angleterre, cui Dieu pardoint, un appelé Rogier Ghristofle, charpentier, après ce qu'il se fu tenu par long temps en l'obeissance de nostredit feu père et de nous et qu'il fu abulleté et eut fait le serement en tel cas acoustumé, lui demourant en plat pais se feust departi hors d'icelle nostre obeissance et s'en feust alé rendre brigant, adherant, complice et alié des ennemis et adverseres de nostredit feu pere et de nous, avec lesquelz il eust longuement esté et frequenté tenant les bois et par lui ou ses complices ou aliez eussent esté faiz plusieurs maulx innumerables et fu icelui Christofle, comme l'en dit, en la parroisse de Livet près Lisieux, où il y eut mors vint hommes. Et par especial ycelui Christofle et ceux de sa compaignie pendant icelui temps feussent venuz de nuit en l'ostel du pere dudit suppliant et par force de fraccion de huis et de fenestres et qui s'efforçoient de bouter le feu oudit hostel, feussent entrez en icelui, où fu trouvé ledit pere d'icelui suppliant, lors aagé de lxxviiij ans ou environ, qui de sa puissance et possibilité se feust defendu, et telement que en ce faisait fu feru et navré d'une lance, mais a la parfin il fu menez par lesdis brigans es bois. Et en ce faisant prindrent et emporterent de ses biens jusques a la valeur de cent livres tournoiz et plus. Et entre les mains desquelz a finé piteusement ses jours, telement que depuis ladicte prinse sa femme, qui demoura chargée dudit suppliant son filz et d'autres sept enfans, ne leurs autres amis n'ont peu avoir aucunes nouvelles ou congnoissance de lui. Et soit ainsi que, long temps après ou au moins depuis ladicte dampnable prise dudit pere d'icelui suppliant, ledit Christofle s'en soit retourné en nostre obeissance et en nostredit pais de Normandie, ledit suppliant ne scet par quele maniere ne comment, et ilec se soit tenu long temps sans ce qu'il soit venu a amandement devers ledit suppliant ne autres amis de sondit feu pere, ainçois se soit tousjours porté rigoureux contre eulx, nonobstant sadicte faulte et ce que dit est, et telement qu'il est avvenu que, a un jour de dimenche environ la saint Jehan derrenierement passée, que ledit suppliant s'estoit disposé de jouer un personnage d'un mistere ou d'un jeu de saint, qui estoit ordonné estre joué au Fauguernon, près ou en la parroisse de Moiaude (2), ledit Christofle estant ilec osta le chapperon a un prestre, qui aussi là estoit, disant qu'il paierait le vin pour le fait d'icelui mistere. Et lors icelui suppliant dist audit Christofle qu'il laissast le chapperon dudit prestre et qu'il avoit contenté et paié ledit vin qu'il lui demandoit. Lequel Christofle lui respondi qu'il n'en feroit riens et que tant plus en parleroit moins en feroit. Et pour ce icelui suppliant, veant l'oultrage ou haultaineté d'icelui Christofle et lui remambrant ou souvenant de la mort de sondit feu pere, qui ainsi piteusement avoit esté emmené par ledit Christofle et ses complices brigans, comme est dit, lui respondi que ce n'estoit pas le premier desplaisir qu'il lui avoit fait et qu'il avoit tué et murtry son pere. Dont se meurent grosses et rigoureuses paroles entre eulx. Et icelui suppliant, esmeu ou courroucié, d'un vouge ou faucillon long emmanché, qu'il print ou trouva près de lui, frappa ledit Christofle un cop par dessus les espauls ou par la teste et un autre cop ou horion par la jambe, dont ledit Christofle dix jours après ou environ soit alez de vie a trespasement... Si donnons en mandement par ces presentes a nostre bailli de Rouen... Donné a Paris, ou mois de septembre, l'an de grace mil quatre cens et vint sept et de nostre regne le quint. Scellées de nostre seel ordonné en l'absence du grant. Ainsi signé : Par le Conseil. G. de Marc.

CLXXVIII. — Paris, 23 octobre 1427.

Rémission à Jean Feuillet, écuyer, pour le meurtre de Jean Chrétien, qu'il a rencontré un soir sur la route d'Aunou-le-Faucon à Argentan et avec lequel il s'est battu sans le connaître, le prenant pour un brigand. (JJ 174, n. 79, fol. 33 verso.)

Henry, etc., Savoir faisons, etc., nous avoir receu supplicacion des parens et amis charnelz de Jehan Feullet, escuier, aagé de trente a trente un an ou environ, contenant comme, le dimenche veille de la feste Nostre Dame en septembre derrain passé, ledit Jehan se feust parti de la ville de Faloise, en la compaignie de nostre amé et feal Robert Congnier, chevalier, capitaine dudit lieu de Faloise et lieuutenant de nostre tres chier et amé cousin le conte de Salisbury, et d'autres pour aler a Aunou le Foucon veoir la femme du baillif d'Alençon, auquel lieu il eust convoié ledit lieutenant, et ledit jour s'en retourna a Argenten et ylec coucha. Et le landemain, qui fu ladicte feste Nostre Dame, feust retourné par devers ledit lieutenant, avecques lequel il eust esté jusques environ jour faillant, a laquele heure se parti tout seul, monté sur son cheval et s'en retourna audit lieu d'Argenten en entencion de soupper avec le capitaine dudit lieu d'Aunou. Et il soit ainsi que en son chemin ledit Jehan eust raencontré un homme a pié qui ne congnoissoit, et pour le breullat qu'il faisoit lors le povoit a peine veoir, auquel il eust demandé dont il venoit, qui lui eust respondu bien arrogamment qu'il venoit dudit lieu d'Argenten. Et aussi lui eust demandé ledit homme, qu'il a depuis oy nommer Jehan Chrestien, dont il venoit, qui lui eust dit qu'il n'en avoit que fere, et ce dit eust ledit Chrestien dit ces paroles ou semblables en substance : « Je regnie saint George, vous demourez », en prenant ledit Feullet par la jambe pour le vouloir fere cheoir a terre de dessus sondit cheval. Pour laquele cause ledit Feullet, doubtant ledit Chrestien et que ce ne feust un brigant, feust descendu hastivement et eust laissé aler sondit cheval aval les champs, et s'entreprendrent l'un a l'autre au corps et tellement se meslerent ensemble que ledit Chrestien en prenant ledit Feullet par son espée lui eust rompu la sainture d'icelle. Laquele chose veant icelui Feullet, et pour doubte que ledit Chrestien ne lui ostast ladicte espée et l'en frapast, eust sachée icelle espée, et ainsi qu'ilz s'entretenoient, feust icelui Chrestien cheu a terre, et en ceste chaude cole et fureur lui eust ledit Feullet donné du pommel de ladicte espée sur la teste et le laissé en ladicte place, et après se parti et ala après sondit cheval, et sondit cheval recouvré ala couchier audit lieu d'Argenten. A l'occasion de laquele bateure et parce que icelui Jehan Chrestien ne fu pas lors visité ne appareillié, et aussi qu'il fu et a esté petitement gouverné ou autrement, le mardi après ensuivant ou environ, ala de vie a trespassement. Et ja soit ce que depuis ce icelui Feullet ait fait satisfacion a partie et que audevant dudit cas advenu entre lui et ledit Chrestien n'eust aucune haine ne malivolence et ne pensast aucunement a lui quant il s'en aloit sondit chemin, neantmoins il, doubtant rigueur de justice, s'est aucunement desfouy et absenté dudit pais... Si donnons en mandement aux bailliz de Caen et Alençon... Donnés a Paris, le xxiiij e jour d'octobre, l'an de grace mil quatre cens et vint sept et de nostre regne le sixiesme. Ainsi signé : Par le Roy, a la relacion du Conseil. Oger.

CLXXVIII*. — Paris, 14 novembre 1427.

Rémision à Jean Soulas, de la Haye-Pesnel, pour le meurtre de Jean le Badet, son voisin, dont la femme voulait l'empêcher de ramasser des pommes tombées sur son héritage. (JJ 1 74, n. 89, fol. 3y verso.)

Henry, etc., Savoir faisons, etc., nous avoir oye l'umblé supplicacion de Jehan Soulas, povre homme laboureur de braz, aagé de xlv ans ou environ, chargé de femme et de plusieurs petiz enfans, demourant en la parroisse de la Haye-Paynel, ou diocèse de Coustances, en la viconté et bailliage de Saint Sauveur Lendelin contenant comme, le vendredi xxvj e jour de septembre derrenierement passé, ledit suppliant feust venu sur son heritage pour cueillir des pommes d'un pommier pendant sur l'heritage de Jehan le Badet; et ce pendant y vint Guillemete, femme dudit Badet, demourant en ladicte parroisse, en lui disant : « Laissez a cueillir ces pommes, elles sont nostres, car le pommier n'est pas vostre ne n'y avez riens, combien que les pommes soient cheutes sur vostre heritage, l'arbre est en mon heritage. » Et lors ploya son giron et commença ladicte femme a cueillir lesdictes pommes, et tant que icelui suppliant se tray par devers elle et la frappa du poing ; par quoy elle se recula bien loing. Et là estoit une jeune femme, fille dudit Badet et de ladicte Guillemete qui commença a crier haro. Et apres icelui cri de haro vindrent icelui Jehan Badet, mary de ladicte femme, acompaignié de son filz et une autre fille qui avoient en leurs mains chascun une fourche de bois, lesquelz vindrent courir sus audit suppliant et le commancerent a batre de toute leur puissance. Et quant ledit suppliant vit ce, print un baston de haie pour soy defendre et tant que de fait en son corps defendant frappa icelui Jehan le Badet sur la teste, tant qu'il y eust sang et plaie. Et après ce ledit Badet se parti de là, menassant fort icelui suppliant, et s'en retourna en sa maison où il se fist couchier. Neantmoins a l'occasion dudit cop et par ce qu'il ne fu pas tost ne incontinant appareillié ou autrement, ne vesqui après que deux ou trois jours qu'il trespasa et mourut... Si donnons en mandement au bailli de Coustantin... Donnés a Paris, le xiiij e jour du mois de novembre, l'an de grace mil quatre cens et vint sept et de nostre regne le sixiesme. Ainsi signé : Par le Conseil. Greslé.

CLXXVIII**. — Paris, 14 février 1428 (n. s.).

Rémision à Wautier Fitz Wautier, chevalier anglais, inculpé de complicité dans le meurtre d'un homme d'armes de la garnison de Saint-Sauveur, accusé aussi du viol d'une jeune fille et de plusieurs excès au

préjudice des bonnes gens du Cotentin, et convaincu, de désobéissance pour avoir livré aux Français la forteresse de Saint-Laurent-des-Mortiers, en Anjou, dont il était capitaine. (JJ 174, 11. 1 14, fol. 47 verso.)

Henri, etc., Savoir faisons, etc., nous avoir receu l'umble supplicacion de nostre amé et feal chevalier Wauter filz Wauter, contenant que, pour ce que, ou mois de janvier mil quatre cens vingt six ou environ, un des gens dudit suppliant nommé Guillaume Avant, eust beu en une taverne avec un nommé Foskyn, et après ce qu'ilz orent beu et mengié ensemble, paroles se meurent entre eulx, et telement que ledit Foskyn donna une buffe audit Guillaume, qui incontenant s'en vint au lieu de la Haie du Puis, distant d'ilec a une lieue, et se complaigny audit suppliant de ce que ledit Foskyn l'avoit ainsi batu. Et adonques se partirent incontenant en la compagnie dudit suppliant jusques au nombre de xl gentilz hommes et archiers; lesquelz, pour l'injure que avoit faicte ledit Foskyn audit Guillaume, se transporterent au lieu de Saint-Sauveur, où estoit demourant ledit Foskyn, et batirent et navrerent aucuns de ceulz dudit lieu de Saint-Sauveur. Et entre les autres advint que ledit Guillaume Avant rancontra un nommé Thomas Moreau, compaignon dudit Foskyn qui l'avoit ainsi feru, auquel Thomas Moreau il donna trois ou quatre cops d'espée, dont mort s'en est ensuie en la personne dudit Thomas Moreau. Et avec ce, a l'occasion de ce que icelui suppliant print ou detint ou fist prendre et detenir une jeune fille nommée Henrie contre sa volenté, laquelle il viola ; pour ce aussi qu'il a fait ou pais de Coustantin pluseurs extorcions a pluseurs personnes et souffert ses gens pillier et desrober pluseurs de noz subgiez, qu'il ne sauroit dire ne declairer, et en oultre pour la desobeissance par lui et ses gens faicte aux gens, officiers, lettres, mandemens patens de nostre tres chier et tres amé oncle Jehan, regent nostre royaume de France duc de Bedford, de non rendre et delivrer la place de Saint Laurens des Mortiers, lors tenue par les gens dudit suppliant, contre la volenté de nostredit oncle, icelui suppliant ait esté arresté et detenu prisonnier en nostre ville de Paris, où il est en aventure d'estre longuement et despendre ses biens et sa chevance et de entrer en grant dangier de justice a l'occasion desdis cas... Si donnons en mandement par ces presentes a noz amez et feaulx les gens de nostre Grant Conseil en France, les gens de nostre Parlement a Paris, de nostre eschequier en Normandie, aux prevost de Paris, bailliz de Rouen, Caen et Coustantin... Donné a Paris, le xiiije jour de fevrier, l'an de grace mil quatre cens et vint sept et de nostre regne le sixiesme. Sigillata de expresso mandato domini Regentis. Signé : Par le Roy, a la relacion de mons. le Regent duc de Bedford. J. de Rinel.

CLXXVIII***. — Paris, 3 mars 1428 (n. s.).

Rémision à Perrin du Bois, d' Aveny, serviteur de Philippot le Moine, qui est allé dans le pays de Sées en compagnie de son maître et d'un certain Jean le Queux, et s'est rendu complice d'un vol de trois juments commis au préjudice des gens de Marmouillé et d'Almenèches. (JJ 174, n. 117, fol. 48 verso.)

Henry, etc., Savoir faisons, etc., nous avoir receu l'umble supplicacion de Perrin du Bois, povre homme laboureur de charue, demourant a Aveny ou bailliage de Gisors, contenant que, des xvij ans a ou environ, lui estant jeune enfant, il vint demourer audit Aveny avec un sien oncle nommé Mahiet Farouale, lequel oncle il servy par l'espace de dix ans ou environ. Et après, pour ce que la mere et une suer dudit suppliant y vindrent aussi demourer, il se parti d'avec sondit oncle et ala demourer avec sesdictes mere et suer par aucun temps, et jusques a ce qu'il eut mariée icelle suer, que pour ce qu'il avoit grant famine ou pais, il s'en ala demourer a Marmouillé près de Seez en Normandie trois ans ou service d'un nommé Philippot le Moine, et après s'en retourna demourer audit Aveny ou service d'un nommé Perrin Morain, qu'il servy par l'espace d'un an et demi ou environ. Pendant lequel temps ledit Morain bailla et laissa la ferme qu'il tenoit audit Philippot le Moine, qui estoit venu demourer audit Aveny. Pour quoy ledit suppliant, en continuant le labour d'icelle ferme, demoura avecques icelui Philippot. Et assez tost après, c'est assavoir la veille de Noel derrain passé, un appellé Jehan le Queux, qui se disoit estre du pais ou de la congnoissance dudit Philippot, maistre dudit suppliant, vint audit Aveny et se loga en l'ostel d'icelui Philippot, où il fu par trois jours ou environ. Durant lequel temps que ledit Jehan le Queux fu oudit hostel, il ne cessa de exhorter ledit Philippot qu'il alast avec lui audit lieu de Marmouillé et a Demelesche pres d'icelui lieu de Marmouillé, lesquelz lieux de Marmouillé et d'Amelesche sont distans dudit lieu d'Aveny de trente lieues ou environ, pour savoir, si comme disoit icelui Jehan le Queux, s'ilz y trouveroient un homme nommé Jehan Michiel, qui de long temps devoit argent a icelui Philippot et audit suppliant, et tant le pressa qu'il se accorda de y aler. Et partirent ensemble le dimenche ensuivant ledit Noel dudit lieu d'Aveny et avec eulx ledit suppliant, serviteur d'icelui Philippot, qui avant qu'ilz parteissent dist pluseurs fois a sondit maistre qu'il n'y vouloit point aler pour ce qu'il n'avoit point d'argent et que une autre foiz il feroit plus seur y aler et qu'il auroit plus d'argent, il yroit querir son paiement de ce que on lui devoit ou pays. A quoy lesdis Philippot et Jehan le Queux lui respondirent qu'il convenoit qu'il y alast, et ilz paieroient ses despens, et que aussi bien ne feroit il riens durans les festes dudit Noel, en lui disant oultre teles paroles ou semblables : « Tu dois servir ton maistre, nous acheterons du bestail, tu nous aideras a le amener. » Pour lesqueles paroles icelui

suppliant, cuidant bien faire, pour obeir a sondit maistre, y ala avec eulx. Et le jour de l'an ensuivant, au soir, arriverent audit Marmoillé où demouroit ledit Jehan Michiel, debteur desdis Philippot et suppliant. Et quant ilz furent près de l'ostel d'icelui Jehan Michiel, ledit Jehan le Queux fist arrester lesdis Philippot et suppliant es jardins, pendant ce qu'il yroit et que de fait il ala escouter a l'uis d'icelui Michiel, où il oy qu'il y avoit gens d'armes anglois logiez. Si retourna audit Philippot et lui dist qu'il ne faisoit pas bon aler en icelui hostel pour doubte desdictes gens d'armes. Et ce fait, iceulx Jehan le Queux et Philippot parlerent et conseillierent ensemble a part, et leur oy ledit suppliant dire que ce seroit grant faulte a eulx d'estre venuz de si loing sans riens fere, et que ledit Jehan le Queux savoit bien où ilz auroient en ladicte ville une jument. Et de fait se partirent d'ilec iceulx Philippot et Jehan le Queux, delaissié ledit suppliant esdis jardins, auquel tantost après ilz amenerent une jument, en lui disant : « Tien, garde cecy. » Et d'ilec s'en alerent tous ensemble jusques es jardins de ladicte ville d'Amelesche, joingnant de la parroisse dudit Marmoillé. Esquelz jardins ilz firent actendre ledit suppliant jusques à ce qu'ilz eussent esté et que de fait ilz furent en icele ville d'Amelesche, dont tantost après ilz retournerent sur deux autres jumens et firent icelui suppliant monter sur celle que baillée lui avoient a garder. Et en retournant dudit pays chevaucherent toute la nuit, et au matin du lendemain arriverent en une ville nommée Montereul, distant d'ilec de huit lieues ou environ, où ils se logerent pour desjeuner et repaistre. Et lors ledit suppliant pensa en soy mesmes que ou fait desdis Philippot et Jehan le Queux avoit mal, et doubta par les conjectures qu'il avoit vues, qu'ilz eussent emblé lesdictes jumens. Et pour ce se delibera de laisser et de fait laissa leur compaignie, en disant a icelui Philippot, son maistre, teles paroles ou semblables : « Mon maistre, vous creez Jehan le Queux ; il me semble que ce n'est pas bien fait, et ne vueil plus estre avec vous. Adieu vous dy et vous laisse la jument que vous m'avez baillée ! » Et de fait s'en vint de pié droit audit lieu d'Aveny. Et deux ou trois jours après, sondit maistre vint a icelui lieu d'Aveny sur l'une desdictes jumens ; lequel maistre avecques icelle jument furent suys et prins par justice. Et a depuis sceu ledit suppliant que après et incontinent qu'il se fu departi audit lieu de Montereul d'avec lesdis Philippot et Jehan le Queux, icelui Jehan le Queux, doubtant son larrecin estre decouvert, se destourna et laissa la jument qu'il avoit ilec amenée, laquelle et celle que ledit suppliant y avoit laissée furent depuis rendues a ceulx a qui elles avoient esté emblées, et que ledit Philippot s'estoit eschappé atout la sienne et avoit esté suivy et prins et icelle jument par lui amenée semblablement rendue a celui a qui elle avoit esté emblée. Et combien que onques ledit suppliant n'eust volenté de fere ne avoir fait lesdis larrecins et au temps d'iceulx en feust ignorant et ce qu'il faisoit feust en obeissant a sondit maistre, lequel il laissa incontinent qu'il s'en apperceut... et aussi aient esté et soient lesdictes jumens restituées a ceulx a qui elles estoient, ou larrecin desqueles il n'eust onques coulpe ne volenté, ce non obstant il s'est absenté du pays, où il n'oseroit bonnement retourner pour doubte de rigueur de justice... Si donnons en mandement par ces presentes au bailli de Rouen et des ressors et exemptions de Gisors Donné a Paris, le tiers jour de mars, l'an de grace mil quatre cens et vint sept et de nostre regne le sixiesme. Ainsi signé : Par le Roy, a la relacion du Conseil. Oger.

CLXXIX. — Paris, 2 avril 1428 (n. s.)

Rémission à Jean Regnault, de Pont-Farcy, qui, s'étant pris de querelle à un dîner de confrérie avec un certain Jean Guérin, l'a poursuivi jusque dans sa maison et, trompé par l'obscurité, a frappé un prêtre de ses parents, qui mourut quelque temps après des suites de ces coups, (JJ 174, n. 138, fol. 53 verso.)

Henry, etc., Savoir faisons, etc., a nous avoir esté humblement exposé de la partie de Jehan Regnault, povres homs de la parroisse du Pont Farcy, en la viconté de Vire, aagié de cinquante cinq ans ou environ, chargé de femme et de neuf enfans, que come le jour saint Jacques et saint Christofle derrenierement passé, après ce qu'il ot disné en la confrarie qui puis quatre ou cinq ans a esté mise sus en l'onneur et reverence de monsieur saint Jaques audit lieu du Pont Farcy, et ouquel disner qui fu fait en l'ostel du presbitere dudit lieu ot beu vin, qui est tres pou en usage ou pais, et a celle cause y fu faicte tres bonne chiere, et y ot pluseurs desdiz confraires qui burent dudit vin plus que de raison, et tant qu'ilz furent comme estourdz a cause dudit vin et de la noise qu'ilz faisoient en parlant et eulx resjoissans ensemble, pour ce que c'estoit le premier disner qui eust esté fait pour ladicte confrarie où eust esté beu vin, un nommé Jehan Guerin, l'un desdiz confreres, qui sans cause avoit conceu haine contre ledit Jehan Regnault pour certain procès qu'ilz avoient l'un contre l'autre, se feust adrecé contre ledit Jehan Regnault de mauvais et felon courage et tres arrogamment lui eust dit qu'il estoit faulx et traître. Et quant ledit Jehan Regnault, qui savoit et scet ledit Jehan Guerin estre noiseux et sedicieux et qui ne quiert que noises et riotes pour dommager autrui, le vit ainsi eschauffé et mal meu, il le cuida apaisier par doulces paroles, et lui pria qu'il ne se courrouçast pas, en lui remonstrant comment ilz estoient ylec assemblez pour l'onneur et reverence de Dieu et des sains de paradis et que pour Dieu ilz feissent bonne chiere ensemble sans eulx courroucier. Et neantmoins ledit Jehan Guerin, qui, comme dist est, estoit moult sedicieux et noiseux et qui ne queroit que noises, et est tel tenu et réputé de ceulx qui le congnoissoient, persevera plus fort que devant en ses mauvaises paroles et appella de rechief ledit Jehan Regnault traicte larron, sans y assigner quelque cause ou raison, aussi n'eust il sceu ne sauroit. Et pour ce ledit Jehan Regnault, courroucié, et non sans cause, de ce

qu'il se veoit ainsi injurier contre raison et en la presence de tous ceulx qui ylec estoient assemblez pour ladicte confrarie, dist audit Jehan Guerin qu'il avoit menti de ce qu'il disoit. Et après ce et que la femme et un des enfans dudit Jehan Regnault a ce presens le orent prins pour le emmener en son hostel, a ce que plus grand debat ne eust entre lui et icelui Jehan Guerin, ledit Jehan Guerin pour osterité (i) et comme plain de mauvais esperit, print ledit Jehan Regnault par derrière aux genitoires en le tirant et estraignant de toute sa puissance ; de quoy ledit Jehan Regnault ot tele angoisse qu'il ne povoit durer et fut contraint de s'escrier en disant : « Dieux, Dieux, je suis mort ! », et a tres grant peine se pot eschapper des mains dudit Guerin. Et ainsi que de rechief sadicte femme et filz, qui estoient chargiez de vin comme lui et les autres, le vouloient ramener en sa maison, icelui Guerin, perseverant de pis en pis, lui recouru sus et lui donna plusieurs cops de poing et le bati tres fort, tant qu'il lui convint appeler nostre aide et lever clamour de haro, et convint que pour obvier a la fureur et male volenté dudit Jehan Guerin, il s'en retourmast en sadicte maison, où il n'a que la longueur de quatre lances dudit presbiter. En laquele sa maison il trouva une hache, et tantost lui eschauffé et courroucié des injures et bateures qui faictes lui avoient esté dudit Guerin, s'en courut a l'ostel dudit Guerin, lequel est a moins du giet d'une pierre de l'ostel dudit Jehan Regnault, cuidant trouver icelui Guerin, et en icelui vit plusieurs gens qui buvoient en un celier, ouquel l'en ne voit pas clerement, et entra dedens, et là buvoit un sien parent et ami nommé Guillaume Quernel, prestre ; lequel, quant il vit ledit Jehan Renault qui se complaignoit dudit Guerin, se leva de la table et vint a l'encontre de lui espoir pour le refregner. Mais icelui Jehan Regnault, cuidant de prime face que ce feust ledi Guerin, son adversere, et qu'il lui venist courir sus, mist sa hache au devant et donna un seul coup audit prestre, qui estoit bien son ami et auquel il avoit fait beaucoup de biens, et incontinant après ledit Jehan Regnault fu prins et tres fort batu de piez et de poings par un appelé Colin de la Rue, qui avoit espousé la suer dudit feu Guillaume Quernel, et en le tenant et batant demandoit un coustel pour lui copper la gorge, et en tel estat le mist qu'il en fu et a esté tres longuement malade, et telement que on y esperoit plus la mort que la vie. Et atant s'en ala ledit Jehan Regnault, qui, quant il ot congnoissance qu'il avoit frappé ledit prestre, fut tres doulent et courroucié et se recula; et lors ledit prestre, qui estoit venu ylec boire pour soy reconforter, s'en ala couchier en l'ostel du curé ou chapelain de la ville, et fu emmené en son hostel a Sainte Marie d'oultre l'eau, a un quart de lieue ou environ pres dudit Pont Farcy, dont il estoit chapelain, , où il s'en ala de son pié, en esperance de sancté, et fu là longuement et tant que la plaie qu'il avoit eue dudit coup fut come ressanée et close et que on disoit tout communement qu'il estoit gary, et fu depuis a l'église et en plusieurs lieux come en taverne et autre part, où il fist tres bonne chiere. Or advint que l'espидemie courut au pais et si se gouverna mal de sa bouche ou autrement, et si vesquit environ xxxiiij jours, et en après mourut. Pour lequel cas ledit Jehan Regnault s'est absenté des lors du pais et rendu furtif... Pour reverence de la solennité qui se fait le jour d'uy de la benoite et sainte passion que nostre sauveur Jesu Christ receut pour nous racheter des peines d'enfer... Si donnons en mandement au bailli de Caen... Donné a Paris, le jour du benoit vendredi adouré, second jour d'avril, l'an de grace mil quatre cens et vint sept et de nostre regne le sixiesme. Ainsi signé : Es requestes tenues par mons. le Regent le royaume de France, duc de Bedford, esquesles vous le Premier President de Parlement et autres estiez. Oger.

(i) Ce mot est employé ici dans le sens, fréquent au Moyen-Age, de dureté, violence. V. Godbprot, Dictionn. de Vanc. langue française, VIII, 241 . On trouve également l'adjectif austereux : dur, cruel. (Ibid. I, 50a.)

CLXXIX*. — Paris, 2 avril 1428 (n.s.).

Rémission à Thomas Spreg, anglais, demeurant à Vernon, pour avoir, de complicité avec sa femme, tué et enterré dans son hôtel une chambrière qu'ils avaient à leur service. (JJ 174, n. 1 35, fol. 56 verso.)

Henry, etc., Savoir faisons, etc., nous avoir receu l'umblé supplicacion de Guillaume Spreg, natif de nostre pais d'Angleterre, contenant comme, environ le mois d'aoust l'an mil quatre cens vint cinq, ledit suppliant et Philippote la Rate, sa femme, natifve de Vernon sur Seine, qui pour lors demouroit audit lieu de Vernon, tant pour l'amour de Dieu et en charité come a cause de parenté, prindrent a nourrir et gouverner et pour toutes adventures pour le temps advenir louerent et retindrent a servante pour sept ans Guillemete la Polete, povre fille orpheline de pere, pour lors aagée de sept ans ou environ, parente de ladicte Philippote, parmi et moiennant ce que en la fin d'iceulx sept ans et pour cause que la mere de ladicte Guillemete estoit grandement chargée d'autres enfans, pour les services que ladicte Guillemete leur avoit faiz, ilz leur paieroient ou a sadicte mere sept escuz d'or. Or est advenu que pendant ledit temps ladicte Guille[me]te, qui petitement avoit esté et estoit endoctrinée et de petit chastoy et cremeur et de legiere volenté et laquele par plusieurs foiz s'estoit absentée et defuie de l'ostel dudit suppliant, une fois entre les autres environ le mois d'aoust, l'an mil quatre cens vingt six, ladicte Guillemete s'absenta de l'ostel dudit suppliant et s'en ala a un village nommé Saint Just, a une lieue ou environ loing dudit lieu de Vernon ; en adverti ledit suppliant tantost monta a cheval et ala audit lieu de Saint Just querir ladicte Guillemete. Et si tost qu'il l'ot trouvée et la tint par devers lui, il la fery d'une petite vergelecte sur la teste, telement que une petite bocetey leva et d'ilec la remmena en sondit hostel audit lieu de Vernon, ouquel avec lui et ladicte Philippote, sa

femme, soupperent deux de leurs voisins et leurs femmes, presente ladicte Guillemecte, qui les servoit et bonne chiere. Et tantost après soupper, que ledit suppliant fu couchié et endormi en son lit, ladicte Philippote, qui pareillement s'aloit couchier, demanda a ladicte Guillemete pour quoy sans congié elle s'en estoit alée et absente, et aloit et absentoit si souvent, et en disant ces paroles lui donna de sa main une buffe telement qu'elle cheut a terre, et non contente de ce par meschief d'avanture et par temptacion de l'ennemi la fery du bout du pié par le costé, dont mort se ensuy le ij e jour ensuivant en la personne d'icelle Guillemete. Laquele par simplece et ignorance et pour doubte de rigueur de justice, ledit suppliant et sa femme l'enterrerent en une maison en leurdit hostel, et tantost après d'ilec s'absenterent et alerent et vindrent tant a Rouen comme a Paris et ailleurs pour pourchassier leur remission et pour fere deterrer d'ilec icelle Guillemecte et la faire enterrer en terre sainte. Pendant lequel temps ledit Guillaume fu et a esté prins et apprehendé et constitué prisonnier en nostre chastelet de Paris, ouquel il a esté detenu prisonnier par l'espace de neuf mois ou environ, et encores est en grant povreté et misere et tous ses biens prins et mis en nostre main ... Si donnons en mandement a nostre prevost de Paris... Donné a Paris, le ijme jour d'avril, l'an de grace mil quatre cens vint sept et de nostre regne le sixiesme, avant Pasques. Ainsi signé : Es requestes tenues par mons. le Regent le Royaume de France, duc de Bedford, esqueles vous le Premier President de Parlement, messire Giles de Clamecy et pluseurs autres estoient. Quentin. J. le Clerc.

CLXXX. — Paris. 2 avril 1428. (n. s.)

Rémision à Jean Martin, qui, emmené prisonnier par les Français de la garnison de Fougères pour répondre du paiement d'un appatis mis sur les habitants de Montigny, a pris part à une expédition dirigée contre cette paroisse et s'est trouvé impliqué dans le vol de bestiaux qui en fut la suite. (JJ 174, n. 137, fol. 57 verso.)

Henry, etc., Savoir faisons, etc., nous avoir receue l'umblé supplication des parens et amis charnelz de Jehan Martin povre simple homme aagié de xxxvj ans ou environ, chargé de femme et de pluseurs petiz enfans, de la parroisse de Montignie ou bailliage de Coustantin et viconté de Mortaing, contenant comme, depuis deux ans ou environ, ceulx de la garnison de Fougieres la Roial eussent prins ledit Jehan et mené prisonnier audit lieu de Fougieres pour l'apatisement de ladicte parroisse de Montignie, lors deu a ceulx de ladicte garnison de Fougieres, où ilz le tindrent un quart d'an ou environ en grant misere et povreté, par la faulte et coulpe des parroissiens d'icelle parroisse. Lequel Jehan, ce veant, manda un sien frere pour tenir hostage pour lui tant qu'il feust venu par devers lesdiz parroissiens les sommer et requerir de le acquitier et paier ledit appatisement ; ce que ledit frere fist. Et après quant ledit Jehan fu retourné, se tray par devers nostre bailli de Coustantin ou son lieutenant et obtint un mandement pour contraindre lesdiz parroissiens a ce que dit est. Mais ainsi que il et son executeur les contraingnoient et justicoient, ilz rescouirent leurs namps et gaiges a cry de haro et autrement; par quoy ledit Jehan ne pot avoir denier pour ledit apatisement ne pour soy acquitier. Et ce pendant son frere, qu'il avoit laissé en hostage pour lui, chut en maladie tele que on y esperoit mieulx la mort que la vie ; et pour ce il convint que leur mere se alast rendre esdictes prisons de Fougieres pour delivrer son filz frere dudit Jehan. Et assez tost après icelui Jehan, veant et considerant sadicte mere ainsi demourée esdictes prisons, fist tant qu'il ot un sauf conduit desdiz de Fougieres, et souzb umbre d'icelui s'en retourna esdictes prisons de Fougieres acquitier sadicte mere. Lesquelz le retindrent derechief par l'espace de trois mois ou environ. Et eust de rechief mandé et requis ausdiz parroissiens de Montignie son essoine et detencion où il estoit pour eulx a cause dudit appatisement, qui n'en tindrent compte, au moins ne firent quelque diligence de sa delivrance. Et a ces entrefaites, ceulx de ladicte garnison de Fougieres delibererent qu'ilz yroient courir en ladicte parroisse pour ledit appatisement, ce qu'ilz firent et menerent ledit Jehan avec eulx, lequel pour eschever lesdictes prisons se advantura de ce fere, et toutes voies ne trouverent ne prindrent ne homme ne femme en icelle parroisse en la presence dudit Jehan, mais ilz prindrent seulement certaine quantité de bestail, qui pouvoit valoir de vint cinq a trente livres tournois ou environ, qu'ilz emmenerent et ledit Jehan, avecques eulx. Lequel après ladicte course le plus tost qu'il peut se parti d'eulx et les laissa. Pour occasion duquel cas ledit Jehan, doubtant rigueur de justice, s'est absenté de ladicte parroisse... Si donnons en mandement... a nostredit bailli de Coustantin... Donné a Paris, le ijme jour d'avril avant Pasques, l'an de grace mil quatre cens et vint sept et le sixiesme de nostre regne. Ainsi signé : Es requestes tenues par mons. le Regent le royaume, duc de Bedford, esqueles vous le Premier President de Parlement, messire Giles de Clamecy et pluseurs autres estiez. J. Le Clerc.

CLXXXI. — Paris, 16 avril 1428.

Rémision à Guillaume le Maître, de Falaise, qui, par suite des vexations des Anglais de la garnison, a dû quitter cette ville et s'est réfugié en Bretagne. (JJ 124, n. 1 55, fol. 65 recto.)

Henry, etc., Savoir faisons, etc., nous avoir receu l'umble supplicacion des parens et amis charnelz de Guillaume le Maistre, jeune homme de l'age de xxv ans ou environ, natif de nostre ville de Faloise, contenant comme, des cinq ans a ou environ, certains Anglois feussent venuz par nuit en l'ostel du pere dudit Guillaume ouquel il demouroit, et par force et violence eussent rompu les huis et fenestres dudit hostel en demandant femmes, ausquelz eust esté respondu que il n'y en avoit nulles, en leur priant que ilz se voulsissent deporter de fere plus tel effort oudit hostel; dont ilz ne vouldrent riens faire. Pour laquele cause eust esté baillée une requeste a nostre capitaine de ladicte ville, qui lors estoit, afin de les fere cesser de ce que dit est. Lequel, après qu'il fu de ce informé, eust fait mectre en prison lesdiz Anglois, lesquelz pour ce conceurent hayne contre ledit Guillaume, qui aucun desplaisir ne leur avoit fait. Pour laquele haine, après ce qu'ilz furent hors de ladicte prison, injurierent et batirent ledit Guillaume, et telement qu'il y paroit. Neantmoins non contens de ce, le menacerent de tuer et murdrir. Pour quoy ledit Guillaume, veiant la mauvaise volenté desdiz Anglois, doubtant leurs menasses et afin d'eschever l'inconvenient peril de mort, se parti et absentia sans congé ou licence de nostredicte ville de Faloise, en tres grant courroux et desplaisir, et s'en ala demourer ou pais de Bretagne, qui pour lors estoit a nous contraire, ouquel il a tousjours depuis demouré et encores fait de present en gagnant sa vie a grant peine au mieulx qu'il a peu, sans soy estre entremis aucunement du fait de la guerre... Si donnons en mandement par ces mesmes presentes à nostre bailli de Caen... Donné a Paris le xvijme jour d'avril, l'an de grace mil quatre cens et vint huit et de nostre regne le sixiesme après Pasques. Ainsi signé : Es requestes tenues par mons. le Regent le royaume de France, duc de Bedfbrd, esqueles vous les evesques de Beauvais, Noyon et pluseurs autres estoient. J. Le Clerc.

CLXXXII. — Paris, 19 avril 1428

Rémission à Raoulet Briçon, de Gisors, enfermé dans les prisons de la ville pour avoir pris sur les remparts cinq pierres de taille, qu'il se proposait d'employer à la construction d'une petite grange. (JJ 174, n. 1 32, fol. 56 recto.)

Henry., etc., A tous ceulx qui ces presentes lettres verront, salut. Receu avons l'umble supplicacion de Raoulet Briçon, povre homme laboureur de braz, chargé de femme et de cinq petiz enfans, demourant a Gisors, contenant comme nagaires ledit suppliant ait fait fere et edifier tout de neuf une petite granchecte ou estable en son jardin joignant aux murs de la ville de Gisors, laquele granchecte il convenoit et convient ablochier de pierre de taille, dont ledit suppliant ne avoit aucunes. Et il soit ainsi que, en quaresme derrenierement passé, lui estant sur les murs de ladicte ville et faisant le guet par nuit, ainsi qu'il est acoustumé, eust veu et apperceu que sur la porte de Neaufle de ladicte ville avoit trois belles pierres de taille, sur quoy l'en se seoit au feu, et deux autres sur une guerite qui est a l'endroit de l'ostel a la dame des Boves, lesqueles cinq pierres, qui comme il semble avoient servy a pendre barbaquennes de bois ausdiz murs, ledit suppliant, non cuidant aucunement mesprendre, print et gecta de dessus lesdiz murs en sondit jardin lesdictes cinq pierres, esperant d'en reporter sur iceulx murs cinq autres, et de fait y en reporta cinq qui n'estoient pas si bonnes que celles qu'il avoit ainsi ostées. Pour raison desqueles cinq pierres ainsi prises ledit suppliant, par la denonciacion d'aucuns de ladicte ville qui ont visité lesdiz murs et veu et apperceu que on avoit nouvellement prins et arraché des pierres a quoy lesdictes barbaquennes tenoient et qui ont trouvé lesdictes cinq pierres en l'ostel dudit suppliant, qui n'avoient esté mises en euvre, combien qu'il ne les ait pas arrachées mais les ait trouvées sur ladicte porte de Neaufle et sur ladicte guerite, comme dit est, a esté emprisonné es prisons de Gisors et ses biens prins et mis en nostre main par inventoire... Si donnons en mandement au bailli de Rouen et des ressors et exempcions du bailliage de Gisors, au cappitaine dudit Gisors... Donné a Paris, le xixe jour d'avril, l'an de grace mil quatre cens et vint huit et de nostre regne le sixiesme après Pasques. Ainsi signé : Par le Roy, a la relacion du Conseil. J. Talence.

CLXXXIII. — Paris, 18 mai 1428.

Rémission à un écuyer anglais, de la compagnie de Jean Noire, capitaine de la Ferté-Fresnel, pour le meurtre d'un homme d'armes qui, malgré la défense dudit capitaine, voulait emmener une jeune femme rencontrée par lui dans un faubourg de Rouen. (JJ 174, n. i56, fol. 65 verso.)

Henry, etc., Savoir faisons, etc., nous avoir receu l'umble supplicacion des parens et amis de Guillaume Bourreley, dit du Moc, escuier, natif de nostre royaume d'Angleterre, contenant comme, tantost après la reddicion de la ville du Mans, ledit Bourreley feust aie en la ville de Rouen, en la compagnie de Jehan Noire, escuier, capitaine de la Ferté Fresnel, duquel capitaine il estoit serviteur. Et ainsi comme ledit capitaine, ledit Bourreley et les autres gens et serviteurs dudit capitaine s'en retournoient de ladicte ville de Rouen, et estoient desja dehors de la porte du Pont, environ l'eglise des Emmurées, une jeune femme se feust venue plaindre audit capitaine que un de ses gens, nommé Jehannequin Regnault, anglois, vouloit emmener icele jeune femme par force, requerant a icelui capitaine que il lui voulsist mettre remede. Par

quoy icelui capitaine eust commandé audit Bourreley et a aucuns autres ses serviteurs que ilz alassent par devers ledit Jehannequin Regnault et qu'ilz le contraignissent de laisser ladite femme. Pour quoy ledit Bourreley lui eust fait commandement de par son dit maistre que icelle jeune femme il laissast aler sans lui fere mal ne oppression. Lequel Jehannequin ne s'en feust voulu cesser mais eust batue, ferue et frappée icelle jeune femme, tellement qu'elle eust appelé aide ou crié haro, et eust dit icelui Jehannequin, qui estoit homme très hatif, yreux et furieux, que s'il y avoit homme qui y mist la main, que il le tueroit, et de fait eust sachée son espée pour vouloir ferir ledit Bourreley. Pour laquelle chose et resister a la mauvaise et dampnable entreprise d'icelui Jehannequin, ledit Bourreley eust sachié son espée et en eust feru ledit Jehannequin par dessus la teste un seul coup, dont il chey a terre, et après fu remené en la ville et mis es mains de cirurgiens, où il fut l'espace de huit jours ou environ, et après par petit gouvernement, faulte de garde ou autrement, il ala de vie a trespasement. Pour cause et occasion duquel fait et cas ledit Bourreley, doubtant rigueur de justice, s'est absenté du pais... Si donnons en mandement par ces mesmes presentes au bailli d'Evreux... Donné à Paris, le xviiije jour du mois de may, l'an de grace mil quatre cens et vingt huit et de nostre regne le sixiesme. Ainsi signé : Par le Roy a la relacion du Conseil. Gervais.

CLXXXIV. — Paris, 28 mai 1428.

Rémision à Jean Rippes, archer de la garnison anglaise de Cherbourg, qui s'est pris de querelle, à Valognes, avec un de ses compatriotes nommé Jean Le Peinteur, dont il avait enlevé la femme, et l'a frappé mortellement de plusieurs coups, de dague ou d'épée. (JJ 174, n. 157, fol. 66 recto.)

Henry, etc., Savoir faisons, etc., nous avoir oye l'umble supplicacion de Jehan Rippes, archier, natif de nostre royaume d'Angleterre, contenant comme, puis un an ença, il se feust parti de Chierebourg, où il est demourant, pour aler a Valoignes par devers noz viconte et receveur audit lieu pour aucunes besongnes et affaires a lui enchargées dire et fere de par nostre amé et feal Robert de Hungerfford chevalier. Lui estant auquel lieu de Valoignes, il eust rencontré par cas d'avanture, en alant son chemin d'entre l'ostel d'un surnomé le Goupil, barbier, un Anglois nommé Jouhan le Peinteur, de la viconté de Cornouaille, oudit pais d'Angleterre. Lequel le Peinteur, par traison et grant faulseté, fist ja pieça escrire certaines faulses lettres closes adreçans a la femme d'icelui suppliant, contenant en effect que, durant le temps qu'il estoit ou service de feu nostre tres chier seigneur et pere le Roy d'Angleterre, cui Dieu pardoint, tant audit lieu de Chierebourg que ailleurs, il estoit alé de vie a trespasement. Soubz ombre duquel faulx et mauvais donner a entendre et autres soubztives et deceptives paroles, après la reddicion dudit lieu de Chierebourg, eust tant fait que icelle femme se feust consentie qu'il eust sa compagnie charnele, et depuis l'ait tenue l'espace de dix ans ou environ et en fait son plaisir et volenté, tant audit lieu de Valoignes que ailleurs, publiquement et es presences de plusieurs gens tant nobles Anglois, Normans que autres. Et encores non contens de ce, en soy moquant derridant dudit suppliant, et pour foller son bien et honneur, et de sadite femme, s'est vanté et dit en plusieurs lieux qu'il avoit fait un bon tour a l'un des archiers de Chierebourg, surnomé Rippes, et que tantost après ce qu'il avoit esté passé ou service de nostredit feu pere et en sa compagnie, il avoit par bons et soubtifs moiens subtraite audit Rippes suppliant sadite femme, et si avoit avec ce une grant partie de ses biens, et en oultre avoit eu sa compagnie charnele tout a son aise, en disant sur ce mozt très deshonestes non recitables. Et il soit ainsi que ledit suppliant et ledit le Peinteur, ainsi eulx raencontrez et assemblez, eussent eu grans paroles entre eulx, et tant que ledit le Peinteur, perseverant tousjours en son mauvais et oultrageux vouloir et couraige, eust, tout le premier et avant que icelui suppliant lui atouchast, donné deux grans cops d'un grant baston qu'il portoit, l'un sur le bras dextre et l'autre sur la jambe ; et tantost après sacha sa dague et d'icelle frapa tellement sur icelui suppliant qu'il lui fendi la bouche et copa ou rompi les levres. Pour quoi il, soy voiant ainsi mutilé et affolé, et que, s'il ne se revenchoit ou defendoit, ledit le Peinteur l'eust tué ou mis en tel estat que de ce eust esté avanture se jamais en feust eschappé, en soy revenchant et meu de grant courage, tant pour le cas et traison dessusdiz que pour sauver sa vie, se feust mis en deffense, tellement qu'il eust fait cheoir a terre ledit le Peinteur et lui eust donné plusieurs cops et collées tant d'espée que de dague, a l'occasion desquelz il feust et soit assez tost après alé de vie a trespasement... Si donnons en mandement au bailli de Coustantin... Donné a Paris, le xxviiije jour du mois de may, l'an de grace mil quatre cens et XXVIII et de nostre regne le sixiesme. Ainsi signé : Par le Roy, a la relacion de mons. le Regent le royaume de France, duc de Bedford. Parker.

CLXXXV. — Paris, 10 juin 1428.

Rémision à Guillaume le Goupil, de Montjoie, qui en défendant son héritage contre des gens d'armes qui venaient piller la paroisse, a tué l'un d'eux à coups de bâton. (JJ 174, n. 168, fol. 71 verso.)

Henry, etc., Savoir faisons, etc., nous avoir receu l'umble supplicacion des parens et amis charnels de Guillaume le Goupil, de la parroisse de Saint Michiel de Montjoyes, en la viconté de Mortaing, povre homme laboureur, chargé de femme et de huit petiz enfans, contenant comme, environ la mi-quaresme

derrenierement passée, certaines gens d'armes se feussent venuz logier en ladicté parroisse de Montjoyes, ou hamel de l'Auderie, et d'icelle compaignie se partirent trois compaignons, qui puis certain temps ença s'estoient renduz tant des parties de Bretagne que d'ailleurs, et vindrent en l'ostel dudit Guillaume, où ilz prindrent ce que bon leur sembla et firent porter par icelui Guillaume foing, avoine, pain blanc tant comme il leur pleut et que ledit povre homme en peut finer jusques au logeis où estoient les autres compaignons. Et ne se tindrent pas a tant, mais retournerent de rechief le lendemain a l'ostel dudit Guillaume, qui autresfoiz a esté renomé estre aisié homme, et commencerent a cerchier son hostel, piller et rober. Et quant ledit Guillaume vit qu'ilz estoient en icele volenté, leur supplia tant humblement comme il peut qu'ilz ne le vouldissent pillier ne rober et que s'il y avoit aucuns biens ou vivres en sondit hostel, qu'il leur emporteroit encores volentiers a leur bon plaisir. Et ainsi qu'il parloit a eulx, l'un d'iceulx, dont il ne scet le nom, lui dist ces paroles ou semblables : « Vilain, qui t'en fait parler ? Tu nous enseigneras où est ta finance ou nous te tueron ! » Et de fait lui donna d'un baston par les dens tant qu'il en yssi grant effusion de sang. Et quant il se vit ainsi navré et qu'ilz le vouloient rober et oster le sien, il cuida fermement que ce feussent larrons brigans et ennemis et ot paour qu'ilz ne le vouldissent emmener ou qu'ilz le tuassent. Et adont tout esmeu appella Dieu a son aide et osta a celui qui l'avoit feru son baston qu'il tenoit et le fist reculer de dessus lui. Et tantost les autres deux ses compaignons lui coururent sus et le vindrent ferir par derriere de pluseurs grans cops de baston, et l'autre qui avoit feru premier ledit Guillaume, print de grosses pierres qu'il gectoit contre icelui Guillaume et le feri d'une d'iceles pierres parmi la fourcelle, tellement que a bien peu que il ne cheut a terre. Et quant ledit povre Guillaume se vit en ce dangier, pour eschever a la mort, leur couru sus en soy defendant et les actaignit ou ferit par la teste ou par où il le pot assener, tellement que mort s'en ensuit en la place mesmes en la personne de l'un d'iceulx agresseurs. Et tantost après vindrent les autres compaignons, qui estoient logiez oudit hamel de l'Euderie et cuiderent trouver et occire ledit Guillaume le Gouppil, mais il s'estoit ja reculé, et toutesfois prindrent en sondit hostel vint trois chiefs d'aumaille et tous les biens qu'ilz peurent trouver en son hostel et ailleurs qui feussent siens, et emmenerent et emporterent en vaillant de vj a vij** frans ou plus. Et encores ne se tindrent pas a tant, mais pillerent et roberent tous les voisins et hameaulx d'ilec environ de bestes et de biens ce qu'ilz en peurent trouver et emmenerent cinquante neuf bestes aumaille. Et quant ledit povre Guillaume se vit ainsi desert, il se destourna et rendi furtif de sondit lieu pour doubte de rigueur de justice... Si donnons en mandement par ces mesmes presentes a nostre bailli de Coustantin ... Donné a Paris, le xe jour de juing, l'an de grace mil CCC XXVIII et le sixiesme de nostre regne. Ainsi signé : Par le Roy, a la relacion du Conseil. J. Le Clerc.

CLXXXVI. — Paris, 2 juillet 1428.

Rémision à Thomas Gosselin, de Campfleu, pour avoir, de complicité avec deux Anglais de la garnison de Montreuil, volé trois chevaux à Lorin le Marage, contre lequel Denis Gosselin, son père, avait soutenu un long procès à l'occasion de l'incendie d'un four à pain. (JJ 174, n. 201, fol. 86 verso.)

Henry, etc., Savoir faisons, etc., a nous avoir esté exposé de la partie des amis charnelz de Thomas Gosselin, povre jeune homme laboureur, chargé de femme et d'enfans, aagé de xxv ans ou environ, demeurant en la parroisse de Campfleu, ou bailliage de Rouen et viconté d'Orbec, que comme, puis un an ença ou environ, ledit Denis Gosselin, laboureur, son pere, demourant aussi audit Campfleu, aagé de lxx ans ou environ, eust prié et requis a un nommé Lorin le Marage, demourant audit Campfleu, qu'il lui vouldist prester son four a cuire une fournée de pain ou paste qu'il avoit a cuire et il le paieroit et contenteroit volentiers de son fournage. Lequel Lorin lui eust presté sondit four, qui estoit et est assis lez son hostel, dessoubz un petit appentiz tenant a quatre petites fourchettes de bois et couvert de genestres et chaume, et bayes a l'environ de ce mesmes. Et il soit ainsi que, en chauffant ledit four par ledit Denis Gosselin pour cuire sondit pain ou paste, par le moien d'un grant estourbillon de vent, qui lors vint et frappa dedans icelui four, icelui estourbillon mena par fortune la flambe du feu es haies d'icelui appentiz dudit four et par ce moien furent icelui four et appentiz tous ars, gastez et parduz. Lequel Lorin le Marage, pour raison de ce et pour estre desdommagié, eust fait convenir et adjourner par devant le viconte d'Orbec ou son lieutenant ledit Gosselin, et tant fu procédé entre eulx que par amiable composition ou autrement lesdictes parties pour raison dudit four furent et ont esté d'accord, et a païé et restitué ledit Denis Gosselin audit Lorin le Marage tout l'interest et dommage ou partie d'icelui, qu'il a eu ou souffert pour raison et a cause de sondit four. Et depuis trois mois ença ou environ, ledit Thomas Gosselin, en haine et contempt du dommage que avoit fait ledit Lorin le Marage a sondit pere pour raison dudit four, et que depuis et après ce lesdiz Denis Gosselin et Lorin le Marage eussent et ont porté haine et rancune l'un a l'autre par longtems a cause dudit four, ledit Thomas Gosselin, qui demouroit lors, lui, sa femme et enfans avec sondit pere, de sa volenté et au desceu desediz pere et femme, s'en ala en la ville de Monstereul, qui est a cinq lieues dudit Campfleu, où ilec s'accompaigna d'un nommé Jehan, anglois, et d'un autre nommé Simon, autrement ne scevent lesdiz exposans les surnoms d'iceulx, lesquelz se disoient estre de la garnison qui pour lors estoit audit Monstereul. Lesquelz Thomas Gosselin, Jehan et Simon, eulx associez ensemble et veans que icelui Thomas n'avoit point de cheval et estoit à pié, conclurent ensemble qu'il failloit que ledit

Thomas eust un cheval et qu'il feust monté. Et finalement fu advisé et dit a sesdiz compaignons par ledit Thomas Gosselin qu'il savoit bien où il y avoit des chevaulx pour eulx monter. Et de fait eulx trois assemblement se partirent au commencement de la nuit dudit Monstereul et alerent audit Campfleur en l'estable dudit Lorin le Marage, qui estoit et est près et joingnant de sondit hostel, en laquele avoit trois chevaulx de harnois, voiture ou somme. Lesquelz trois chevaulx ledit Thomas et sesdiz compaignons prindrent et emmenerent audit Monstereul ou ailleurs où bon leur sembla. Et incontinant que ledit Lorin le Marage vit, sceut et apperceut sesdiz chevaulx ainsi ostez, perduz et adirez, comme dit est, il fist diligence de querir et trouver sesdiz chevaulx, lesquelz ou deux d'iceulx il trouva a cinq ou six lieues près dudit Campfleur ou environ. Et aussi trouva ledit Thomas et sesdiz compaignons qui estoient avec lesdiz deux chevaulx, et l'autre cheval avoit esté mené a Saint Lo par un page d'un Anglois de ladictie garnison de Monstereul. Lequel cheval fu alé querir par ledit Thomas Gosselin audit Saint Lo, en la compaignie d'un des filz dudit Lorin le Marage ; lequel cheval ilz ramenerent dudit Saint Lo. Et furent tous trois renduz audit Lorin le Marage, tant a son pourchas comme a celui dudit Thomas Gosselin. Et depuis la recouvrance desdiz trois chevaulx, ou de deux d'iceulx, lesdiz Denis Gosselin et Lorin le Marage firent certain contract et accord ensemble, qui fu tel que ledit Denis Gosselin devoit deffraier et desdommagier ledit Lorin le Marage de tous les fraiz qu'il avoit faiz et euz en faisant ladictie poursuite de recouvrer lesdiz ses chevaulx, et s'il advenoit que ledit tiers cheval feust perdu ou adiré, ledit Denis Gosselin devoit rendre et paier la valeur d'icelui cheval ou le pris qu'il avoit cousté, et par tant demourerent lesdictes parties et la chose en cest estat. Pour lequel cas ledit Thomas, doubtant rigueur de justice, s'est absenté du pais, si comme l'en dit, et n'y oseroit bonnement retourner, ouquel pais il a laissez sadictie femme et enfans, qui n'ont de quoy vivre fors seulement du labourage que ledit Thomas Gosselin faisoit en gagnant ses journées chascun jour, par quoy ilz sont en adventure de demorer povres mendians querans leur pain..... Si donnons en mandement par ces presentes auz bailli de Rouen et viconte d'Orbec Donné a Paris, le second jour de juillet, l'an de grace mil quatre cens vint huit et de nostre regne le sixiesme. Seellées de nostre seel ordonné en l'absence du grant. Ainsi signé : Par le Conseil. Adam.

CLXXXVI* — Paris, 6 août 1428.

Rémission à Jean des Houillettes, laboureur, qui, ayant surpris Jean Blanchet en train de dénicher un nid d'étourneaux sur son héritage, a secoué l'échelle sur laquelle était monté ledit Blanchet et l'a fait tomber à terre si rudement, qu'il est mort le lendemain des suites de sa chute. (JJ 174, n. 196, fol. 84 verso.)

Henry, etc., Savoir faisons, etc., nous avoir receu l'umble supplicacion des amis charnelz de Jean des Houillettes, povre homme laboureur de l'aage de xl ans ou environ, chargé de femme et de neuf petiz enfans, contenant comme, le samedi avant la feste de l'ascension Nostre Seigneur derrain passé, ainsi que ledit des Houillettes s'en venoit de faire sa besongne en son hostel et qu'il fu auprès de sondit hostel, il trouva un nommé Jehan Blanchet, qui estoit monté en un arbre appartenant a icelui des Houillettes, a cause de certaine ferme qu'il tenoit, et vouloit icelui Blanchet avoir une nyée d'estourneaulx estans oudit arbre. Lequel des Houillettes demanda audit Blanchet pour quoy il venoit querir les oiseaulx qui estoient en son dangier, en disant qu'ilz lui estoient aussi bien seans comme a icelui Blanchet. A quoy ledit Blanchet respondi que les oiseaux estoient de commun. Et lors icelui des Houillettes mist la main a l'eschielle sur laquelle ledit Blanchet estoit monté. Lequel Blanchet acola l'arbre, et ledit des Houillettes, qui avoit mis la main a ladictie eschielle, la commença a hocqueter et de fait la bouta jus telement que ledit Blanchet, qui avoit paour, en tenant tousjours ledit arbre embrassé, chey du long d'icelui arbre sur ses piez a terre. Et bientost après se releva et print ladictie eschielle, qui sienne estoit, en faisant semblant qu'il ne feust point blecié, et l'emporta a son col en l'ostel de son pere, qui estoit auprès d'ilec, où il trouva sondit pere, qui le vout fere disner, ce qu'il refusa. Et lors vint la femme d'icelui Blanchet, laquelle, pour ce qu'il lui sembloit qu'il ne faisoit pas bonne chiere, lui demanda qu'il avoit. A quoy il respondi que se Jehan des Houillettes ne feust point venu à lui, il n'eust nul mal, en lui disant que il avoit une bosse en l'aine ; et tantost après se ala couchier et fu si malade que le lendemain il ala de vie a trespassement. Pour occasion duquel cas ledit des Houillettes, doubtant rigueur de justice et que a l'occasion de ce que dit est on le vouldist chargier de ladictie mort, s'est absenté... mais doubte que ladictie mort soit advenue en partie a l'occasion de la mortalité qui aucunement estoit et est ou pays... Ledit suppliant sera puny civilement et un mois prisonnier au pain et a l'eaue. Si donnons en mandement aux bailliz de Rouen et d'Alençon, es mettes desquelz bailliages ledit cas est advenu ... Donné a Paris, le vjme jour d'aoust, l'an de grace mil quatre cens et vint huit et de nostre regne le sixiesme. Ainsi signé : Es requestes tenues par mons. le Regent le royaume de France, duc de Bedford, esquesles vous les evesques de Beauvais, de Noion, de Paris et plusieurs autres estoient. J. Le Clerc.

CLXXXVII. — Paris, 4 septembre 1428.

Rémission à Robin Hébert, écuyer du pays de Caux, qui, sur la route de Bellefosse à Cléville, s'est mêlé d'une querelle entre Jeannet Lugan, ouvrier de moisson, qu'il venait de louer, et un certain Louis Cochin, et a frappé mortellement ce dernier d'un coup de dague. (J J 1 74, n. 214, fol. 94 recto.)

Henry, etc., Savoir faisons, etc., nous avoir receu l'umble supplicacion et requeste des parens et amis charnelz de Robin Hebert, clerck, escuier, de l'aage de xxvj ans ou environ, natif de Cleville en Caux, chargé de femme et de trois petiz enfans, contenant que, le dimenche xxjme jour d'aoust derrenierement passé, ledit Robin Hebert, pour certains ses affaires et besongnes touchant le fait de recouvrer ouvriers pour recueillir ses labours et autres pour le fait de son mesnage, feust aie en la parroisse et village de Bellefosse, et ylece eust oye messe. Après laquele ledit Robin et pluseurs gens d'icelle parroisse feust alez boire en une taverne. Et au departir d'icelle, alerent jouer a la paulme, et jouerent ledit Robin et un autre contre quatre, lesquelz quatre perdirent six blans, pour estre convertiz en boire. Et ce fait, retournerent en la taverne despendre lesdiz six blans. Et sicomme ilz vouloient compter leur escot et asseoir icelui, survint un nommé Jehannet Lugan, charpentier, alloué a servir ledit Robin Hebert. Lequel Lugan, qui venoit de boire d'autre part, dist en la presence dudit Robin ces paroles ou semblables en substance: « Mon maistre, vous avez gangné a ces villains de Bellefosse : raison veult que ilz paient tout. » A quoy ledit Robin, son maistre, lui dist que il se teust et que il faisoit comme homme de nient de leur dire villenie en sa presence ne autrement, et lui defendi que plus n'en parlast ; dont ledit Lugan, qui estait chargé de boire, ne vout aucune chose faire, mais persevera tres fort en sesdictes paroles, disant que il regnioit Dieu se lesdiz vilains ne paieraient tout. Et afin de eschever a plus grant inconvenient, après ledit escot païé, ledit Robin et gens, qui ainsi avoient joué et beu, se departirent amoureusement de ladicte taverne, et demanda ledit Robin Hebert a avoir son cheval pour soy en aler en sa maison. Et lors ledit Lugan lui dist : « Mon maistre, j'ay en ceste taverne une sie a sier bois au travers, sans laquele je ne puis fere vostre besongne ; elle tient en gaige. Je vous prie que je l'aie. » A quoy ledit Robin obtempera, et fu ladicte sie baillée a un nommé Pierre Ballie, qui avoit joué a la paulme avec ledit Robin et de sa partie ; et monta ledit Robin a cheval pour soy en aler en sa maison. Et si comme il et ledit Baillie aloient leur chemin, parlans ensemble amoureusement de leurs besongnes et affaires, vint après eulx ledit Lugan, qui osta audit Baillie ladicte sie tres impetueusement. Et adonc ledit Robin dist audit Lugan : « Vien t'en, tu es mon alloué ; et se tu parles ou fais quelque chose desplaisant a ces bonnes gens, je voudroie que ilz te bateissent. » Et lors ledit Lugan, tenant ladicte sie, retourna devers lesdictes gens et parla a eulx, comme l'en dit, tres rigoureuses paroles en l'absence dudit Robin. Lequel Robin et le chapelain de ladicte parroisse aloient ensemble leur chemin, parlans ensemble ; et en parlant oïrent la noise que faisoient lesdictes gens et Lugan, et se retourna dessus son cheval pour regarder les autres, et dist audit chapelain : « Je croy que ces gens batront mon varlet. » Et pour ce qu'il vit l'assemblée d'entre eulx et que chascun tenoit un baston, et que ledit Lugan son varlet estait desja dessaisy de ladicte sie, retourna pour savoir que c'estoit. Et adonc apperceut un nommé Loys Cochin, qui, comme l'en dit, emportait ladicte sie ; et pour ce ala audit Cochin, et lui dist qu'il lui baillast ladicte sie. A quoy ledit Cochin respondi qu'il ne la lui bailleroit point. Et lors ledit Robin lui dist que se il ne la lui baillait, que il le frapperoit ; et ledit Cochin lui dist que se il le frappoit, que il se retourneroit. Et pour ce que ledit Robin vout prendre ladicte sie, ledit Cochin la bailla a sa femme. Et lors ledit Cochin, comme mal meu, recula et d'un gros baston, que il tenoit et portoit, esma un grant horion, lequel cheut sur ledit Robin et sur son cheval, et se recula ledit Cochin. Et incontinant que ledit Lugan vit sondit maistre et son cheval ainsi feruz, vint audit Cochin et s'entreprendrent aux corps, et cheurent l'un sur l'autre, et estoit ledit Cochin dessoubz. Et quant la femme dudit Cochin, qui présente estoit, vit sondit mary dessoubz ledit Lugan, vint audit Lugan et fist tant que sondit mary et elle, en la force et aide l'un de l'autre, tournerent ledit Lugan et le mistrent dessoubz, et se entretenoient tres fort les ungs les autres par les chapperons et cheveulx. Et quant ledit Robin Hebert vit ces choses, et comme le cas dessusdit s'estoit porté, tres desplaisant de ce que l'en avoit osté a sondit varlet ladicte sie, et que encores on le batoit, et que lui et sondit cheval avoient esté ainsi feruz sans cause, descendit de dessus sondit cheval, et par temptacion de l'ennemi vint audit Cochin, qui ainsi tenoit sondit varlet soubz lui ou a costé de lui, et le prist par le mahustre du bras pour rescourre sondit varlet, que ledit Cochin tenoit soubz lui ou a costé, comme dit est, et soubzdainement fery ledit Cochin d'une dague sur ou environ l'espaule un cop seulement. A l'occasion duquel cop tantost après ledit Cochin ala de vie a trespassement. Pour occasion duquel cas, ledit Robin Hebert s'est absenté du pais Si donnons en mandement au bailli de Caux Donné a Paris, le iiij e jour de septembre, l'an de grace mil CCCc vint huit et de nostre regne le sixiesme. Ainsi signé : Par le Conseil. L. Calot.

CLXXXVIII. — Paris, 22 septembre 1438.

Rémission à Guillaume Gould, archer de la garnison anglaise d'Avranches, pour avoir tué, au cours d'une rixe, un de ses compatriotes, Jean Beudelay, qui, profitant de ce que ledit archer était parti en expédition à Saint-James-de-Beuvron, avait, de complicité avec plusieurs hommes d'armes, pénétré, de nuit et par effraction, dans la taverne tenue par ledit archer dans les faubourgs d'Avranches, battu ses serviteurs et dépensé ses provisions sans payer. (J J 174, n. 229, fol. 101 verso.)

Henry, etc. Savoir faisons, etc., nous avoir receu l'umble supplicacion de nostre amé Guillaume Gould, archier, natif de nostre royaume d'Angleterre, de la garnison de noz ville et cité d'Avranches, contenant comme, ou mois de may derrenierement passé, ot deux ans ou environ, du commandement et ordonnance de nostre bien amé Guibon Werde, esquier, lors mareschal de ladicte garnison dudit lieu d'Avranches, ledit suppliant se feust disposé et ordonné, monté et habillié souffisaument selon son estat pour aler en une course et voiage que ledit Guibon Werde, mareschal, et autres de ladicte garnison d'Avranches estans en sa compaignie vouloient et avoient entencion de fere et aler a Saint Jame de Bevron et es marches a l'environ. Et eust ledit suppliant ordonné et laissié en son hostel et maison, qu'il avoit es forbourg dudit lieu d'Avranches, où il faisoit et avoit acoustumé de fere ou faire fere taverne de vin et autres marchandises, un nommé David, natif du pais de Gales, et Alipson sa chamberiere, ses gens et serviteurs, pour fere et conduire le fait de sadicte taverne de vin et autres marchandises et garder en son absence sondit hostel et ses biens. Et ce fait, ledit suppliant, monté a cheval et habillié comme dit est, se feust parti de sondit hostel pour aler en ladicte course et voiage avecques ledit Guibon Werde, mareschal, et autres de ladicte garnison d'Avranches estans en sa compaignie. Et feussent alez tous ensemble jusques audit lieu de Saint Jame de Bevron et es marches d'environ, où ledit suppliant fu et séjourna huit jours entiers ou environ, tant en nostre service et ou fait de noz guerres comme en ses autres besongnes et affaires. Et cependant, feu Jehan Beudelay, en son vivant natif de nostredit royaume d'Angleterre, acompaignié de quatre a six cornpaignons estans avec lui, armez, garniz et embastonnez d'espées, dagues et autres armeures invasibles, a une certaine nuit, a deux ou trois heures après minuit ou environ, qui estoit heure indeue, vindrent a l'uis de l'ostel dudit suppliant, lui estant absent, ainsi que dit est, et où il avoit acoustumé de fere sadicte taverne de vin et autres marchandises et laissié sesdictes gens et serviteurs pour ce fere, comme dit est, et hucherent ledit feu Jehan Beudelay et sesdiz compaignons moult effrousement et hurterent moult impetueusement contre l'uis dudit suppliant, qui estoit clos et fermé a celle heure, ainsi que raison estoit. A quoy respondi ledit David, qui estoit en garde oudit hostel, en demandant qui c'estoit et en leur disant qu'ilz se nommassent et deissent leur nom et ilz y enterroient. Lequel feu Jehan Beudelay, par maniere de moquerie ou autrement dist et respondi qu'il avoit a nom Jacq et Jouhan. Lequel David leur respondi et dist qu'il aloit et venoit beaucoup de gens par le pais, tant de la garnison du Mont Saint Michiel que autres, et qu'il ne congnoissoit point le nom que ledit feu Jehan Beudelay lui disoit et qu'il lui deist ou nommast son droit nom, ou autrement il n'entendroit point, lui ne sa compaignie, oudit hostel, et qu'il ne leur ouvreroit point son huis. Lequel feu Jehan Beudelay dist et respondi audit David, en le menassant et en jurant moult vilainement, que se ledit David ne lui ouvroit l'uis dudit hostel, qu'il le romproit et y entendroit lui et ses compaignons, vouldist ou nom ledit David. Et de fait et de force ledit feu Jehan Beudelay et ses compaignons frapperent contre ledit huis, bouterent, s'efforcerent de le rompre pour y entrer. Et pour ce que ledit feu Jehan Beudelay vit et apperceut que lui et sesdiz compaignons ne povoient rompre ledit huis dudit hostel ne entrer dedans, pour la resistance que y mectoit ledit David qui estoit dedans, tantost icelui feu Jehan Beudelay monta sur la couverture dudit hostel, qu'il descouvry, cependant que sesdiz compaignons estoient audit huis dudit hostel, pour le vouloir ou cuidier rompre, fist un trou ou pertuis en ladicte couverture dudit hostel, entra dedans et vint par derriere audit David, lui donna plusieurs cops d'espée tant sur la teste comme sur les bras et sur sa main et en autres parties de son corps, et telement et si inhumainement ledit feu Jehan Beudelay bati ledit David qu'il le mutila de l'un de ses membres, c'est assavoir du bras et de la main. Et non content de ce, ledit Beutelay bati ladicte chamberiere dudit suppliant et autres ses serviteurs, qui estoient ens en sondit hostel, ouvry l'uis dudit hostel, fist entrer sesdiz compaignons, et eulx estans dedens prindrent du vin de la taverne dudit suppliant et beurent de cinq a six potz de vin ou environ et tant qu'il leur en pleut. Et quant ilz orent bien beu tout a leur plaisir et a leur bon loisir, s'en partirent et alerent hors dudit hostel, sans aucune chose paier de ce qu'ilz avoient beu et mengié oudit hostel des biens dudit suppliant, en commectant voie de fait et les peines de taverne brisée. Et ce venu a la congnoissance du lieutenant de nostredit capitaine dudit lieu d'Avranches, ledit Jehan Boutelay fu prins et arrêté prisonnier par la justice dudit lieu d'Avranches, et après eslargi a plesges qu'il bailla et donna pour amender ledit cas. Et deux ou trois jours après, ou environ, que ledit suppliant fu retourné de ladicte course et de sondit voiage et venu en sondit hostel, c'est assavoir a un jour de lundi ou mois de juing prochain après ensuivant oudit an, a dix heures devant midi ou environ, ledit feu Jehan Beudelay, garni d'un vouge, non content de ce que pour ledit cas il avoit esté emprisonné ou arrêté par justice, ainsi qu'il faisoit semblant ou autrement, vint et se transporta par devant l'hostel dudit suppliant et se bouta en un hostel ou maison assis près d'ilec, où il se muça et latita secretement, jusques ad ce qu'il vit et apperceut ledit suppliant, qui estoit en estant audit huis de sondit hostel, sans penser a aucun mal ou noise en quelque maniere. Et quand ledit feu Jehan Beutelay vit et apperceut ledit suppliant estant a sondit huis, ainsi que dit est, vint audit suppliant et lui demanda moult arrogamment et orgueilleusement s'il estoit le maistre dudit hostel. Lequel suppliant lui respondi que non, en disant audit Jehan Beutelay qu'il estoit mieulx maistre de sondit hostel que lui et qu'il avoit rompu sondit huis de sondit hostel, entré dedens, lui et sesdiz compaignons, batu ses gens et serviteurs, beu son vin, mengié son pain et soy en alé sans vouloir paier ce qu'il avoit despendu et prins du sien en sondit hostel, et qu'il le lui amenderoit. A quoy ledit feu Jehan Beudeley dist et respondi moult orgueilleusement et

chaudemment audit suppliant qu'il avoit menty. Et ledit suppliant lui respondi : « Mais vous avez menty. » Et lors ledit feu Jehan Boutelay s'aproucha moult tost et impetueusement dudit suppliant et lui donna un grant coup dudit vouge qu'il tenoit, en le cuidant tuer et frapper sur la teste, et telement qu'il lui copa sur l'espaule tout au travers son gippon, qui estoit de xxx toilles ou environ, et lui fist sang et plaie sur l'espaule. Lequel suppliant, soy sentant ainsi batu, feru et injurié, en soy defendant et en repellant force par force, s'aproucha dudit feu Jehan Beudelay, lui donna un coup de poing sur la joe ou sur le visaige et l'abaty a terre. Et ainsi que ledit feu Jehan Beutelay se voulu ou cuida relever, il apperceu la dague dudit suppliant qui pendoit a sa seinture, la saisi et tira toute nue et en donna de fait et frappa un cop tant qu'il pot frapper audit suppliant entre la cuisse et le ventre, en le cuidant frapper ou ventre et le voulant tuer. Lequel suppliant, soy sentant ainsi fort frappé de ladicte dague, cuidant estre mort, saisi tantost le bras et la main dudit feu Jehan Beutelay, tenant lors ladicte dague. Et en ce conflict et par temptation de l'ennemi, ledit suppliant a force de bras reboursa ladicte main et bras dudit feu Jehan Beudelay tenant toujours ladicte dague ; et, sans ce que icele dague partist de ladicte main dudit feu Jehan Beudelay, en frappa ung coup par le corps dudit feu Jehan Beudelay, lequel assez tost après, ce jour mesmes, ala de vie a trespas... Si donnons en mandement a nostre bailli de Coustantin Donné a Paris, le xxij eme jour de septembre, l'an de grace mil CCCC XXVIII et de nostre regne le sixiesme. Ainsi signé : Par le Conseil. G. de Marc.

CLXXXIX. — Paris, 5 novembre 1428.

Rémision à Guillaume Vallée, de Triqueville près Pont-Audemer, pour avoir frappé mortellement d'un coup de pelle une femme publique qui l'injurait. (JJ 174, n. 233, fol. io3 verso.)

Henry, etc., Savoir faisons, etc., nous avoir receu l'umble supplication des parens et amis charnelz de Guillaume Valée, natif et demourant en la parroisse de Triqueville, en la vicomté et près du Pontaudemer, povre homme laboureur, chargé de femme et de onze petiz enfans, contenant comme, le lundi xje jour du mois d'octobre derrenierement passé, audit Guillaume Valée, qui s'en venoit dudit lieu du Pontaudemer en son hostel, devant l'eure de soleil couchié, feust venue furieusement et impetueusement une femme publique, de vie dissolue, chamberiere et concubine d'un appelé Guillaume Roz, anglois, et en effect et substance toute esbauleurée lui dist telz motz : « Valée, tu as eu ma compaignie et me as mauvasement paiée; tu es un homme de neant, qui riens ne vaulz, murdrier et larron, je te feray copper les jarrez et les jambes, sanglant paillart, et après te feray tuer et perdre la vie », et pluseurs autres injurieuses paroles, et soy aprouchant de son visaige. A quoy ledit Valée, voulant et desirant obvier et tout honteux des manieres deshonestes de ladicte femme, lui eust dit qu'elle se pavoit bien deporter de teles paroles mençongieres et elle le laissast en paix, en soy mettant en son chemin et seulement faisant un barboquet a ladicte femme. Laquele plus esmeue que devant et perseverant en sa mauvasie et dampnable volenté et emprise, foy au devant dudit Guillaume Valée, se mist ou chemin par lequel il devoit passer, et en soy aprouchant au plus près de luy et mettant main jusques a sa barbe lui dist : « Sanglant traictre, garçon, larron, houlier mauvais, je te feray crever les yeulx, paillart que tu es ! » et autres injurieuses paroles. A quoy desirant resister par ledit Valée, se cuida eschapper d'elle et tenir sondit chemin en lui disant : « Cardine, je vous prie, deportez-vous ! » Mais elle le print par la robe et lui commença a crachier au visaige par pluseurs et diverses foiz, et haulsa la main pour le ferir de tout povoir. Adonc ledit Valée, qui est feble et aagié homme, la rebouta et dist : « Va t'en, fole outrageuse ! » Et après de rechief se aproucha et lui cracha comme devant audit visaige, en continuant de mal en pis esdictes paroles injurieuses. De laquele chose ledit Guillaume Valée, qui avec autres avoit beu et fait bonne chiere audit lieu du Pontaudemer, courroucié et esmeu de chault sang, frappa ladicte Cardine, en repellant son impetuosité, ung seul coup sur la teste d'une pele qu'il tenoit en ses mains ; duquel cop icelle Cardine chey a terre, et tantost se releva toute seule et ala en la ville du Tort, en l'ostel dudit Guillaume Ros son maistre, où elle fu jusques au mercredi ensuivant, xij e jour dudit mois d'octobre, que elle termina vie par mort. Pour occasion duquel cas ainsi advenu, ledit Guillaume Valée, doubtant rigueur de justice, s'est absenté. [Il devra tenir prison au pain et a l'eau pendant un mois]... Si donnons en mandement par mesmes presentes au bailli de Rouen ... Donné a Paris, le v e jour du mois de novembre, l'an de grace mil CCCC et vint huit et de nostre regne le septiesme.

CLXXXIX*. — Paris, 17 novembre 1428.

Rémision à Vincent le Fèvre, de Lammerville-en-Caux, pour le meurtre de Vincent Louvel, maître du bouclier, avec lequel il s'était battu, par manière de jeu, en revenant de Bacqueville. (JJ 174, n. 240, fol. 107 recto.)

Henry, etc., Savoir faisons, etc., nous avoir receu la supplication des parens et amis charnelz de Vincent le Fevre, chargé de femme et de trois petiz enfans, demourant en la parroisse de Lammerville, ou pais de Caux, près de Torcy, contenant que, ou mois d'octobre l'an mil CCCC XXVII, ou environ, Jehan Louvel, homme vacabonde lors estant ou pais de Bacqueville en Caux et serviteur pour l'aoust qui lors avoit esté de

Thomas de Bertheville, demourant a Rainffreville, a demie heure dudit Bacqueville, Raoul Salhadin, Colin le Maignen, Jehan Bot, Martin Tassel et ledit Vincent avoient souppé audit Bacqueville, en l'ostel de Jehan le Nouvel, boulangier de ladite ville. Et après soupper, qu'ilz estoient tous chargez de vin, se partirent de ladite ville et se mistrent a chemin pour aler a Mesnilz sur Bacqueville vers l'ostel dudit Vincent et dudit Tassel, où il y a demie lieue ou environ. Et en eulx en alant lesdiz Colin le Maignen et ledit Tassel commencerent a jouer du bouclier contre ledit Louvel, qui lors estoit maistre du bouclier et aprenoit les autres. Et tantost icelui Vincent, qui estoit le derrenier, prist l'espée que tenoit ledit Tassel, et jouerent ledit Maignen et lui contre ledit Louvel, qui jouoit d'un baston contre eulx ; et en jouant ledit Louvel fery ledit Vincent ou front dudit baston et lui fist sang. Et quant ledit Vincent se vit navré ainsi a sang, il dist audit Louvel qu'il l'avoit navré et qu'il le navreroit aussi, et le prist et gecta a terre, et puis mist la main a son coustel, et tantost furent departiz d'ensemble par les assistens. Et après ce qu'ilz furent departiz, ainsi que lesdiz Vincent Louvel et les assistens s'en aloient en l'ostel dudit Vincent, ledit Tassel qui s'estoit departi d'avecques eulx, quant il vit ledit Vincent son cousin ainsi navré, comme dit est, retourna en l'heure a l'encontre desdiz Vincent Louvel et assistens, et apporta une espée et un grant plançon ou baston fait en maniere de picque a rouelle de fer, et bailla audit Vincent l'espée, et retint ledit plançon pour lui, en disant audit Vincent : « Mon cousin, defens toy, ilz ne se moqueront pas ainsi de nous, car ilz nous ont batuz, et par le saint Dieu ilz le seront ». Et adonc ledit Salhadin bailla son espée a deux mains audit Louvel, et lui dist : « Defendons nous ! car se ilz dient riens, ilz seront batuz ». Et adonc ledit Louvel vit venir un Anglais nommé Jehan Lauton a leur aide et se mist a fuite. Et lors lesdiz Tassel, Vincent et aussi Jehan Lauton le poursuivirent, et en fuant ledit Jehan Louvel cheut a terre, et en soy relevant ledit Tassel lui donna un cop sur la teste dudit plançon, et ledit Vincent un cop de ladite espée sur la teste, et ledit Jehan Lauton un cop d'un baston. Et adonc ledit Louvel se releva et se mist a chemin pour aler a Rainffreville en l'ostel de son maistre, mais il n'y ala pas, ains se mist au vent et a l'air, et lui ainsi feru et bleicié retourna a Bacqueville en l'ostel dudit Louvel, dont il estoit party, où il a bien demie lieue, et par son mauvais gouvernement, par mal appareillier ou autrement, il ala de vie a trespassement ledit jour, environ six heures après ledit fait ainsi advenu. Pour lequel cas ledit Vincent s'est absenté du pais Si donnons en mandement par ces presentes au bailli de Caux... Donné a Paris, le xvij me jour de novembre, l'an de grace mil CCCC et vint huit, et de nostre regne le septiesme. Ainsi signé : Par le Conseil, J. Thiessart.

CXC. — Paris, 17 novembre 1428.

Rémision à Pierre le Pourcel, de Longueville, inculpé de complicité dans le meurtre de Philippot Ferrant, valet de son frère, que Jean Ouchorp, anglais, a mortellement frappé d'une hache d'armes. (JJ 174, n. 2 52, fol. 1 12 recto.)

Henry, etc., Savoir faisons, etc., nous avoir esté humblement exposé de la partie des parens et amis charnelz de Pierre le Pourcel, povre homme boulangier, aagé de xxvj a xxx ans ou environ, prisonnier es prisons de Longueville pour le conte dudit lieu, chargé de femme grosse et de deux petiz enfans, que come le jour de la feste des Mors derrenierement passé, second jour de ce present mois de novembre, une nommée Guillemine, chamberiere de Michiel le Pourcel, prestre, et cousine frereuse dudit Michiel et dudit Pierre le Pourcel, se feust partie de l'ostel dudit prestre, pour ce, comme elle disoit, que ledit prestre ne la vouloit paier de son salaire et de son service, et s'en feust alée en l'ostel dudit Pierre le Pourcel, frere d'icelui prestre. Ouquel hostel icelui prestre trouva ladite Guillemine, sa chamberiere, a laquele ledit Pierre le Pourcel disoit qu'elle n'estoit pas honnesttement avec ledit prestre, son cousin. De laquele chose icelui prestre, courroucié envers icelui Pierre et ladite chamberiere. sacha hastivement un petit coustel et en vout frapper icelle chamberiere en la presence dudit Pierre le Pourcel, son frere, et de sa femme, lesquelz l'en destourberent. Lequel prestre, perseverant en son ire contre icelle chamberiere, dist qu'il renyoit Dieu s'il ne lui persoit les joues, et en demonstrant et continuant sa male volenté, s'en ala bien hastivement en son l'ostel près d'ilec, où il print une espée et incontinant retourna en l'ostel dudit Pierre le Pourcel, son frere, et ilec tira son espée et en esma a en donner a ladite femme dudit Pierre, son frere, par le ventre, pour ce qu'elle le destourboit a son povoir de sa male volenté. Mais l'espée guenchi entre les jambes d'icelle femme et lui persa sa cocte. Laquele chose voiant, ledit Pierre le Pourcel, cuidant en la chaleur sadite femme avoir esté navrée d'icelle espée, se print au corps dudit prestre son frere, et a force lui osta ladite espée, et se prindrent l'un a l'autre. Ouquel conflict ledit Pierre donna audit prestre, son frere, ung horion ou cop sur le nez du fourrel d'icelle espée, dont il issi sang ung pou sans mutilacion, et puis s'entrelaissierent. Et après ce, ledit prestre, en acroissant et continuant sondit mauvais propos, dist qu'il renioit Dieu qu'il tueroit ledit Pierre le Pourcel, son frere, et bouteroit le feu en sa maison. Laquele noise et menaces ledit Pierre le Pourcel fist savoir a un nommé Jehan Ouchorp, natif de nostre royaume d'Angleterre, son compere. Lequel Anglois pour ce vint soupper avec ledit Pierre, son compere, pour le conforter de ladite noise et pour le compaignier ad ce que ledit prestre, son frere, ne lui feist iceulz desplaisirs. Et après soupper, apperceurent ledit prestre, acompaignié de deux ou trois autres personnes, passant par devant l'ostel dudit Pierre; lequel prestre parloit hault a ceulx qui estoient avec lui. Et lors ledit

Pierre et ledit Anglois, son compere, qui desiroient savoir de quoy avoit parlé ledit prestre, alerent escouter que icelui prestre disoit, et ne le peurent entendre. Et lors ledit Pierre s'en vint en l'ostel d'un nommé Guillemet Labbé, barbier, ouquel ledit Pierre trouva la femme dudit barbier, et lui bailla son espée a garder, et se tint un pou de temps en parlant a elle. Et en soy departant d'elle trouva ledit Anglois, son compere, couchié en un ruel près de l'ostel dudit prestre. Auquel Pierre ledit Anglois dist que avecques ledit prestre avoit un mauvais villain, qui avoit dit un mauvais mot. Sur quoy ledit Pierre dist audit Anglois que ce pouvoit estre le varlet de Robert le Pourcel, frere d'iceulx Pierre et prestre. Et ledit Anglois lut dist que icelui homme avoit volenté de lui faire un mauvais tour ; et si dist ledit Anglois qu'il lui donroit de sa hache; et ledit Pierre lui dist que s'il le fraploit, qu'il ne le frappast que du manche par les espaules. Et après ces paroles, ledit Pierre le Pourcel s'en vint en l'ostel d'un nommé Rogier le Vesié, et hurta a l'uis, cuidant trouver ledit Guillemet Labbé, barbier; et de là s'en vint en son hostel. Et a pou de temps après, sceut que icelui Anglois avoit frappé un nommé Philippot Ferrant, qui estoit issu de l'ostel dudit prestre, et l'avoit frappé d'une hache d'armes un horion ou deux. Et lors ledit Pierre le Pourcel yssi de sa maison, et vit que ledit Anglois mesmes avoit amené icelui Pbilippot Ferrant ainsi navré a l'uis du barbier, lequel huis estoit fermé, et ilec on donna audit Philippot de l'eau par le visage pour le garder de esvanouir, et d'ilec ledit Pierre le Pourcel aida a mener icelui Philippot en l'ostel dudit Robert, son maistre, frere dudit Pierre. Ouquel hostel ledit Philippot fu appareillié, et depuis a vesqu par l'espace de huit jours ou environ, et puis après est alé de vie a trespasement, et dit on communement que s'il eust eu bon appareil, qu'il n'en feust ja mort. Après lequel cas ainsi advenu, ledit prestre cria harou sur ledit Pierre le Pourcel, son frere. Par quoy icelui Pierre fu pris, apprehendé en personne et emprisonné esdictes prisons dudit lieu de Longueville, et ledit Anglois, pour doubte de rigueur de justice ou autrement, s'est absenté du pais, et ledit Pierre le Pourcel est demouré esdictes prisons a grant povreté et misere... Si donnons en mandement aux bailliz de Caux et de Rouen..... Donné a Paris, le xvij e jour de novembre, l'an de grace mil quatre cens et vint huit et de nostre regne le septiesme. Ainsi signé : Par le Conseil. Thiessart.

CXCI. — Chartres, 17 janvier 1429 (n. s.).

Rémission à une femme de Verneuil, impliquée dans le complot ourdi par Jeanne de la Mare, chambrière du géolier du château, dans le but de faire évader les prisonniers français . (JJ 174, n. 262, fol. 1 16 recto.)

Henry, etc., Savoir faisons, etc., nous avoir esté exposé de la partie de Jehanne, femme de Godefroy de l'Espine, demourant a Vernueil, aagée de trente cinq ans ou environ, que, depuis aucun temps ença, elle estant en l'ostel de sondit mary, qui lors estoit absent ou service de nous et de nostre tres chier et tres amé oncle Jehan, regent nostre royaume de France, duc de Bedford, Jehanne, fille de Jehan de la Mare, natife de Saint Martin des Autielz près de Rouen, chamberiere de un nommé Thomas Prestout, natif de nostre pais d'Angleterre, portier et geolier du chastel de Vernueil, vint devers icelle exposante. Et elles estans ensemble, parlerent entre elles de pluseurs choses touchans le fait des prisonniers, qui estoient oudit chastel de Vernueil, et entre autres choses parlerent d'un nomé Cointereau, qui estoit prisonnier es prisons dudit chastel, et tant que icelle exposant dist qu'elle vouldroit que il fist bien et qu'il feust a son aise hors desdictes prisons, pour l'amour et affinité qu'elle avoit a lui pour ce qu'ilz estoient lui et elle d'un pais et avoient esté nourriz ensemble de jeunesse, en priant a icelle chamberiere dudit geolier qu'elle lui feist tout le mieulx qu'elle pourroit, et en disant que ce seroit aumosne de lui bien fere, et aux autres prisonniers semblablement, et que se ilz estoient es bois ou ailleurs, ce ne lui seroit en aucune desplaisance. Et ainsi se departirent jusques a ce que le lendemain, ou assez tost après, Agnès, femme d'un surnommé le Prevost, ala en l'ostel de ladicte exposant et lui dist que la chamberiere dudit Thomas Pristour estoit tres contente d'elle pour ce que derrenierement elle avoit parlé a elle ainsi familiarment sur le fait desdiz prisonniers, et que se il lui plaisoit aler oudit chastel par devers icelle chamberiere, elles en parleroient plus avant ensemble. Laquele exposant lui dist et respondi que oudit chastel elle ne yroit point, pour la crainte et doubte de son mary, qui au temps de son parlement lui avoit defendu que aucunement ne favorisast ou supportast lesdiz prisonniers; et lors lui dist et respondi ladicte Agnès que la chamberiere dudit Thomas l'avoit chargée de lui dire que se il lui plairoit la celer et qu'elle alast par devers elle en sondit hostel, elle lui diroit et rapporteroit tout son secret touchant le fait desdiz prisonniers. Laquele exposant lui respondi que seurement elle se confias en elle et qu'elle alast en sondit hostel quant il lui plairoit et qu'elle ne l'encuseroit de riens. Et après ces choses ainsi parlées, ladicte chamberiere ala en un certain jour par devers ladicte exposant, a laquele, après pluseurs paroles, elle se descouvry et lui dist qu'elle avoit fiancié par nom de mariage l'un desdiz prisonniers nommé Bertran, du pais de Gascogne, et avoit entencion de le faire briefment eschapper avec les autres. Et lors icelle exposant en donnant conseil a ladicte chamberiere que ce seroit bien de ainsi le fere, lui demanda comment il se pourroit fere que lesdiz prisonniers se peussent eschapper. Laquele chamberiere respondi qu'il se feroit bien, et que desja elle avoit advisié la maniere comment il se feroit, pourveu que icelle exposant la vouldist tres bien celer et estre de son aide ; car elle avoit advisié prendre par un filet la mesure du pont estant près la poterne dudit chastel, par devers l'estang

de France, afin de icelle mesure envoyer par devers un nommé Martin du Bost et un autre, nommé Frisot, ou l'un d'eulx, noz desobeissans et adverseres, afin que en une nuit ilz venissent a ladicte poterne, garniz de planches de la longueur dudit pont, acompaignez de cinquante a soixante hommes de fait noz adverseres ; et quant ilz seroient venuz a l'uis de ladicte poterne auroient fers a prisonniers, lesquelz ilz feroient cliqueter de nuit ; et lors ladicte chamberiere droit audit Thomas, son maistre, que les prisonniers seroient eschappez, afin qu'il ouvrist l'uis d'icelle poterne; par quoy icelle chamberiere et un jeune valetton, nommé Macé Drouet, varlet dudit Thomas, qui de ce fere estoit d'accort, seroient contrains bailler les clefz desdictes prisons ausdiz ennemis, et ainsi seroient lesdiz prisonniers délivrés et sondit maistre prins, se prendre le vouloient. Et après ce, icelle chamberiere s'en yroit avec ledit Bertran son fiancié. Laquele exposant respondi a ladicte chamberiere que tres bien garderoit le conseil et que le tour estoit bien et soustillement ymaginé. Et après ce, ladicte chamberiere dist a icelle exposant qu'il estoit necessité de faire venir par devers elles la femme d'un nommé Jehan Trayneau, demourant a Chasteauneuf, afin de lui bailler ladicte mesure du pont, et pour fere savoir ausdiz du Bost et Frisot qu'ilz assemblastent des gens noz adversaires pour les choses dessusdictes faire et acomplir, pour ce que c'estoit la plus propre femme qu'ilz sauroient recouvrer pour fere ce que dit est, car elle estoit commere des dessusdiz du Bost et Frisot ou de l'un d'eulx. Mais icelle chamberiere disoit qu'elle ne sauroit comment la fere venir, se ce n'estoit par le moien d'icelle exposant. Laquele respondi que tres volentiers en feroit son devoir et qu'elle congnoissoit bien lesdiz du Bost et Frisot et ladicte femme aussi. Et partant sans plus fere se despartirent jusques a ce que, a une autre journée lors ensuivant, icelle chamberiere retourna par devers icelle exposant et lui dist qu'elle avoit si bien diligentié sur ce que dit est que la femme dudit Trayneau avoit esté par devers elle et lui avoit compté et recité tout le cas dessusdit, dont elle avoit esté bien contente, et lui avoit baillié la mesure d'icelui pont, afin de la bailler ausdiz adversaires, et si lui avoit accordé retourner par devers elle dedans sept ou huit jours lors ensuivans ; pour quoy lui sembloit que les besongnes estoient en bons termes et que tantost sur ce que dit est auroient tres bonnes nouvelles. Laquele exposant respondi que c'estoit tres bien diligentié, et comment que ce feust, quant icelle femme retourneroit ou que se lesdiz noz adversaires venoient plus tost, que elle en eust congnoissance. Laquele chamberiere lui respondi que si auroit elle, en disant que pour la doubte que icelle femme dudit Trayneau ne fist pas diligemment son devoir de bailler ausdiz noz adversaires ladicte mesure, que elle en avoit encores une autre, que ladicte exposant receut par la main de ladicte chamberiere, en lui disant qu'elle le porteroit ou enveroit par devers lesdiz noz adversaires. Et ainsi se departirent, sauf tant que icelle exposant, qui du tout ne volt pas mectre a effect la volenté de ladicte chamberiere, se transporta jusques auprès du pont du fort, et en l'eaue du fossé d'icelui pont gecta ladicte mesure. Et six ou sept jours après, ou environ, icelle exposant assembla avec un nommé le Petit Guillaume, auquel en parlant de plusieurs choses elle dist et recita toute la vérité du cas, moientant ce que ledit Petit Guillaume lui promist dix escuz et lui dist et defendi que de ce ne parlast ne touchast aucunement a quelque personne, pour ce que son intencion estoit de rescrire ces choses par devers nostredit oncle et par devers nostre amé et feal chevalier Jehan Ffastolf, capitaine dudit Vernueil, afin de avoir des gens de nostre pais d' Angleterre pour recevoir lesdiz adverseres quant ilz vendroient, en priant a ladicte exposant que s'elle avoit aucune congnoissance quant lesdiz adversaires devroient venir, que elle lui feist savoir. Laquele exposant lui respondi que ainsi le feroit elle sans point de faulte. Et ainsi demoura la chose jusques a ce que a une autre journée, a laquele ledit Macé Drouet, varlet dudit Thomas, ala par devers ladicte exposant, en demandant se la femme dudit Trayneau estoit point venue. Laquele exposant lui respondi que non, dont elle eust aucune congnoissance. Et lors lui dist icelui varlet que le deable y estoit et que leur fait estoit tout rompu et que les clefs avoient esté ostées a sondit maistre par le lieutenant du capitaine et que il doubtoit que sadicte maistresse n'eust esté accusée. Laquele exposant, combien que la matiere feust sceue et congneue par la maniere dessusdicte, lui respondi qu'il n'en feist point de doubte et que il deist a sadicte maistresse qu'elle n'eust point de paour. Et lors ledit varlet, en soy confiant es paroles d'icelle exposant, lui dist que la chamberiere dudit Thomas avoit advisié une autre maniere par laquele lesdiz noz adverseres entreroient en la forteresse dudit lieu de Vernueil. Laquele exposant lui demanda par où et comment ce seroit. Lequel varlet respondi que ilz se embuscheroyent en une nuit en la chaucée dudit Vernueil, et a un matin, ainsi que l'en ouvreroit le pont de devers icelle chaucée, ilz entreroient par aucun signe que il leur feroit. A quoy dist ladicte exposant audit varlet que il seroit bon de ainsi le fere, sauf que il convendroit que il sifflast en sa paulme pour leur faire signe. Lequel varlet respondi qu'il ne savoit siffler. Et pour ce lui dist icelle exposant qu'il feist donques qu'il eust un cornet, et se il ne savoit corner, que il y aprinst. Et ainsi se departirent. Et depuis ce, ledit cas a esté tant et si avant esclandré a justice et par le moien dessusdit que toutes les paroles et cas dessusdiz sont demourez de nul effect, et a esté ladicte chamberiere dudit Thomas apprehendée par justice et executée pour ses merites, comme principale faiseresse et coupable dudit cas, et ladicte exposant prise et detenue prisonniere en noz prisons dudit lieu de Vernueil, esqueles elle est en tres grant dangier de finer sa vie miserablement... Si donnons en mandement au bailli d'Alençon ... Donné a Chartres, le xvij e jour de janvier, l'an de grace mil cccc et vint huit et de nostre regne le septiesme. Ainsi signé : Par le Roy, a la relacion de mons. le Regent le royaume de France, duc de Bedford. J. MILET.

CXCII. — Chartres, 1er février 1429 (n. s.).

Rémission à Wautier Pain, anglais, qui, le 8 novembre 1428, s'étant pris de querelle, dans le bourg de Briquebec, avec Robin le Peletier, de Valognes, à propos d'injures proférées par ce dernier contre le régent, duc de Bedford et le comte de Suffolk, a entraîné son adversaire jusqu'au vivier de Glatigny et l'a tellement effrayé par ses menaces que le malheureux, pour éviter sa colère, s'est jeté à l'eau et s'est noyé. (JJ 174, n. 263, fol. 117 recto.)

Henry, etc., Savoir faisons, etc., nous avoir receu l'umble supplicacion des parens et amis de Wautier Pain, natif de nostre pais d'Angleterre, nagaires demourant en la parroisse de Briquebec, contenant que comme, le viij e jour du mois de novembre derrenier passé, ainsi que icelui Wautier passoit par le bourg dudit lieu de Briquebec, il encontra un nommé Robin le Peletier, de la ville de Valoignes ; lequel Wautier, courroucié et aiant souvenance de ce que ledit Peletier avoit en l'ostel d'un nommé Gregoire Abris dit plusieurs mauvaises paroles de nostre tres chier et tres amé oncle Jehan, regent nostre royaume de France, duc de Bedford et de nostre amé et feal cousin le conte de Suffolk et de Dreux, maistre d'icelui Wautier, c'est assavoir que nostredit oncle n'estoit que un buveur de vin d'autant et a plein voirre et qu'il n'estoit bon que pour fere et lever tailles et mengier le peuple ne ne mectoit pas paine a mectre hors de ce royaume noz ennemis et adverseres, et aussi que nostredit cousin de Suffolk n'estoit que un meurdrer de gens, eust pris par la bride le cheval que ledit Peletier chevauchoit, en lui disant : « J'ay a compter a vous du temps passé ». Et par tant s'en alerent tous deux ensemble jusques auprès d'un vivier, nommé le vivier de Glatigny. Et quant ilz furent de costé icelui vivier, ledit Wautier demanda audit Peletier s'il vouloit soustenir les injurieuses et deshonestes paroles qu'il avoit dictes de nozdiz oncle et cousin. Et alors ledit Peletier, en perseverant en sa mauvaise et dampnable volenté, dist qu'il estoit prest de soustenir ce qu'il avoit dit. Et ce fait, descendi de dessus son cheval et mist pié a terre, gecta ses tabar, chapperon et chappel d'entour lui, et tira son espée hors du fourrel pour courre sus a icelui Wautier, ainsi qu'il regardoit derriere lui. Lequel adonc tira un grant coustel qu'il avoit, en disant audit Peletier qu'il remit son espée en sauf ou qu'il ne mengeroit jamais de pain. Et lors ledit Peletier eut si grant paour de lui qu'il gecta sadicte espée hors de son costé et sailli en l'eau dudit vivier. Et quant ledit Wautier apperceut qu'il estoit oudit vivier, lui dist qu'il retournast dehors d'icelui et se tirast a dextre ou il se noierait. Lequel Peletier respondi qu'il n'en feroit riens. Et adonc icelui Wautier gecta une pierre oudit vivier, en disant a icelui Peletier : « Vien par deça, c'est le meilleur chemin ». Et il lui dist : « Je passeray par cy ». Et entra plus avant en icelui vivier, et tant qu'il se noya et ala de vie a trespas. Pour laquelle cause, ledit Wautier, doubtant rigueur de justice, s'est absenté du pais... Si donnons en mandement au bailli de Coustantin... Donné a Chartres, le premier jour de fevrier, l'an de grace mil quatre cens et vint huit et de nostre regne le septiesme. Ainsi signé : Parle Roy, a la relacion de mons. le regent le royaume, duc de Bedford. Seellées de nostre seel ordonné en l'absence du grant. J. de Lunain.

CXCIII. — Paris, 7 février 1429(11.8.).

Rémission à Jean Du Bois, serviteur de la dame d'O, pour avoir, de complicité avec Jouvét du Buisson et Jean Lamy, dérobé plusieurs biens à sa maîtresse et pour avoir fait le guet à l'extérieur de l'église d'O, pendant que ses compagnons volaient d'importantes sommes d'argent cachées à l'intérieur. (ÎJ 174, n. 271, fol. 120 recto.)

Henry, etc., Savoir faisons, etc., nous avoir receu l'umble supplicacion de Jehan du Bois, povre simple homme, chargé d'enfans, contenant comme, pour le temps que icellui suppliant et Jouvét du Buisson estoient serviteurs de dame Alips, dame de O et de Brieuse, ilz eussent prins en la maison d'icelle dame environ xiiij boisseaux que d'orge que de froment, que ilz vendirent pour boire en compaignie, et en faisant ses besongnes. Et puis un an ença ou environ, ledit Jouvét du Buisson et Jehan Lamy, son nepveu, feussent venuz querir par plusieurs foiz ledit suppliant en sa maison, faingnans que ilz le vouldissent mener chacer au bois aux taissons, et tant firent qu'il y ala. Et lui estant avec eulx oudit bois, lui dirent qu'il convenoit que il alast avec eulx en certain lieu où ilz savoient bien qu'il y avoit grant finance. Lequel suppliant simplement, et aussi qu'il ne les eust alors bonnement osé contredire, leur demanda où c'estoit. Lesquelz lui dirent que c'estoit dedans l'église de O. Et le vouldrent iceulx du Buisson et Lami faire entrer dedans icele eglise. Laquele chose il ne vult pas faire ne touchier a icele eglise, mais demoura dehors ; et entrerent iceulx du Buisson et Lami dedans, où ilz prindrent et desserrèrent cinquante quatre pieces d'or, c'est assavoir trois saluz, huit moutons, un quart de noble et le demourant en escuz d'or, qu'ilz trouverent muciez en terre en icele eglise dedans une saliere d'estaing, appartenant a icele dame de O, ou a son chappellain et serviteurs, lesquelz icelui Buisson savoit bien, comme il semble audit suppliant. Prindrent avec ce en ladicte eglise en une boiste de bois trois escuz d'or et environ trente solz tournois en monnoie, appartenans, comme on dit, a Robert Gassé, prestre, chapelain de ladicte eglise de O. Prindrent avec ce en une aultre place en ladicte eglise une pinte d'estaing, pleine de monnoie de blans doubles, de dix deniers tournois la piece, et aussi en

une huche dix huit pains blans, du pris de deux deniers tournois la piece. Et ce fait, issirent iceulx du Buisson et Lami de ladict eglise, et rompirent une verriere d'un des costez de ladict eglise, afin que on cuidast que ce eussent fait aucuns brigans, qui eussent desrobé ladict eglise, et trouverent ledit suppliant dehors, qui les atendoit, et ne s'en estoit osé aler. Auquel ilz dirent telz mots ou semblables en substance : « Fuions nous en, nous avons de la chevance assez ». Ausquelz ledit suppliant, comme tout esfreié et courroucié de ce, dist qu'il ne s'en fueroit point. Et quant ilz lui oïrent ce dire, oultre son gré et volenté lui baillerent huit frans en monnoie et dix huit pieces d'or, c'est assavoir xiiij escuz d'or, un salut, deux moutons et un quart de noble, avecques encores un escu en or, et environ dix solz tournois en monnoie ; laquele icelui suppliant print par crainte et doubte que, se il ne l'eust prise alors, qu'ilz le peussent avoir tué, et aussi en ferme propos et volenté, lui estant hors de dangier, de rendre et restituer icele finance aux parties a qui il pourroit savoir qu'elle appartiendroit. Et, ja soit ce que de son propre mouvement et sans contraincte, tantost qu'il fu hors de leur dangier, et avant que la viijme feust passée et qu'il trouva son point, le plus secrètement et honnorablement qu'il a peu, il ait faicte restitution a partie, excepté seulement d'un escu et un mouton d'or, et environ six solz tournois de monnoie que il lui convint necessairement despendre en la compagnie et avec les dessusnommez, avant qu'il peust ne osast soy separer ne departir d'eulx, neantmoins, a l'occasion des fais et cas dessusdis et doubtant rigueur de justice, il s'est absenté et rendu furtif du lieu... Si donnons en mandement par ces mesmes presentes au bailli d'Alençon... Donné a Paris, le vije jour de fevrier, l'an de grace mil quatre cens et vint huit et de nostre regne le septiesme. Seellées de nostre seel ordonné en l'absence du grant. Ainsi signé : Par le Conseil. Ogkr.

CXCIII*. — Paris, 12 février 1429 (n. s.).

Rémission à Guillaume Choynet, marin des faubourgs de Caudebec pour le meurtre de Jean Chambellan, dit Labbé, de Sainte-Croix-sur-Aizier, son cousin germain, qui, en depot du marché conclu entre eux, refusait de labourer une pièce de terre appartenant audit Guillaume. (JJ 174, n. 273, fol. 121 recto.)

Henry, etc., Savoir faisons, etc., nous avoir oy l'umble supplicacion de Guillaume Choynet, marinier, aagié de xxxvj a quarante ans ou environ, povre homme chargé de femme ençainte preste d'acouchier et de iiij petiz enfans, demourant a present es forbourg de la ville de Caudebec, contenant que en l'an mil quatre cens dix huit ou environ, ouquel temps il estoit demourant en la parroisse de Sainte Croix soubz Aisié, ou diocese de Rouen, il et Jehan Chambellan dit Labbé, de ladict parroisse de Sainte Croix, et lequel estoit cousin germain dudit suppliant, firent certain marchié entre eulx, par lequel ledit Chambellan promist et fu tenu de labourer les terres et heritages dudit suppliant pour certain pris et somme d'argent convenu entreulx. Sur quoy il receut des lors d'icelui suppliant certaines erres. Mais ce nonobstant, ledit Chambellan ne tint ne acompli pas sa promesse dudit marchié, ains laissa lesdictes terres dudit suppliant a labourer, ja soit ce qu'il le acceptast et en print erres, comme dit est, ot tant que par la faulte dudit Chambellan elles demourerent sans labour pour icele année, en quoy icelui suppliant ot grant dommaige et de ce fu moult interessé et par ce doulent et courroucié. Et advint que aucun temps après, ledit suppliant, en passant son chemin pour aler veoir sesdictes terres, eust veu aux champs ledit Chambellan, qui labouroit une piece de terre autre que celle dudit suppliant et en delaissant les siennes a faire, qu'il avoit promis a labourer comme dessus est dit. Par devers lequel il feust alé et lui dist pour quoy il ne lui accomplissoit sondit marchié et ne labouroit sesdictes terres aussi bien que les autres, actendu les erres dessusdictes ; et sur ce eussent eu plusieurs paroles ensemble, et tant que icelui suppliant, doulent et courroucié comme dessus est dit, de chaude cole par ce que ledit Chambellan lui respondoit orgueilleusement et malgracieusement, eust sachié son espée qu'il portoit aval les champs et du plat d'icelle espée lui donna un cop sur les espauls. Et adonc ledit Chambellan se retourna et print un baston dont il chassoit ses chevaulx et en donna audit suppliant un cop par la teste, tellement que il cheut a terre. Et depuis se releva ; et lui relevé, doubtant que ledit Chambellan ne recouvra de rechief sur lui, en eulx entretenans et combatant l'un contre l'autre, lui donna ledit suppliant du trenchant de sadict espée un cop par le jarret de l'une de ses jambes, et cheurent a terre ensemble l'un sur l'autre, car en vérité il n'avoit pas entencion de le tuer ; et en eulx combatant et donnant l'un a l'autre plusieurs horions. Et ces choses ainsi faictes, laissa ledit suppliant ledit Chambellan oudit champ sans lui fere autre mal ; et tantost après fut mené en son hostel par aucunes gens de ladict ville. Et depuis ledit cas ainsi advenu, vesqui par l'espace de cinq mois ou environ, au bout desquelz cinq mois il ala de vie a trespassement. Et neantmoins ledit suppliant ne parti depuis le pais mais y a tousjours demouré et encores demeure en bonne paix, sans ce que aucune chose on lui en ait demandé par justice ne autrement, et jusques a ce que puis nagaires par aucuns ses hayneux a esté fait citer contre office. Pour cause et occasion duquel fait et cas ledit povre suppliant doubte de ce estre durement traictié et molesté... [Six livres à payer qui seront distribuées par l'audiencier et un mois de prison au pain et a l'eau]. Si donnons en mandement aux bailliz de Rouen et Caux... Donné a Paris, le xij e jour de fevrier, l'an de grace mil quatre cens et vint huit et de nostre regne le septiesme. Seellées de nostre seel ordonné en l'absence du grant. Ainsi signé : Par le Conseil. Oger.

Rémission à un marin de Belleville-sur-Mer, lequel étant allé, en compagnie d'un autre marin de Dieppe, passer la soirée dans un hôtel mal famé de cette dernière ville, y fit rencontre d'un Anglais, nommé Guillaume Quot, qui l'insulta et voulut l'emmenner en prison, prétendant que la place d'un homme marié n'était pas dans cette maison : les trois hommes étant sortis dans la rue, une rixe éclata entre eux, et l'Anglais reçut un coup de bâton, dont il mourut. (JJ 174, n. 281, fol. 124 verso.)

Henry, etc., Savoir faisons, etc., nous avoir oy l'umble supplicacion de Laurenchon Clemence, povre homme marinier, chargé de femme et de quatre petiz enfans, natif et demourant en la ville de Belleville près Dieppe, ou bailliage de Caux et viconté d'Arques, contenant que, la veille Sains Simon et Jude derrenierement passée, icelui suppliant et Perrenot de Beauvoy, aussi marinier, demourant audit lieu de Dieppe, son compaignon et qui aloient ensemble en la mer en peschant des harens, se feussent partiz du hable dudit lieu de Dieppe, du vaissel dont estoit maistre Guillot le Normant, devers le soir, et alez boire de la servoise en l'ostel Jehan Baudouin, où pend l'enseigne de la Hache, en la rue des Wez, auprès du lieu où demeurent les fillectes communes. Et après qu'ilz orent ylec beu, se feussent partiz pour eulx en retourner en leur vaissel. Et en passant par devant l'uis où demeurent lesdictes fillectes communes, eust regardé et veu ledit suppliant une desdictes fillectes, nommée Jehanneton du Val, a laquele il eust dit : « Je sens trop bone porée, scez tu où elle est ? » Laquele lui respondi : « Laurenchon, elle est ceans a ton commandement ». Et dont lui respondi ledit suppliant : * J'en yray mangier ». Alors ledit suppliant et ledit de Beauvoy entrerent en l'ostel desdictes fillectes, et là eulz entrez trouverent icele Jehanneton, Jehannecte du Bois et une autre dont ne scet le nom, et dist icelui suppliant audit de Beauvoy : « Compaignon, prenez deux potz et alez en l'ostel Colin de Greiges, mon hoste, querir deux potz de servoise, que nous buvrans ycy ». Lequel de Beauvoy y ala. Laquele Jehanneton dist audit suppliant : « Si tu veulx souper, il fault mettre la table ». Lequel respondi : « Je le vueil bien ». Et fu ladicte table mise; et au retour dudit de Beauvoy mengerent ladicte porée et des harens sors et blans, et beurent lesdiz deux potz de servoise. Après lesqueles choses ainsi faites, lesdiz suppliant et Beauvoy, voulans partir et eulx en retourner en leurdit vaissel et qu'ilz disoient adieu l'un a l'autre, oient hurter a l'uis desdictes fillectes, euquel hostel ilz estoient. Et lors ladicte Jehanneton dit a ladicte du Bois : « Jehannecte, alez ouvrir l'uis : c'est Guillaume Quot, anglois. Qui ne lui ouvrera l'uis, il le rompra ». Laquele Jehannecte du Bois ala ouvrir ledit huis et entra oudit hostel. Lequel, là entré, trouva lesdiz suppliant, Beauvoy et fillectes ensemble, qui se vouloient departir, et dist icelui Guillaume audit Laurenchon en son langage : « Laurenchon, vous estez marié ; est ce vostre estat d'estre cy ? Par saint George, moy mene vous en prison, en la cour du Polet ! » Lequel lui respondi : « Guillaume, je n'y suis pour nul mal et n'ay fait a nully desplaisir. S'il vous plaist boire avec nous, je vous donray volentiers d'un pot de servoise ». Adonc respondi ledit Guillaume qu'il ne buvroit point de servoise. Pour quoy ledit suppliant envoya querir un pot de biere, dont il fist boire ledit Guillaume et le but presque tout. Et depuis encores en beurent deux autres potz ensemble, que paierent lesdiz suppliant et Beauvoy. Après ce fait, ledit Guillaume se leva, sa hache ou guisarme en sa main, et dist audit suppliant : « Vous avez vostre femme et enfans et n'est pas vostre estat d'estre au bordel. Par saint George, je vous menray en prison. Levez vous bien tost, ou si non, je vous ferray et vous fendrai la teste ». Lors ledit suppliant se leva disant : « Je n'ay en riens conversé avec les fillectes et si ne leur ay fait aucun desplaisir. Je vous prie que vous ne diez point que vous m'aiez trouvé ceans et je vous donray volentiers le vin, pour ce que c'est lieu dissolu », en lui disant outre, pour ce qu'il avoit sa hache ou guisarme haulcée pour le ferir : « Guillaume, se vous me ferez, vous ne ferrez jamais homme ». Lequel Guillaume print tantost icelui suppliant par la main, en lui disant : « Je vous menray en prison ». A quoy icelui suppliant lui respondi : « Je ne suis point aveugle, je yray bien sans mener ». Lequel Guillaume lui dist : « Or alez donc devant ». Et lors ledit suppliant ala devant et ledit Guillaume après. Et quant ilz furent dehors ladicte maison, bien tost après, eulx estans en la rue, icelui Guillaume frappa par deux ou trois foiz ledit suppliant du bout du manche de sondit baston par le dos, tant que a l'une des foiz a bien poy qu'il ne le fist cheoir a dens sur les quareaulx. Pour quoy icelui suppliant lui dist : « Guillaume, ne me frappez plus, deportez-vous ». Lequel Guillaume s'arresta a pisser contre la paroy de la maison desdictes fillectes et lesdiz suppliant et Beauvoy s'en aloient devant ; et en eulx en alant icelui de Beauvoy dist audit suppliant : « S'il nous fiert plus, je lui donray d'un cailleu ». Lequel Guillaume oy ces motz et lors s'en fouy après eulx, sondit baston a son col, disant : « Me menaciez-vous ? Par saint George, moy vous bat assez ! » Et quant ledit de Beauvoy vit qu'il affuioit après eulx et qu'il estoit assez près d'eulx, il dist audit suppliant : « Laurenchon, ostez-lui son baston, ou il nous pourroit trop bien battre ». Lequel Laurenchon lui osta sondit baston assez près de l'ostel de Jehan Varin, dudit lieu de Dieppe. Et lui aiant ledit baston, le print par le bout de devers le fer et de l'autre bout frappa icelui Guillaume par la teste ; duquel horion il l'abati a terre a l'envers. Et ce fait, iceulx suppliant et Beauvoy le laisserent ylec et s'en alerent jusques devant l'ostel aux Connins, près de l'eglise Saint Jaques près dudit lieu de Dieppe, et après ce retournerent veoir se ledit Guillaume s'en estoit point alé, et trouverent qu'il estoit assis sur les quareaulx de la rue au lieu où ilz l'avoient laissié. Lors le laisserent sans parler a lui et s'en alerent en leurdit vaissel. Et depuis que ledit suppliant y fu arrivé,

retourna pour savoir se ledit Guillaume estoit point party du lieu où il l'avoit laissé et ledit de Beauvoy demoura en icelui vaissel. Lequel suppliant en retournant au lieu où il l'avoit laissé, il encontra icelui Guillaume auprès du quarrefour de la Vase dudit lieu de Diepe, vit icelui Guillaume qui s'en aloit en l'ostel du lieutenant du capitaine dudit Dieppe, son maistre, vit entrer dedans. Lequel, comme l'en dit, s'en ala chier tout vestu en la chambre où il avoit acoustumé chier, où il fu toute la nuit, sans soy faire visiter garder de froit, et le lendemain matin l'en trouva qui ne parloit mais et lui sailloit le sang par le nez. Par et son petit gouvernement, ledit jour Sains Simon et J environ nonne, il ala de vie a trespasement. Pour cause et occasion duquel fait, icelui suppliant, doubtant rigueur de justice, s'est absenté du pais... Si donnons en mandement aux bailli de Caux et viconte dudit Arques ... Donné a Paris, le vendredi benoit autrement dit xxv e jour du mois de mars, l'an de grace mil quatre cent vint huit et de nostre regne le septiesme. Ainsi signé : requestes tenues par mons. le Regent, duc de Bedford esqueles vous les evesques de Noyon et d'Evreux, premier President de Parlement, le seigneur de Sains Pierre et pluseurs autres estoient. Oger.

CXCV. — Paris, 4 avril 1429.

Rémission à Jean et Colin le Souldaier, de Saint-Laurent-de-Cuves, pour le meurtre de Jean Guillart, qui s'opposait au passage de leur charrue sur une pièce de terre lui appartenant. (JJ 174, n. 294, fol. 129 recto.)

Henry, etc., Savoir faisons, etc., nous avoir receu l'umble supplication de Jehan le Souldaier, chargé de femme et d'enfans, et de Colin le Souldaier, son frere, povres laboureurs de la parroisse Saint Laurens de Cuves, contenant comme, environ le viije jour de juillet derrain passé, lesdiz supplians pour fere leur labour atthelerent et ordonnerent leur charue de telz harnois de beufs comme ilz avoient et se mistrent a chemin pour aler avec leurdicte charue labourer en une piece de terre a eulx appartenante. Et en alant entrerent en une piece de terre, appartenant a Guillaume Guillart et a Jehan son filz, qu'ilz avoient acquise de Jehan le Souldaier, oncle desdiz supplians. Par laquele piece de terre iceulx supplians avoient droit de voie pour aler et venir labourer leurdicte terre avec leurs charues et charrectes, ainsi qu'ilz le portent par lettres. Et comme ilz furent entrez en ladite piece de terre appartenant ausdis Guiliars, en alant leur chemin a leurdit labour, lesdiz Guillaume et Jehan diz Guiliars, eschauffez et meuz en mauvais et grant courage et ardeur, temptez de l'ennemi, survindrent rigoureusement et en grant fureur ausdiz supplians, et estoit ledit Guillaume garny d'un baston et ledit Jehan avoit un coustel sacqué hors de la gayne, lequel il tenoit en son poing tout nu. Et lors lesdiz Guiliars chaudement et de courage merry demanderent ausdiz supplians qui avoit ce fait, qui par ylece avoit charié. Lesquelz supplians leur respondirent moult doucement que s'avoient ilz fait et que ilz y avoien[t] droit de charier et passer pour leurdit labour et ne les y devoit on empeschier. A quoi lesdiz Guiliars leur respondirent en ceste maniere : « Vous n'y passerez point ; nous l'avons acquise de vostre oncle ». Et lesdiz supplians leur distrent : « Il ne nous chault de vostre acquisition, car nous y avons droit de voie et le porton par lettre ». Et de rechief lesdis Guiliars jurerent l'un par le ventre Dieu et l'autre par la teste au benoist fils de Dieu qu'ilz n'y passeroient point. Et lesdiz supplians, en gardant leur droit et possession, distrent que si feroient, et se voudrent mectre a chemin de aler a leurdit labour. Lesquelz Guiliars distrent derechief ausdiz supplians : « Vous mentez comme garçon, vous n'y avez nul droit et n'y passerez point ». Et adonc lesdiz supplians respondirent : « Nous ne sommes point garçons ; vous mentez comme villains de ce dire ». Et lors ledit Jehan Guillart, garny dudit coustel tout nu en son poing, vint audit Jehan le Souldaier et le frappa durement par derriere des poins, tellement qu'il le fist aler bien loing de lui ; et bientost se retourna ledit Jehan Guillart en perseverant en son mauvais propos pour venir courir sus avec ledit coustel audit Colin le Souldaier qui tenoit et gardoit ledit harnois de beufs, sans nul mal faire ne dire. Et quant ledit Jehan le Souldaier vit ledit Jehan Guillart aler droit a sondit frere, le coustel ou poing, doubtant qu'il le vouldist tuer, pour ce que c'estoit un homme de divers courage, qui en sa fureur faisoit moult a doubter, print un petit baston qui soustenoit les mancherons de la charue, et pour garder que sondit frere ne feust occis par ledit Jehan Guillart dudit coustel qu'il avoit tout nu ou poing, et venoit tout droit a sondit frere, lui en donna un coup par la teste au dessus de l'oreille senestre dudit baston, dont il n'issit point de sang; et cheut ledit Jehan Guillart a terre sur le costé, et depuis se releva et vint derechief ausdiz harnois de beufs, et assez tost après se assist a terre et ilec fina ses jours. Et doubtent lesdiz supplians que, a l'occasion dudit coup, et pour ce que autresfoiz avoit esté blecié en la teste et ou corps et grandement navré par un nommé Robin Roullandin, la mort se soit ensuie en la personne dudit Jehan Guillart... Si donnons en mandement par ces presentes au bailli de Coustantin... Donné a Paris, le iiij e jour d'avril, l'an de grace mil quatre cens et vint neuf, après Pasques, et de nostre regne le septiesme. Ainsi signé : Par le Roy, a la relacion du Conseil. Oger.

CXCVI. — Paris, 30 avril 1429.

Rémission à Robin Le Boulenger, de Gaillardbois, pour le meurtre d'un Anglais, qui voulut lui enlever une jument attelée à sa charrue, un jour qu'il labourait son champ près de Cressenville. (JJ 174, n. 288, fol. 127 recto.)

Henry, etc., Savoir faisons, etc., nous avoir receue l'umblé supplicacion des parens et amis charnelz de Robin le Boulanger, povre simple homme de labour, chargé de femme, aagé de xl ans ou environ, natif de Fleury en la forest de Lions, nagaires demourant a Gaillart Bos en Veulquelsin près d'Escouyes, en la chastellenie d'Andeli, contenant comme, environ le mois de juillet en l'an mil quatre cens vint trois, ledit Robin, lors demourant audit lieu de Gaillart Bos, a un certain jour, ainsi que ledit Robin labouroit et menoit sa charrue aux champs, environ neuf heures du matin, feust venu par devers lui un compaignon, qu'il ne congnoissoit ni de quel pais il estoit ne se il estoit brigant ou Anglois, lequel dist audit laboureur qu'il vouloit avoir une jument dont il labouroit ; qui lui respondi qu'il ne lui bailleroit pas se il ne disoit qui il estoit et où il la vouloit mener. Lequel compaignon lui dist en ceste maniere: « Ribault, descelle la bien tost et la me bailla (sic) ». Lequel Robin lui dist encores que non feroit. Et après plusieurs paroles, ledit compaignon se print a desceller ladicte jument pour la vouloir emmener; et pour la garder ledit laboureur ala prendre sadicte jument par la bride, disant qu'il ne l'emmenroit pas. Et adont icelui compaignon, d'un baston qu'il tenoit frappa sur ledit povre laboureur plusieurs cops. Et pour ce, icelui laboureur, soy veant ainsi batu et feru en faisant son labour, et en cuidant garder le sien, eu peril de sa vie, et ne savoit l'entencion dudit compaignon, se prist et de fait osta a icelui compaignon ledit baston, et en ce conflict lui en donna un seul cop sur la teste près de l'oye, duquel cop il chey a terre, et incontinant ou bien tost après fina sa vie. Et ce fait, ledit Robin, courroucié de tele aventure lui estre advenue, laissa son labour qu'il faisoit près de Croissanville et s'en ala a son hostel avecques sa voiciture audit lieu de Gaillart Bos, demie lieue ou environ dudit lieu de Croissanville. Et ce jour mesmes se confessa dudit cas a un prestre qu'il trouva, et en soy confessant se conseilla audit prestre savoir qu'il en feroit, qui lui conseilla qu'il alast oster le mort où il estoit et le meist ou bois et le despoullast et donnast sa despoullé pour Dieu pour l'ame d'icelui defunct, comme si fist il, afin qu'il ne feust trouvé sur son labour, et ne retint riens du sien. Et le lendemain vindrent ceulx de la garnison de Gaillart par le pais et trouverent le traingnement et le corps un bien peu bouté dedans le bois et dont il estoit parti. Pour laquele cause ilz prindrent les habitans dudit Croissanville, entre lesquelz estoit le frere dudit Robin, et les menerent a Gaillart moult destroitement liez prisonniers. Et quant ledit Robin le sceut, les descoupa au mieulx qu'il pot et se absentia. Et vindrent adont ceulx de ladicte garnison en son hostel pour le cuidier trouver, et prindrent tous ses biens. Pour occasion duquel cas, il ne se osa puis tenir au pais... Si donnons en mandement par ces mesmes presentes au bailli de Rouen ... Donné a Paris, le derrain jour d'avril, l'an de grace mil quatre cens vint neuf et le septiesme de nostre regne. Ainsi signé : Par le Roy, a la relacion du Conseil. G. Ferrebouc.

CXCVI*. — Paris, 4 mai 1429.

Rémision à Etienne Hart, écossais au service de Guillaume Champagne, écuyer anglais, pour le meurtre de Colin des Haies, de Saint-Germain-la-Campagne, en la vicomté d'Orbec, qui lui refusait de l'avoine pour ses chevaux. (JJ 174, n. 297, fol. i3i recto.)

Henry, etc., Savoir faisons, etc., nous avoir receu l'umblé supplicacion des prouchains amis et affins de Estienne Hart, natif des parties d'Escosse, contenant comme, a la victorieuse journée nagaires obtenue moiennant la grace de Nostre Seigneur devant Vernueil ou Perche, ledit Estienne eust esté prins prisonnier par ung escuier anglois, nommé Guillaume Champagne, auquel il eust requis que par son moien il feust receu a estre et demourer en nostre obeissance, et a ceste fin l'eust ledit Guillaume Champagne présenté a nostre tres chier et feal cousin le seigneur de Scalles, lequel l'eust receu a estre nostre homme lige et subget, et de ce eust fait le serement en tel cas acoustumé. Lequel Estienne a tousjours depuis esté et demouré continuellement en nostre obeissance, en la compaignie dudit Champagne et se soit bien et loyaulment et diligemment occupé tant de jour comme de nuit ou fait de noz guerres comme bon, vray et loial subject, sans depuis avoir esté trouvé en aucune maniere en aucune faulte. Et il soit ainsi que, a certaine journée qui fu entre la Toussains et Noel l'an mil CCCC vint quatre, ledit Estienne se feust transporté en l'ostel d'un nommé Colin des Haies, en la parroisse de Saint Germain de la Champagne en la vicomté d'Orbec, auquel des Haies il eust demandé ung boissel d'avoine pour ses chevaulz; lequel lui respondi qu'il n'en auroit ja avoine. Et ledit Estienne lui respondi que se il ne lui en bailloit, il tueroit un petit pourcel qui estoit en son hostel, combien qu'il n'eust aucune volenté ou intencion de ce faire. Après lesqueles paroles ledit des Haies se feust parti hors de sondit hostel, et eust appelé deux de ses voisins, lesquelz prindrent chascun un baston de defense en leur main et vindrent avec icelui des Haies, qui tenoit en sa main une coignée. Et ja soit ce que ledit Estienne s'en alast son chemin sans emporter aucune chose de l'autrui, ledit des Haies et sesdiz deux voisins le poursuirent en lui courant sus. Lequel Estienne, pour resister a leur entreprise et mauvaise volenté, se descendi de son cheval et tira son espée, en disant a icelui des Hayes qu'il se cessast de le poursuivre ou il le courrouceroit. Ce non obstant ledit des Hayes se aproucha dudit Estienne et le frappa sur l'espaule de ladicte coignée, telement qu'il le fist cheoir a terre. Lequel Estienne tantost se releva et frappa ledit des Haies sur la teste de son espée ung seul coup telement que au bout de deux jours après mort s'en ensuy en la personne d'icelui des Haies. Depuis lequel cas ainsi advenu, ledit Estienne a tousjours

continué et fréquenté le fait de noz guerres a toute diligence possible, sans avoir obtenu sur ce de nous aucune grace ou remission, ignorant que mestier lui en feust, attendu la maniere du cas advenu. Pour quoy nagaires ou content et debat de certaines paroles litigieuses meues entre le viconte d'Orbec et icelui Estienne, ledit viconte, tant pour ce que pour le cas dessusdit, ait fait mettre ledit Estienne en prison es ceps et es fers, desqueles prisons il s'efforça de issir, ce qu'il ne pot fere, et depuis icelui viconte l'ait fait mettre en question et gehaine tres cruelle, et après l'ait fait mener en jugement en la cohue de Bernay, en laquele il s'est rapporté a l'enquete du pais, et depuis a esté mis es prisons dudit lieu, esqueles il est encores en dure et piteuse molestacion de son corps et de ses membres et en voie de piteusement et miserablement finer ses jours... Si donnons en mandement par la teneur de ces presentes au bailli de Rouen... Donné à Paris, le iiiij e jour de may, l'an de grace mil CCCC et vint neuf et de nostre regne le septiesme. Ainsi signé : Par le Roy, a la relacion du Conseil. Neelle.

CXCVII. — Vernon, 8 septembre 1429.

Rémision à Jean Burnel, viconte de Carentan, et à Elliot Le Bret, son lieutenant à Saint-Lo, enfermés dans les prisons du roi pour avoir négligé de remettre à la justice une lettre que Thomas de Percy, partisan français, avait adressée audit viconte et dans laquelle il lui offrait de lui obtenir, en cas de besoin, un saufconduit du capitaine du Mont-Saint-Michel. (JJ 1 74, n. 32, fol. 11 verso.)

Henry, etc., Savoir faisons, etc., nous avoir receu l'umble supplicacion de Jehan Brunel, viconte de Carenten, et de Elliot le Bret, son lieutenant a Saint Lo, contenant que comme, puis le temps de la conqueste de feu de tres noble memoire nostre tres chier seigneur et pere, cui Dieu pardoint, ilz aient esté et soient vrais hommes liges et jurez de nostredit feu seigneur et pere et de nous, et en fait de justice et autrement se soient maintenuz et gouvernez honnorablement, et exposez a l'expulsion et condampnacion des brigans et autres noz ennemis et adverseres. Et environ le mois d'aoust derrain passé, un nommé Thomas de Percy, nostre ennemi et adversere, eust envoié par devers ledit Elliot le Bret, lieutenant d'icelui viconte, deux lettres closes, l'une adreçant audit viconte et l'autre audit lieutenant, dont celle d'icelui lieutenant contenoit come ledit de Percy lui prioit qu'il envoiast a sondit maistre les autres lettres closes qui a lui se adressoient et qu'il en eust response dedans le mardi ensuivant. Et iceles deux lettres closes ainsi receues par ledit lieutenant par la main de un notable homme du pais, nommé et appelé maistre Almaurry de la Liserne, eust icelui lieutenant envoié audit viconte les lettres closes d'icelui de Percy, qui lors, come l'en dit, furent receues par la femme dudit viconte pour l'absence d'icelui son mary. Et icelui viconte venu en sondit hostel, les lui eust sadicte femme baillées et presentées, et d'iceles fist ledit viconte ouverture et lecture, et contenoient en effect et substance comme feu Nicole Potier, en son vivant viconte de Bayeux, duquel ledit viconte avoit esté clerck, avoit prié audit Thomas de Percy que, se le temps tournoit, il essoiast a sauver le corps dudit viconte envers les gens de son party. Et, pour acomplir la requeste audit Potier, icelui Thomas, qui avoit en espouse sa fille, lui avoit accordé d'en fere son povoir. Et pour ce rescrivait icelui de Percy audit viconte que, s'il vouloit avoir sauf conduit du capitaine du Mont Saint Michiel, il lui feroit avoir. Après laquele lecture d'iceles lettres, ledit viconte, mal content d'iceles, eust, lui estant en son hostel audit lieu de Carenten, appelé sa femme et Guillaume Adigard, son lieutenant general, et leur eust monstré et leu lesdictes lettres. Et après icele lecture, desplaisant du contenu en iceles, et que ledit de Percy lui avoit ainsi rescript, dist que ce avoit esté fait pour lui porter dommaige et desplaisir, veu les execucions et condampnacions faictes par lesdiz supplianz, eulx et chascun d'eulx, sur lesdiz brigans et ceulx tenant le parti dudit Percy, et pour ce desiroit ledit de Percy la mort et destruccion desdiz supplians. Et en ces termes fu ledit viconte si troublé et courroucé que en la chaleur il dessira et despeça iceles lettres, sans avoir memoire de les apporter ne monstrer a justice. Et avec ce, avoit ledit viconte rescript par devers ledit Elliot, son lieutenant audit lieu de Saint Lo, touchant la matiere presente, les moz qui ensuient : « Et quant est de la *brunecte*, dont en iceles lettres est faite mencion, de present ne si tost come Thomas m'a escript ne la pourroie envoyer querir, mais lui faites dire que je le mercie tant come je puis et qu'il la me garde pour le pris jusques ad ce que je lui face savoir, car elle pourroit estre perdue pour le dangier du chemin d'entre Carenten et Saint Lo », ou teles ou semblables paroles en effect. Lequel mot de *brunecte* estoit ainsi nommé par ledit viconte en lieu de *saufconduit*, mais il ne l'avoit ainsi osé escrire pour le dangier qui en pouvoit advenir. Ja soit ce que de lui ne par lui ne du fait dudit le Bret n'y a riens de leur pourchas ou requeste, et aussi ne s'en est ensuy aucun inconvenient ne dommaige a nostre seigneurie ne au pais, et n'y a en ce fait si non l'inorance et simplesce desdiz supplianz de non avoir monstrées lesdictes lettres a justice, ce que ledit viconte devoit fere, pour raison duquel cas ainsi advenu, noz officiers audit lieu de Carenten et Saint Lo ont prins et apprehendé les corps, biens meubles et heritages d'iceulx supplianz et iceulx mis en noz prisons... Si donnons en mandement au bailli de Coustantin... Donné a Vernon, le viije jour du mois de septembre, l'an de grace mil cccc xxix et de nostre regne le septiesme. Ainsi signé: Par le Roy, a la relacion de mons. le Regent le royaume de France, duc de Bedford . J . de Rinel.

Rémission à un écuyer anglais de la garnison de Saint-Laurent-des-Mortiers, en Anjou, qui, fait prisonnier par les Français de Sablé, a consenti, pour sauver sa vie, à leur livrer un gentilhomme normand de Cormeilles, Jean d'Anisy, rallié à la cause anglaise. (JJ 174, n. 333, fol. 144 recto.)

Henry, etc., Savoir faisons, etc., a nous avoir esté exposé de la partie des amis charnelz de Thomas Cooley escuier anglois, nagaires soubzdoier en la garnison de Saint Laurens des Mortiers en Anjou, soubz nostre amé et feal chevalier le sire de Tallebot, que comme, puis an et demi ença ou environ, ledit Thomas se feust mis en ladite garnison, où il eust demouré par l'espace d'un an ou environ. Et ce fait, a un certain jour après, ledit Thomas et ses compaignons de ladite garnison feussent alez courir sur les champs, come gens d'armes ont acoustumé fere en tel cas. En laquele course faisant, ledit Thomas et sesdiz compaignons furent et eussent esté rencontrés de nos ennemis ; desquelz icelui Thomas eust esté pris et mené prisonnier en la ville de Sablé, en laquele il fu mis a rançon a la somme de neuf cens saluz et les droiz pour ce deuz et acoustumez. Et il soit ainsi que, pour ce que ledit Thomas ne pot paier icele somme, qui estoit trop excessive pour lui eu esgart a sa faculté, demoura en ladite prison par l'espace de iiiij mois ou environ, a grant peine, povreté et misere, partie du temps es fers et partie es ceps de piez et de mains et en basse fosse. De laquelle prison il ne peut issir sinon qu'il baillast avant tout euvre bons pleiges et hostages de paier sadicte rançon ou de le ramener prisonnier. Lesquels pleiges ledit Thomas eust bailliez pour lors de trois gentilzhommes, et adonc ala hors de prison pour fere sa finance, où il demoura par l'espace de trois sepmaines ou environ, qu'il ne peut onques fere ni finer desadicte finance devers ses amis ne autres, qu'il avoit pour ce requis et priez de lui aidier a la paier. Et assez tost après, pour deschargier sesdiz pleiges et caucions, retourna et feust retourné ledit Thomas audit lieu de Sablé par devers sesdis maistres, en leur disant et signifiant qu'il ne pavoit finer de sadicte rançon. A quoy lui fu respondu par sesdis maistres qu'ilz le feroient mourir de mauvaise mort et pourrir en prison, puisqu'il ne pavoit paier sadicte rançon, s'il ne faisoit tant que il eust et recouvras un chevalier armignac, qui estoit capitaine de Courssillon lez la Charité sur Loire (1), lequel estoit prisonnier aux Anglois de la garnison de Laval, a nostre bien amé Guillebert Halssalh, chevalier, capitaine dudit Laval. Lequel Thomas Cooley eust dit et respondu pour lors a sesdis maistres a un mot pour tous que dudit chevalier avoir ne recouvrer il n'eust peu ou pourroit finer, actendu que il n'avoit pas la puissance ne faculté de paier la somme pour laquele il tenoit et estoit prisonnier. Et adonc sesdis maistres de ce furent moult courrouciez et indignez contre lui et le mirent en plus dure prison es fers, es ceps et en la fosse la moitié que devant, et lui haulserent sa finance et rançon de plus qu'elle ne montoit de la somme de II e saluz. Et endura ledit Thomas ceste peine et penitence par l'espace de xv jours ou environ, au pain et a l'eau. Et iceulx xv jours passez, sesdis maistres le firent tirer et mectre hors de sadicte prison, pour derechief parler avec lui. Et ledit Thomas actaint devant eulx, lui fu par eulx demandé : « Or ca, Thomas, quelle est vostre entencion? Vous veez et savez bien que vous n'avez nulz amis qui vous vueillent aidier a paier vostre rançon. Rendez vous François et tenez nostre parti, et nous vous quicterons de vostre rançon ». Lequel Thomas a ce leur eust respondu et respondi qu'il aimeroit mieulx estre mort que de ce fere ne relanquer son souverain seigneur ne changier son party. Lesquelz sesdis maistres a ce lui dirent et respondirent ces moz : « Or advisez, Thomas, puisque vous ne voulez fere ne accomplir nulles des choses dessusdictes, vueilliez savoir que de vostre vie il est fait, se vous ne faites tant que vous nous livez et bailliez un homme nommé Jehan d'Anisy, normant, demourant lez Cormeilles en Normandie ». Par lequel Thomas, doutant la mort, leur fu respondu a ce : « Je n'ay que d'une mort a mourir; vueillez bien savoir que ce me sera bien griefve chose a fere ; mais toutesvoies pour mectre mon corps et tout a l'avanture, j'en feray le mieulx que je pourray ». Lesquelz ses maistres et lui feussent et eussent esté de ce d'accord, et leur bailla et eust baillié ledit Thomas quatre Anglois en hostage pour partir de sadicte prison et aler accomplir ce que dit est. Et assez tost après se partirent et fussent partiz dudit Sablé lesdis Thomas et trois Armignacs en sa compaignie, en prenant le chemin pour aler droit audit lieu de Cormeilles : et en chevauchant trouverent ledit Jehan d'Anisy, lequel ledit Thomas, pour eschever la mort, la peine de prison qu'il avoit longuement eue et soufferte, et pour estre quicte de sadicte rançon, livra par la main ausdiz trois Armignacs, pour et ou nom de sesdis maistres, ledit Jehan d'Anisy, pour en fere ce que bon leur sembleroit. Pour lequel cas ledit Thomas, doutant rigueur de justice, se seroit et est absenté dudit lieu de Cormeilles, de sadicte garnison et du service de sondit maistre, si comme l'en dit... Si donnons en mandement par ces mesmes presentes au bailli de Rouen... Donné a Paris, le xviiij e jour de septembre, l'an de grace mil quatre cens vint neuf et de nostre regne le septiesme. Ainsi signé : Parle Roy, a la relacion de mons, le Regent le royaume de France, duc de Bedford. J . DE RINEL

(1) 11 y a ici une faute du copiste : la Charité-sur-Loire pour La Chartre-sur-Loir. Le château de Courcillon est situé dans la commune de Dissay-sous-Courcillon (Sarthe, arr. Saint-Calais, cant. Château-du-Loir), au sud-ouest et à peu de distance de La Chartre. Il appartenait à cette époque à Jean de Bueil, l'auteur du curieux roman historique intitulé le Jouvence! (Edit. Lecestre pour la Soc. de l'Hist. de France, Introd., p. xii)

CXCIX. — Au siège devant Louviers, 22 juillet 1431.

Rémission octroyée par Robert de Willughby, comte de Vendôme et de Beaumont-sur-Oise, lieutenant du roi Henri VI, à Perrot Amiot, d'Aubevoye, ancien dizainier de cette paroisse, qui, après la prise de Louviers par les Français, s'est mis à leur service et a participé à plusieurs expéditions et vols à main armée commis par eux en Haute-Normandie. (Dans des lettres de confirmation du roi Henri VI, datées de Paris, le 2 août 1432 (i). (JJ 175, n. 1 32, fol. 41 verso.)

... Robert de Wylughby, conte de Vendosme et de Beaumont sur Oise, sire de Wylughby, de Montdoubleau et de Beaumesnil, lieutenant du Roy nostre souverain seigneur en ceste partie, Savoir faisons a tous presens et advenir nous avoir receu l'umble supplicacion d'aucuns des parens et amis de Perrot Amiot, povre homme laboureur, aagé de xxij ans ou environ, chargé de femme et de pluseurs petiz enfans, nagaires demourant en la parroisse d'Aubevoye, en la viconté de Vernon, contenant comme, tantost après la prise de Louviers faicte par les ennemis et adverseres du Roy nostredit seigneur en l'an mil cccc xxix derrenierement passé, icelui Amiot, qui estoit resident et faisant son labour en son hostel audit lieu d'Aubevoye, eust esté pluseurs fois cuidé prendre par lesdiz ennemis, qui souvent y venoient pour y trouver ledit Amiot, en disant se ilz le tenoient que ilz le feroient mourir, pour ce que, ouparavant ladicte prise de Louviers, icelui Amiot estoit l'un des dixainiers de ladicte parroisse d'Aubevoye, pour fere resistance contre lesdiz ennemis, quant ilz venoient courir en ladicte parroisse et ou pais d'environ et faisoit assembler a celle intencion les gens de sa Xme . Pour la doubte et crainte desquelz ennemis et de leurs menaces, icelui Amiot, qui n'osoit plus demourer en sondit hostel, come mal meu et en desesperance, se absentia. Et après par l'introduccion et amonnestement d'aucuns desdiz ennemis, et par temptacion de l'ennemy, s'en ala demourer audit lieu de Louviers, où il se mist a servir comme varlet de guerre un appellé Jehan Masles, de la garnison dudit lieu, et puis delaiissa ledit Jehan Masles et servy ung autre nommé Cabot, de ladicte garnison. En continuant lesquelz services, icelui Amiot a esté avec lesdiz ennemis par l'espace d'un an et demi ou environ, et ce pendant a esté a pluseurs courses, destrousses et entreprises, en la compaignie d'iceulx ennemis. Entre lesqueles entreprises ledit Amiot fu a prendre le verdier de Lyons et le seigneur de Radepont, qui paierent IIIIxx saluz de finance ou environ, dont il ot sa part, et estoient a fere ladicte prinse le nombre de dix huit personnes. Aussi ledit Amiot fu a destrousser quatre Anglois, qui furent prins par lesdiz ennemis et emmenez prisonniers audit lieu de Louviers, desquelz quatre Anglois il s'en rendi deux avec lesdiz ennemis et promistrent tenir leur parti et les autres deux moururent en prison par ce qu'ilz ne peurent paier leurs finances. Item ledit Amiot fu avec sesdiz maistres a destrousser pluseurs bateaulx sur la riviere de Seine, chargiez de vivres, blefs, vins et autres marchandises, dont il a eu son butin, come les autres qui estoient a fere lesdictes destrousses. Item fu ledit Amiot a prendre deux aumailles près Longueville et une autre vache qui estoit a ung sergent de Vernon ; et aussi a pluseurs courses que firent lesdiz ennemis devant Rouen, Evreux, Mente et Vernon, et en la compaignie d'aucuns d'iceulx ennemis qui destrousserent marchands de blé, qui aloient audit lieu de Mante, et y furent prises neuf bestes chevalines. Item fu ledit Amiot a prendre d'un marchand de Vernon un cheval, une aumaille et un veel, et un autre marchand alant a Paris sur lequel fu prins un beuf et une vache. Item fu ledit Amiot a prendre un bourgeois de Dangu en sa maison ; et aussi a esté a pluseurs autres rancontres dont il n'est recors, mais en a eu sa part des butins et gaignes qui y ont esté faictes. Et ainsi ledit Amiot a demouré et communiqué avec lesdiz ennemis ledit temps durant, et jusques a environ le derrenier jour de may l'an mil CCCC XXXI derrenierement passé que il partit dudit Louviers, voiant qu'il avoit mesprins et soy repentant, en intencion de vouloir revenir arriere fere son labour et demourer avec sadicte femme et enfans. A l'occasion desqueles choses, icelui Amiot, qui a grant desir et affection de soy reduire arriere et remectre en l'obeissance du Roy nostredit seigneur, pour desormais y vivre de son labour, come il faisoit paravant lesdiz cas advenuz, n'oseroit retourner au pais ne y demourer pour doubte de rigueur de justice, mais lui esconventroit du tout guerpir le pais... Si donnons en mandement aux bailliz de Rouen et d'Evreux, au viconte de Vernon...
Donné au siège devant Louviers, le xxije jour de juillet, l'an de grace mil CCCC XXXI.

CC. — Paris, 12 décembre 1431.

Rémission à Guillaume Bischopton, ex-capitaine de Château-Gaillard, détenu prisonnier à Rouen, sous l'inculpation d'avoir, par sa négligence, laissé les Français s'emparer de cette forteresse. (JJ 175, n. 16, fol. 7 recto.)

Henry, etc., Savoir faisons, etc., nous avoir receu l'umble supplicacion de Guillaume Bischopton, chevalier, jadis capitaine de Gaillard, contenant que comme, pour lors que icelui Bichopton estoit capitaine dudit Gaillard sur Seine, ouquel chastel estoit Barbasen nostre prisonnier, icelui chastel eust esté prins par noz ennemis et adverseres ; a l'occasion de laquele prise icelui Guillaume eust esté mis en noz prisons de

Rouen, soubz umbre de ce que aucuns ont voulu dire que par negligence, inadvertance ou foible resistance a la defense d'icelui chastel iceulx ennemis avoient icelui prins ; esques prisons il a esté detenu destroitement par l'espace de xxxij sepmaines, a grant povreté et misere de son corps, telement qu'il est moult debilité de son oye, et après fu eslargy prisonnier a certain jour, et est en adventure d'avoir moult a souffrir, se nostre grace ne lui est sur ce impartie ; requerant humblement que, attendu que la prise d'icelui chastel avoit esté faicte par faulte, coulpe et moien de un nommé Colin le Francois, qui faisoit le guet pour le jour oudit chastel, et de ung Anglois, nommé Thomas Surych, de son aliencie, comme ledit Colin a confessé, qui pour la cause a esté executé puis nagaires au siege de Loviers, et aussi ledit Anglois pour le cas s'est absenté, et que ledit chevalier fu mis a rençon oudit chastel et son filz prisonnier pour celle cause, et que grandement a perdu de sa chevance a icelle prinse, et la longue prison, paine et dommage que a souffert en corps et biens, et qu'il a soustenu a ses despens les souldoiers de sa retenue pour les mois d'octobre, novembre et decembre mil cccc xxix et aussi xxj hommes de guerre a lui ordonnez de creue outre sadicte retenue pour le mois de septembre mil cccc xxix, sans de ce avoir aucun paiement, nous lui vueillons nostredicte grace impartir... Il sera tenu paier pour nous et en nostre acquit la somme de IIm l. t. a nostre amé et feal chevalier Raoul Boutellier, capitaine des ville et chastel du Crotoy, pour les gaiges de la garde et capitainerie desdictes ville et chastel pour demi an et lui sera delivré ung coffre qui est arresté en nostre ville de Londres en nostre main, appartenant audit chevalier, ensemble les biens qui sont dedens icelui coffre, par tele condicion et maniere que, se il avoit dedens icelui coffre en biens, or ou argent qui vaulsissent plus de deux mil livres tournois, le surplus de la valeur d'icele somme sera et demourra au prouffit de nous. Si donnons en mandement au bailli de Rouen... Donné en nostre ville de Paris, le xije jour de decembre, l'an de grace mil cccc xxxj et de nostre regne le Xme . Ainsi signé : Par le Roi, a la relacion du grant Conseil estant par devers lui. J. DE RINEL.

CCI. — Paris, 24 decembre 1431.

Rémision à Jean Graindorge, d'Echalou, pour le meurtre de Jehannin Grente, de Bellou-en-Houlme, avec lequel il s'était pris de querelle au sujet du paiement de certains appatis levés sur les habitants de cette dernière paroisse. (JJ 175, n. 19, fol. 8 recto.)

Henry, etc., Savoir faisons, etc., nous avoir receu l'umblé supplication des parens et amis charnelz de Jehan Graindorge, le jeune, de la parroisse d'Eschallou en la viconté de Faloise, povre simples homs laboureur, aagié de xx ans ou environ, chargé de femme, contenant que come, depuis la saint Michiel derrenierement passée, ledit Graindorge feust alé disner en l'ostel d'un nommé Jehan Rousselaie, ouquel icelui Graindorge et pluseurs autres estoient alez veoir la femme d'icelui Rousselaie qui gesoit d'enfant. Auquel disner, quant il fu bien près de nuit, vint un appelé Jehannin Grente, lequel se assist a la table près dudit Graindorge. Et quant ilz orent fait bonne chiere ensemble, prendrent a parler des appatiz que les parroissiens de la parroisse de Bellou, où demouroit ledit Grente, estoient contrains de paier a noz ennemis et adverseres, et condescendirent a parler d'un nommé Robin Boudart, lequel estoit prisonnier de nosdiz ennemis a la forteresse d'Aunou et dist icelui Graindorge que ledit Boudart n'avoit riens voulu paier desdiz appatiz et que c'estoit grant pitié qu'il n'avoit voulu aidier aux autres quant ilz avoient esté prins, et que mallegangne envoiast Dieu a ceulx qui lui aideroient. Lequel Grente, oyant ces paroles, indigné contre ledit Graindorge, lui dist : « Mais a ton visaige, tu as fait que faulx garson de le dire ». Lequel Graindorge, en soy excusant, dist alors audit Grente : « Sauve vostre grace, je ne suis point garson ! » Lequel Grente dist : « Si es et as fait que faulx garson de l'avoir dit ». Lequel Graindorge dist lors a icelui Grente qu'il avoit menti comme garson avoistre. Et ces paroles dictes, icelui Grente print un pain, dont il voulu fraper ledit Graindorge. Lequel, pour doubte que ledit Grente ne le ferist, se leva de la table pour soy eslongnier d'icelui Grente. Et aussi se leva ledit Grente et print icelui Graindorge a deux poings a la gorge, et convint que ceulx qui presens estoient se levassent pour lui oster ledit Graindorge d'entre ses mains. Et ce fait, eulx qui les avoient departiz retournerent eulx asseoir a la table, cuidans que ledit Grente se rasseist semblablement. Et quant icelui Grente les vit rassis et qu'ilz furent esloingnez de luy, il se print a courre après ledit Graindorge, lequel il print derechief a la gorge a deux poings, dont il l'estraingnoit tres fort, come se il le vouldist estrangler. Lequel Graindorge lui dist pluseurs foiz qu'il laschast sa prinse ou qu'il le lui feroit bien laschier. Et pour ce que ledit Grente n'en vouldt riens fere et que ledit Graindorge doubtoit qu'il le estranglast ; icelui Graindorge tira son coustel et frappa ledit Grente ung coup entre deux costez. A l'occasion duquel cop, icelui Grente, come l'en dit, ala de vie a trespasement, par mauvaise garde ou autrement, dedans trois jours ensuivans ledit cas advenu. Pour lequel cas, icelui Graindorge, doubtant rigueur de justice, s'est absenté et n'ose converser ne reparier au pais... Si donnons en mandement par ces presentes au bailli de Caen ... Donné a Paris, l'an de grace mil CCCC XXXI, le xxiiije jour de decembre et de nostre regne l'an dixiesme. Ainsi signé : Par le Roy, a la relacion du Conseil. Lommot.

CCI*. — Paris, 26 decembre 1431.

Rémision à Jehanninot Mestier, du Tréport, brasseur de cervoise, qui, s'étant réfugié en Picardie pour fuir les menaces de mort de certains Anglois de la garnison d'Eu, avec lesquels il était en rivalité au sujet d'une femme, est tombé entre les mains d'une bande de brigands, et, les ayant suivis dans leurs expéditions, a pris part à une attaque d'environ 80 d'entre eux contre la ville du Tréport. (JJ 1 75, n. 27, fol. 10 verso.)

Henry, etc., Savoir faisons, etc., nous avoir esté exposé de la partie des parens et amis charnelz de Jehanninot Mestier, natif de la ville du Tresport, aagé de xxiiij ans ou environ, que, depuis deux ans en ença ou environ, ledit Jehanninot retourna du pais de Picardie, où il estoit alez paravant demourer pour aprandre le mestier de brasseur de servoise, en ladicte ville du Tresport, pour demourer en icele et ylec faire sondit mestier. Lequel Jehanninot, demourant en ladicte ville et faisant sondit mestier, pour occasion d'une femme ot débat avec aucuns Anglois de la garnison d'Eu, tant que paroles se meurent et que lesdiz Anglois le appelerent traicte armignag, et le menacerent de tuer. Et lors lui doubtant lesdictes menaces, fu conseillé par ses amis de soy absenter et aler demourer oudit pais de Picardie comme paravant, pour eschever la fureur desdis Anglois, jusques ad ce que on eust chevy a eulx. Et pour ce se parti ledit Jehanninot, et en alant fu encontré des brigans qui le menerent prisonnier au bois, et d'ilec a Beauvais, où ilz lui dirent que, se il ne aloit en leur compaignie aux bois fere comme eulx, ilz le feroient pendre parmy la gorge. Pour laquele cause lui, doubtant la mort, s'accompagna avec lesdis brigans, avecques lesquelz il a repaïré et fréquenté esdiz bois et ailleurs, et pendant ce a pillié, robé et raençonné plusieurs marchans anglois et autres. Et aussi durant ledit temps a esté en la compaignie de iiijxx brigans et autres noz adverseres pour rober et piller ladite ville du Tresport ; en retournant de laquele ville encontrerent une garnison d'Anglois, qui les combattirent et tant que d'un costé et d'autre en ot plusieurs navrez et deux Anglois mors en la place. Et lui considerant les maulx dessusdiz, meu de repentance, a fait requerir au capitaine d'Eu, qui a present est, un respit pour un mois pour parler a ses amis et pour requerir pendant ledit mois nostre pardon et remission des choses dessusdictes, lequel respit lui a esté octroïé par ledit capitaine ; et neantmoins ne se oseroit tenir ne demourer au pais, doubtant rigueur de justice... Si donnons en mandement au bailli de Caux... Donné a Paris, le xxvje jour de decembre, l'an de grace mil CCCC trente et ung et de nostre regne le dixiesme. Ainsi signé : Par le Roy, en son Conseil, ouquel mons. le duc de Bedford, mons. le cardinal d'Angleterre, vous les evesques de Beauvais, de Noyon et de Paris, le conte de Warrewik, messire Jehan Le Clerc, le Premier President et plusieurs autres estoien t. J. Milet.

CCII. — Paris, 26 décembre 1431.

Rémision à Jean le Barbé, laboureur du Mesnil-Verclives, pour avoir tué un homme d'armes anglais, qui voulait lui enlever la meilleure des juments attelées à sa charrue, et s'être mis ensuite au service de partisans français, qui l'ont emmené dans leurs expéditions. (JJ 175, n. 35, fol. i3 recto.)

Henry, etc., Savoir faisons, etc., nous avoir receu l'umble supplicacion des parens et amis charnelz de Jehan le Barbé, povre jeune homme de labour, aagé de xxij ans ou environ, chargé de femme et enfans, nagaires demourant au Mesnil-soubz-Varclive, en la chastellenie d'Andely, contenant comme, environ la Magdelaine derrain passée ot un an, ledit Barbé feust alé mener sa charrue vers les parties du grant chemin de Gisors. Et tantost après qu'il ot commancié a labourer, vint a lui un compaignon qu'il ne congnoissoit ne de quelle langue il estoit, fors qu'il suppose qu'il estoit de la nacion d'Angleterre, pour ce qu'il ne parloit pas droitement françois et aussi qu'il s'estoit parti dudit chemin d'une compaignie d'Anglois pour venir a lui. Lequel compaignon, nonobstant qu'il feust bien monté, eust prins et descellé la meilleur de ses jumens, sans laquele il n'eust peu labourer. Pour laquele cause, ledit Barbé, veant qu'il estoit exillié et destruit s'il perdoit sadicte jument, se feust mis en fait de suir ledit compaignon jusques a un passage ou bonne ville, en esperance qu'il peust ravoïr icele jument. Lequel compaignon lui eust dit qu'il ne le poursuint point et que s'il ne retournoit, il le tueroit. Et, pour ce que ledit Jehan Barbé, perseveroit tousjours a la poursuite, icelui compaignon retourna sur lui, tira son espée et d'icele le fery plusieurs horions de taille a sang et a plaie. Lequel Barbé, pour eschever a son povoïr qu'il ne le tuast, s'en couru et retourna le courant droit a sa charrue, et d'icele se targa au mieulz qu'il pot, afin que ledit compaignon, qui estoit a cheval, ne le ferist plus. Lequel compaignon, veant que bonnement ne le povoit ferir a son plaisir, lui estant sur son cheval, mist pié a terre et vint contre lui pour le tuer et murdrir. Mais ledit Barbé, pour eschever la mort, s'aproucha hastivement de lui et l'embrassa par le corps, afin qu'il ne lui feist mal de ladicte espée, et tant tira contre lui qu'il lui osta sadicte espée, et s'en print ledit Barbé a courir atout ladicte espée, pour eschever qu'il ne lui feist plus mal. Lequel compaignon print a courir après. Et quant ledit Barbé vit qu'il approuchoit de lui, doubtant que, se plus le povoit tenir, qu'il ne le tuast, en s'en fuïant getta arriere main deux ou trois horions d'icele espée, dont il fery ledit compaignon, telement que, pour occasion de ce, icelui compaignon ala tantost de vie a trespasement. Et ledit Barbé se retray sur sadicte jument au plus tost qu'il poult droit a la ville, et fu poursuy d'un home d'armes, qui se disoit maistre dudit compaignon, lequel le actaigny et lui donna un horion ou deux de son espée ; mais pour ce qu'il le vit ainsi plaié et navré, non sachant que ledit compaignon feust mort, le laissa aler. Et se retray icelui Barbé es bois, et, pour occasion

dudit cas, se absenta et ne se osa monstrer ne veoir au pais, et se retray es parties du pais de Caux, où il fu par aucun temps, gagnant sa vie a labourer de la peine de son corps. Mais pour ce qu'il se doubta qu'il ne feust congneu, pour ce que au lieu où il demouroit repairoient plusieurs Anglois, et mesmes des gens de sa congnoissance, se mist a chemin a s'en aler vers les parties de Chartres, en intencion de y gangnier sa vie a labourer. Et en alant son chemin, fu rencontré par plusieurs brigans et autres noz ennemis et adverseres vers les parties de Beu, et fu prins prisonnier et le tindrent par certain temps au bois et le voudrent mectre a finance. Et pour eschever les contrainctes qu'ilz lui faisoient et vouloient fere, leur compta le cas de sa fortune. Et après fu par eulx exorté et contrainct a les servir et s'en aler avec eulx. A laquele chose, simplement et parce qu'il ne savoit que fere, se accorda, et depuis a esté en la compaignie de nosdis ennemis a Beauvais et ailleurs, avec iceulx esté a plusieurs destrousses et a querir et demander plusieurs appatz pour le maistre qu'il servoit et autres, dont il n'a que poy ou neant admené, sinon seulement d'avoir povrement sa vie. Et puis nagaires, veant l'iniquité et male vie d'iceulx ennemis, repentant des cas par lui commis, s'est d'eulx departi et retrait vers les parties de sa nacion, en ferme propos que jamais pour quelque chose ne retournera en leur compaignie et se tient et demuce en lieux solitaires en nostre obeissance, dont il ne s'oseroit bougier pour doubte de rigueur de justice... En faveur de sesdicte femme et enfans et a nostre joyeux advenement, sacre et couronnement de France en nostre bonne ville de Paris... Si donnons en mandement par la teneur de ces presentes au bailli de Rouen et des rassors et exemptions de Gisors... Donné a Paris, le xxvj e jour de decembre, l'an de grace mil CCCXXXI et de nostre regne le dixiesme. Ainsi signé : Par le Roy, en son Conseil, ouquel mons. le duc de Bedford, mons. le Cardinal d'Angleterre, vous les evesques de Beauvais, de Noyon et de Paris, le conte de Warrewik, messire Jehan le Clerc, le Premier President et plusieurs autres estoient. J. Millet.

CCIII. — Paris, 26 décembre 1431.

Rémission à Robinet Le Doyen, de Lyons-la-Forêt, accusé d'avoir noué des intelligences avec les Français qui se sont emparés, au mois de septembre 1429, de la forteresse d'Estrepigny, et d'avoir accompagné Ricarville, partisan ennemi, dans deux expéditions qu'il fit aux environs de Beauvais. (JJ 175, n. 57, fol. 19 recto.)

Henry, etc.. Savoir faisons, etc., nous avoir esté exposé de la partie de Robinet le Doien, natif de la forest de Lyons, ou bailliage de Gisors, que ou temps de sa jeunesse, c'est assavoir xiiij ans a ou environ, lui estant en la ville de Lyons, en l'ostel de son pere, il avoit ung frere ainsné de lui, nommé Pierre le Doien, lequel estoit capitaine ou pais de Beausse d'une place nomée Villers, laquele il gardoit pour feu nostre tres chier et tres amé cousin le duc de Bourgongne, derrenierement trespasé, cui Dieu pardoint. Avec lequel frere ledit exposant s'en ala et se mist du tout a la guerre et tenant le parti de nostredit cousin de Bourgongne. En laquele partie il a esté depuis ledit temps jusques en l'an mil CCC XXVII, qui s'en retourna audit lieu de Lyons, où il a exercé l'office de sergenterie de la chastellenie dudit lieu de Lyons, a present a Jehan le Doien, a present son frere ainsné, a cause de son heritage. Et en ce faisant fu prins icelui exposant par noz adverseres et mené prisonnier a Baugency sur Loire. Auquel lieu il fu villainement traictié par nosdis ennemis et mutilé de son corps et de ses membres et come tout destruit de sa chevance, tant pour ce qu'il avoit toujours esté de la partie de nostredit feu cousin de Bourgongne come a cause de ce qu'il estoit audit office de sergent au temps de ladicte prise. Et après ce qu'il fu hors de ladicte prise, et jusques au mois d'aoust l'an mil CCC XXIX, que nosdiz adverseres se bouterent a puissance en nostre royaume de France et leur furent baillez et delivrez le chastel d'Aubmalle, la ville de Beauvais et autres places, lors a nous obeissans; auquel temps aucuns compaignons de ladicte forest de Lions et du pais d'environ d'Estrepigny furent d'accord ensemble d'entrer oudit chastel d'Estrepigny, pour icelui livrer et baillier en la main de nosdiz adverseres. Lesquelz compaignons trouverent ledit exposant en ladicte ville d'Estrepigny, le jour de la feste saint Jehan Decolace, auquel jour la foire a acoustumé seoir en icele ville, et lui demanderent s'il vouloit estre avec eulx ad ce faire et il auroit sa part de ce qu'ilz devoient avoir. A quoy il leur respondi que non et que ja ne lui advendroit, en soy excusant du mieulx qu'il povoit et en leur remonstrant que ce n'estoit pas chose raisonnable a fere, et tant se departi d'eulx. Mais, ce non obstant, ils continuerent toujours en leur propos, tant que leur volenté en fu acomplie. Et au jour de la prise dudit chastel, Pierre Larcevesque, lieutenant pour lors de nostredit bailli de Rouen, survint en la ville, cuidant recouvrer ledit chastel, pour ce que par adventure il avoit oy nouvelles de leur fait. Pour laquele venue dudit lieutenant, lesdis compaignons se doubterent que ledit exposant ne les eust accusez pour les fere prendre, et dirent ces choses a celui qui lors se disoit seigneur de Rambures, qui estoit oudit chastel. Lequel ou contemp de ce, jura que, s'il povoit tenir ledit exposant, il le feroit mourir. Lesqueles choses venues a la congnoissance d'icelui exposant, veant que nosdiz adverseres a grant puissance estoient par tout le pais et que plusieurs villes et citez de nostredit royaume de France leur faisoient obeissance, doubtant que se ilz gangnoient le pais, il lui feust neccessité d'estre furtif ou temps advenir, trouva moien par aucuns de la congnoissance dudit de Rambures, auquel yl avoit eu congnoissance au temps de sadicte prise, qu'il ala parler a seurté audit de Rambures et soy excuser. Lequel de Rambures receipt son excusacion et fu content de lui, pour

ce qu'il le congnoissoit et avoit veu en la compaignie de nostre tres chier et tres amé oncle le duc de Bourgongne, au temps que ledit de Rambures le servoit. Pour cause de laquele contrainte et pour doubte desdiz adverseres, qui couroient par tout le país, se tint et demoura oudit chastel jusques ad ce qu'il trouva compaignie et s'en ala en la ville de Beauvais, ouquel lieu il avoit bonne congnoissance d'aucuns des bourgeois et gens notables ses parens. Par le conseil desquelz il s'est tenuz en ladicte ville paisiblement a l'aide de sesdiz parens et amis, sans soy armer ne fere fait de guerre, excepté que par ce que on parloit sur lui en disant qu'il tenoit le parti de Bourgongne et avoit eu par plusieurs foiz debat a ceste cause, et pour ce qu'il ne se vouloit armer, il acheta un cheval, sur quoy il alla courre par deux foiz seulement en la compaignie d'un nommé Ricarville, sans estre armé fors seulement de son espée, et sans ce que en iceles courses feust fait par lui aucun dommaige, destourbier ou desplaisir a quelque personne de nos subgez obeissans. Et neantmoins ledit exposant pour les causes dessusdictes n'oseroit demourer soubz nous et en nostre obeissance, ainsi qu'il le desire, doutant rigueur de justice... Si donnons en mandement au bailli de Rouen et de Gisors... Donné a Paris, le xxvj^e jour de decembre, l'an de grace mil CCCC XXXI et de nostre regne le Xe. Ainsi signé : Par le Roy en son Conseil, ouquel mons. le duc de Bedford, mons. le Cardinal d'Angleterre, vous les evesques de Beauvais, de Noyon et de Paris, le conte de Warrewik, le Premier President de Parlement et plusieurs autres estoient. J. Milet.

CCIV. — Paris, 2 janvier 1432. (n. s.)

Rémision à Pierre des Buques, de la paroisse du Pin, pour le meurtre du valet d'un homme d'armes anglais qui parcourait le pays en pillant les bonnes gens et qui, sur le refus dudit Pierre de lui donner quatre boisseaux d'avoine, l'avait frappé à coups de bâton. (JJ 175, n. 18, fol. 7 verso.)

Henry, etc., Savoir faisons, etc., nous avoir receue l'umblé supplicacion de Pierre des Buques, povre homme laboureur, chargé de femme et d'enfans, demourant es ville et parroisse de Nostre Dame du Pyn, en nostre bailliage de Rouen, contenant comme le jour de feste Saint Luc, ou mois d'octobre derrain passé, ledit suppliant lors estant en la court de l'ostel de sa demourance audit lieu, où adont il s'occupoit a lever certain sien fumier, afin de fere aler l'eaue autour pour icelui fumier fere plus tost pourrir, vint ylec monté sur un cheval ung paige, nommé Richard, varlet de Jehan le Portier, homme d'armes anglois. Lequel Richard, en soy adreçant a la personne dudit suppliant, lui dist que il lui feist finance de quatre boisseaulx d'avoine. A quoy ledit suppliant lui respondi que il ne pourroit ce fere et qu'il n'en avoit point. Après laquelle responce ainsi faicte, ledit Richart dist a icelui suppliant que il se avançast de ce fere. Et pour ce que il vist que ledit suppliant ne se mouvoit aucunement d'aler fere finance de ladicte avoine, et aussi que la seconde foiz avoit respondu que il n'en avoit point, icelui Richart, lui estant sur ledit cheval, meu de felon courage, frappa d'un baston qu'il tenoit ledit suppliant. Pour quoy icellui suppliant lui pria qu'il se deportast atant de le battre et villener et que pour verité il ne pourroit finer de ladicte avoine et que se aucune autre chose vouloit de ses biens, qu'il en prenist souffisaument. Pendant le temps duquel debat survint ylec une femme nommée Marion, habitant desdictes ville et parroisse, laquele, comme poursuivant ledit Richart et soy complaignant d'icelui, disoit et dist lors que il et ung autre paige, son complice, lui avoient prins, tolu et emporté de force certains ses biens, et entre autres choses y avoit ung sac que ledit Richart avoit en sa possession. Lequel suppliant qui lors vit et entendit ces choses, et mesmement pour ce que de ce icele Marion se doulousoit moult, icelui suppliant lui dist qu'elle se appaisast et teust. Et adonc ledit Richart, lui estant ainsi sur ledit cheval, bouta dudit baston et de l'un de ses piez icelui suppliant si efforceement et outrageusement que icelui suppliant chey a terre. Et après ce qu'il fu relevé, et ainsi comme il se cuidoit deffouir pour evader la fureur dudit Richard, qui encores estoit sur ledit cheval, icelui Richart se descendi a pié et le rassailli de rechief et de fait le frappa dudit baston. Et lors ledit suppliant, qui tenoit une pelle ferrée dont il relevoit ledit fumier, soy veant ainsi villené, batu et vituperé sans cause raisonnable, se retourna contre ledit Richart, et lui esmeu de chaude cole, yré et courroucé, frapa un cop de ladicte pelle sur la teste dudit Richart, jusques a effusion de sang. Lequel Richart ainsi frappé se departi d'ilec et s'en ala en la ville de Lisieux, qui est a trois lieues d'ilec ou environ, en laquelle ville, où pestilence d'impidemie lors avoit cours, il acoucha malade au lit, et en la fin de onze jours après ensuivant ledit cas advenu, il ala de vie a trespas. Pour occasion duquel cas, ledit suppliant s'est absenté dudit lieu et pais... Si donnons en mandement au bailli de Rouen... Donné a Paris, le deuxiesme jour de janvier, l'an de grace mil CCCC et trente ung et de nostre regne le dixiesme. Ainsi signé : Par le Roy, a la relacion du Conseil. G. Ferrebouc.

CCIV*. — Paris, 6 mars 1432 (n. s.)

Rémision à Sézire, veuve de Guillaume Liégart, demeurant à Houville, près les Andelys, pour avoir reçu chez elle son fils, Toussaint Liégart, brigand, et s'être mise en peine de lui trouver une barque sur laquelle il pût passer la Seine à Muids. (JJ 175, n. 75, fol. 24 recto.)

Henry, etc., Savoir faisons, etc., nous avoir receu l'umble supplicacion des amis charnelz de Sezire, vefve de feu Guillaume Liegart, nagaires demourant en la parroisse de Houville près Endely sur Seine et a present furtive, comme un sien filz nommé Toussin Liegart, aagié de xxiiij ans ou environ, se feust pieça parti d'avec elle, comme jeunes enfans se partent aucunes foiz sans congié de pere et de mere, et s'en feust alé ladicte Serize ne scet où, fors que depuis elle oy dire a plusieurs personnes que, par temptacion d'ennemy ou autrement de sa volenté, s'en estoit alé demourer et converser avec noz ennemis ; dont elle et lesdiz supplians furent tres courrouciez et merris pour leur deshonneur et vitupere. Et il soit ainsi que, depuis Noel derrain passé ença, a un soir, elle estant en son hostel, en ladicte parroisse de Houville, icelui son filz, acompaignié d'un autre compaignon tenant ledit parti arriverent en sondit hostel. Et après ce qu'elle ot blasmé et reprins sondit filz pour le retraire a son povoir, comme mere dolente de son gouvernement, icelui son filz, faingnant qu'il se voulsist retraire et qu'il ne s'osast pas monstrier, lui pria qu'elle voulsist aler fere diligence d'aler vers la riviere de Seine querir aucun passage par lequel lui et sondit compaignon peussent passer outre ladicte riviere du costé de Louviers. Laquele Sezire, pensant en sa conscience que sondit filz eust grant volenté de soy retraire et qu'il voulsist aler servir hors du pais en aucun lieu en nostre obeissance, ala parler a un nommé Colin Taudet, pescheur demourant sur ladicte riviere, en la ville de Muis, pour savoir s'il passeroit sondit filz et son compaignon ; lequel Taudet si accorda. Et après s'en feust retournée en sondit hostel, ouquel certaine nuit après ensuivant sondit filz retourna pour savoir qu'elle avoit fait ; laquele lui dist que ledit Taudet lui avoit accordé de le passer, en lui priant tres acertes qu'il se voulsist retraire et lui remonstrant comme mere le tres grant dangier où il s'estoit mis et le deshonneur qu'il lui avoit fait et faisoit et a leurs parens et amis par son petit gouvernement, et que pour l'amour et honneur de Dieu il voulsist cesser icelui gouvernement, et qu'il trovast moien pour retourner et demourer en nostre obeissance, comme elle et ses parens faisoient et avoient fait. Lequel, après ces paroles et plusieurs autres tendans a bonne fin et de restrinccion, se feust parti d'elle come repentant, en la commendant a Dieu de benigne volenté, come il sembloit de prime face a ses paroles et maniere, en lui disant avec ce que au plaisir Dieu il en feroit tant qu'elle et ses parens et amis en seroient bien contens ; ne onques puis elle ne le vit et ne scet où il ala, mais depuis lui a esté dit qu'il ne s'estoit point retrait, et pour ces causes et qu'elle ne denonça pas a justice sa venue ne ce que dit est elle s'est rendue furtive, latitant... Si donnons en mandement par ces mesmes presentes au bailli de Rouen et des exempcions de Gisors... Donné a Paris, le vje jour du mois de mars, l'an de grace mil CCCC XXXI et de nostre regne le dixiesme. Ainsi signé : Es requestes tenues par mons. le gouvernant et regent le royaume de France, duc de Bedford, esqueles vous les evesques de Beauvais, de Noyon et de Paris, le Premier President et plusieurs autres estoient. J. de Drosay.

CCV. — Paris, 31 mars 1432. (n. s.)

Rémision à un boucher d'Etrépany qui, après la prise de cette ville par les Français, au mois de septembre 1429, est demeuré sous leur obeissance et les a même suivis à Beauvais, où il a été quelque temps à leur service. (JJ 175, n. 86, fol. 27 recto.)

Henry, etc., Savoir faisons, etc., nous avoir receu l'umble supplicacion des parens et amis charnelz de Regnault Mauger, povre homme bouchier, de l'aage de xxiiij ans ou environ, natif près d'Estrepaigny, chargé de jeune femme grosse, contenant comme ledit Maugier, au devant de l'entrée faicte par traison ou chastel d'Estrepaigny par aucuns de noz ennemis ou mois de septembre mil CCCC vint neuf, feust demourant audit Estrepaigny, où il faisoit et avoit acoustumé fere de long temps son mestier et marchandise, de quoy il gouvernoit lui, sa femme et mesnage, ainsi que faisoient les autres gens de mestier, marchans et laboureurs d'Estraipagny et du pais d'environ. Et combien que d'icele traison ne sceust riens et qu'il n'en feust ou soit aucunement consentant ou coupable, si demoura ledit suppliant et se bouta après icelle entrée oudit chastel avec lesdiz ennemis, afin de sauver un peu de biens qu'il avoit audit Estrepaigny, pensant a lui mesmes que, s'il s'en aloit hors dudit Estrepaigny, nosdiz ennemis le prendroient. Et se tint audit Estrepaigny, ainsi que firent plusieurs autres habitans d'icele ville, depuis icele entrée jusques environ le temps que ledit chastel d'Estrepaigny fu par siege que y feismes mectre redduit et remis en nostre obeissance. Et d'icelui Estrepaigny, où il perdi par le fait dudit siege les biens qu'il y avoit, se parti, et comme tout desconforté, doubtant noz gens qui tindrent ledit siege, s'en ala, par l'exortacion et admonestement de aucuns de nosdiz ennemis, a Beauvais, où il s'est tousjours depuis tenu avec iceulx noz ennemis et fait plusieurs courses a pié et a cheval, obstant ce qu'il n'avoit de quoy vivre ; desqueles courses il peut avoir eu pour son butin de seize a vint saluz ou environ, dont lui et sadicte femme se sont gouvernez audit Beauvais. Et il soit ainsi que ledit Maugier s'en retourneroit volentiers demourer en nostre obeissance pour faire son mestier, ainsi que autresfoiz a fait, mais il n'oseroit ce fere pour occasion des choses dessusdictes... Actendu et considéré que ledit Maugier... a son povoir et le plus secretement que il a peu, a par plusieurs foiz fait savoir aux gens du pais d'Estrepaigny et d'environ qu'ilz se gardassent quant il savoit que lesdiz ennemis devoient courir, et mesmement a un Anglois de Gisors, qui a espousé la mere

de sadicte femme, puis un mois ença a fait savoir que lesdiz ennemis avoient propos et deliberacion secrete entre eulx de prendre par eschiele s'ilz pouvoient nostre chastel de Gisors, afin que ces choses il dist au lieutenant de nostre capitaine de Gisors et qu'il feüst fere bon guet et garde oudit chastel, laquelle chose ledit Anglois dist et fist savoir audit lieutenant, et tantost après vindrent nosdiz ennemis de Beauvais de nuyt environ ledit chastellet de Gisors, le cuidant prendre par eschiele, ce qu'ilz ne peurent fere obstant le bon guet, garde et resistance qui y furent faiz... Si donnons en mandement par ces presentes au bailli de Rouen et des exemptions de Gisors... Donné a Paris, le derrenier jour de mars mil CCCC XXXI avant Pasques et de nostre regne le dixiesme. Ainsi signé : Par le Roy, a la relacion de mons. le gouvernant et regent de France, duc de Bedford. J. de Drosay.

CCVI. — Paris, 5 avril 1432 (n. s.)

Rémission à Guillaume du Croq, enfermé dans les prisons de Rouen pour n'avoir pas dénoncé à la justice la tentative faite auprès de lui par Guillaume d'Estouteville, seigneur de Torcy, dans le but de l'amener à favoriser l'entrée des Français dans la ville de Dieppe. (JJ i-5, n. 88, fol. 27 verso.)

Henry, etc., Savoir faisons, etc., nous avoir esté exposé de la partie des parens et amis charnelz de Guillaume du Croq, chargé de femme et de plusieurs petiz enfans, que ledit du Croq est aagé de lx ans ou environ et depuis trois ou quatre ans ença est impotent de ses membres, et telement debilité de ses sens et entendement que pour ceste cause il a convenu bailler a certaines personnes plusieurs ventes et marchiez de bois qu'il tenoit de nous es forests d'Arques et d'Yavy, et pour iceulx estre gouvernez par main estrange, ou autrement il ne eust sceu paier ne rendre compte desdiz marchiés. Et deux ans a ou environ, par sa simplesse, ignorance et insensibilité receut lettres closes que lui envoya Guillaume d'Estouteville, chevalier, soy disant seigneur de Torchy, nostre desobeissant et adversere, lequel congnoissoit de long temps la simplesse dudit du Croq, et contenoient lesdictes lettres, comme l'en dit, que il aidast a mettre noz adverseres en la ville de Diepe. Au contenu esqueles lettres ledit du Croq, doubtant se il donnoit response desplaisant ausdiz adverseres ilz ne boutassent le feu en sa maison, qui est assise en la ville d'Estaples, en la seigneurie dudit de Torchy, en soy demonstrant insensible ou seurmonté de boisson, respondi qu'il feroit le mieulx qu'il pourroit, et ce non obstant gecta lesdictes lettres ou feu, sans les monstrier ne en parler a quelque personne. Et après ce, lui mieulx adverti dist au porteur desdictes lettres que il ne lui en parlast jamais et qu'il ne s'en entremectroit aucunement ; et aussi depuis il ne s'en entremist ne n'en parla ou oy parler en quelque maniere. Mais ledit du Croq, par son ignorance et insensibilité, non pensant ne sachant le peril où il pourroit cheoir a ceste cause, n'a point ce que dit est denoncé a justice. Pour lesquelles causes il a esté et est detenu prisonnier en noz prisons a Rouen où il a esté ja par long temps a grant despense, povreté et misere. Et combien que en jugement publique il ait confessé ledit cas, en la presence de plusieurs assistens, neantmoins eulx congnoissans l'estat et contenance dudit du Croq, qui veritablement est debilité de son sens et de ses membres, n'ont assis a l'occasion dessusdicte aucun jugement sur sa personne et a tousjours esté et est detenuz esdictes prisons... Si donnons en mandement a nostre bailli de Rouen... Donné a Paris, le cinquiesme jour d'avril, l'an de grace mil CCCC XXXI avant Pasques et de nostre le regne le dixiesme. Ainsi signé : Par le Roy, a la relacion de mons. le gouvernant et regent de France, duc de Bedford. J. Milet.

CCVI*. — Paris, 18 avril 1432 (n. s.).

Rémission à Jean Marion, le jeune, laboureur de Cesny-en-Cinglais, inculpé de complicité dans le meurtre de deux Anglais qui étaient venus piller les habitants du village. (JJ 175, n. 98, foi. 3o verso.)

Henry, etc., Savoir faisons, etc., nous avoir receu l'umble supplication des parens et amis charnelz de Jehan Marion, le jeune, povre homme laboureur de bras, aagé de xxv ans ou environ, chargé de jeune femme et de iiij petiz enfans, contenant, comme le premier jour de janvier derrain passé, deux garçons qui contrefaisoient estre Anglois feussent venuz en la ville de Cygny en Singalais ou bailliage de Caen et viconté de Faloise, en l'ostel de Jehan Marion, pere dudit Jehan Marion le jeune, et ylec pris draps de lit, poullaille, couvertures, linge, lange et tout ce qu'ilz porent trouver. Et en ce faisant survint ledit pere dudit Marion le jeune, qui leur dist qu'ilz ne faisoient pas bien de lui oster ainsi le sien, et lors le batirent et lui baillerent trois cops de dague ; et d'ilec s'en alerent en l'ostel de la suer d'icelui Marion le jeune et la desroberent pareillement ; et de la s'en alerent en l'ostel dudit Jehan Marion, le jeune, où ilz prindrent un mouton, et en ce faisant frapperent sa femme, qui estoit grosse d'enfant sentant, un cop d'espée par le costé telement que a peu qu'ilz ne la tuerent. Et ce fait tousjours perseverant en leur dampnable entreprise se partirent et retournerent en l'ostel de sadicte suer et la voudrent prendre a force, et a ce survindrent plusieurs autres femmes qui les empescherent, Et ylec lors survindrent ledit pere et le serourge dudit Marion le jeune, mary de sadicte suer, sur lequel serourge l'un d'iceulx malfaiteurs frappa un cop d'espée sur la teste, telement que a peu qu'il ne le trebucha a terre, lequel serourge ce veant bailla a celui qui l'avoit

ainsi frapé tel cop de pié qu'il le rua par terre et lui sailli l'espée hors de mains ; lequel serourge prist et saisist ladicté espée de laquelle a l'aide dudit pere, eulx estans en ce conflict et chaleur, tuerent iceulx deux garçons; et ce fait survindrent ledit Marion le jeune sur eulx, qui leur dist que c'estoit mal fait et qu'ilz estoient perduz ; et lors pour ce qu'ilz n'en savoient autrement que fere, eulx trois, c'est assavoir le pere et deux filz, despoullèrent iceulx deux larrons en leurs chemises et les alerent porter et gecter en un puis. Et combien que icelui Marion le jeune n'y eust frappé cop ne fait autre chose que aidier a les despoullier, porter et gecter oudit puis, toutes voies, doubtant rigueur de justice, il s'est destourné et destourne de dessus son lieu et demeure... Si donnons en mandement par ces mesmes presentes au bailli de Caen... Donné a Paris, le xviiiijour d'avril, l'an de grace mil CCCXXXI avant Pasques et de nostre regne le dixiesme. Ainsi signé : Es requestes tenues par mons. le gouvernant et regent le royaume de France, duc de Bedford, esqueles vous les evesques de Beauvais, Noyon et Paris, le chastellain de Beauvais, le Premier President, les seigneurs de Courcelles et de Clamecy et plusieurs autres estiés. J. Thiessart.

CCVII. — Paris, 18 avril 1432 (n. s.)

Rémision à Jean Chapelet, de Gros-Bois, pour le meurtre de Roger Fayel, qu'il avait surpris en flagrant délit d'adultère avec sa sœur. (JJ 175, n. 100, fol. 3i recto.)

Henry, etc., Savoir faisons, etc., nous avoir receu l'humble supplicacion des parens et amis charnelz de Jehan Chapelet, aagé de xxx ans ou environ, povre homme de labour, chargé de femme et d'enfans, demourant a Saint Andrieu de Gros Bois près de Vernueil, ou duchié de Normandie, contenant que, come ledit Chapelet eust auprès de lui demourant une sienne suer jeune femme, nommée Gilecte, deguerpie ou vefve de feu Guillot le Paige, de laquelle gouverner, pour raison de fraternité, il se entremectoit volentiers, afin qu'elle gardast deuement son veufvage et honneur de la ligne dont elle estoit. Et en ce faisant, eust enquis a aucuns de ses voisins de l'estat et gouvernement d'elle, par lesquelz eust trouvé qu'il estoit voix aucunement secrecte que un nommé Rogier Fayel, son compere et prouchain voisin, aagé de xl ans ou environ, et marié a une honneste femme, maintenoit icele suer dudit Chapelet. De quoy eust parlé par plusieurs foiz audit Rogier, en lui disant ces paroles ou autres semblables en effect et substance : « Rogier Fayel, tu es mon compere et mon voisin, et l'en me a donné a entendre que tu t'efforces d'avoir compaignie a ma suer ; en quoy, s'il estoit ainsi, tu me feroies villennie et vitupere. Et pour ce je te prie que tu te gardes de ce fere, ou autrement s'en pourroit ensuir un grant inconvenient pour toy et pour moy. » Après lesqueles paroles ainsi dictes et que ledit Rogier eust renyé audit Chapelet icelui fait, affermant par plusieurs foiz par son serement qu'il n'en estoit riens, icelui Rogier, pour plus secretement perseverer en son pechié ou dampnable propos, fist tant que ladicté Gilecte fu sa comere de son enfant qu'elle tint sur fons. Et après ce que dit est, c'est assavoir le samedi d'après Noel derrain passé, ledit Chapelet, qui estoit aucunement en doute ou souspeçon dudit cas et de la mauvaise vie d'icelui Rogier et de sadicté suer, s'en vint au soir sur le tart vers l'ostel d'elle, et oyt et apperceut que ledit Rogier estoit couchié avecques elle, laquelle toutesvoies estoit sa comere, comme dit est. Et lors icelui Chapelet s'en retourna legierement en son hostel, qui estoit près d'ilec, et hastivement fist lever Tassine, sa femme, print de la chandele et se saisist d'une espée et dague qu'il avoit, et s'en ala en l'ostel de sadicté suer, où il trouva ledit Rogier et elle couchiez ensemble, de quoy il fu moult courroucié. Et là icelui Chapelet, sadicté femme presente, et en obeissant par contrainte a lui tint ladicté chandele, et ainsi que lesdiz Rogier et ladicté suer d'icelui Chapelet faisoient semblant d'eulx lever, ledit Chapelet, comme esmeu ou eschauffé, les fery tous deux du plat de sadicté espée deux ou trois horions, en quoy ledit Fayel fu blecié d'une enfiseure parmy le pouce et en l'orteil du pié. Et pour ce que ilz se couvroient de la couverture du lit, par quoy ledit Chapelet ne les pavoit pas grever ou batre a son aise, tira ladicté couverture du lit a terre, et adonc sadicté suer se leva toute nue et le vint embrasser par le corps tellement qu'il ne se pouvoit deslier ou eschaper d'elle. Et cependant icelui Fayel s'en fouy, et en soy en alant et yssant hors de l'uys, icelui Chapelet le frappa du bout de sadicté espée parmy le ventre, entre le framant des brayes et le nombril, et atant iceulx Fayel et Chapelet se departirent et alerent chascun d'eulx où bon leur sembla. Et depuis ledit Fayel ait vescu l'espace de xviiiij jours ou environ, neantmoins pour faulte d'apareillement de mire, petit gouvernement ou autrement mort s'est ensuie en la personne d'icelui Fayel. Pour occasion duquel cas ainsi advenu, ledit Chapelet, doubtant rigueur de justice, s'est absenté du pais... Actendu que ce que ledit Chapelet a fait et perpetré, comme dit est, a esté en detestacion et pour l'enormité du cas et pechié dessusdit, qui est si grief, comme chascun puet considerer, et contre les status et ordonnances de sainte Eglise, et pour l'amour naturele que icelui Chapelet avoit a sadicté suer, lequel depuis le decés dudit Fayel a fait satisfacion et chevy a ses parens et amis... Si donnons en mandement par ces mesmes presentes aux bailliz d'Evreux et d'Alençon... Donné a Paris, le vendredi devant Pasques, xviiiij e jour d'avril, l'an de grace mil CCC XXXI et le dixiesme de nostre regne. Ainsi signé : Es requestes tenues par mons. le gouvernant et regent le royaume, duc de Bedford, esqueles vous les evesques de Beauvais, de Noion et de Paris, le Premier President, le seigneur de Courcelles et plusieurs autres estoient. J. de Lunain.

CCVIII. - Paris, 18 avril 1432. (n. s.)

Rémission à un valet de chambre du duc de Bedford, qui, lors de l'occupation du château de Rouen par les Français, s'est pris de querelle avec un tavernier de la ville, qui criait haro sur lui dans la rue et l'a frappé de plusieurs coups d'épée, sans le blesser. (JJ 175, n. 1 10, fol. 34 verso.)

Henry, etc., Savoir faisons, etc., nous avoir receu l'umble supplicacion de Richard Blaford, varlet de chambre de nostre tres chier et tres amé oncle Jehan, gouvernant et regent nostre royaume de France, duc de Bedford, natif de nostre royaume d'Angleterre, contenant que ja soit ce que ledit suppliant soit homme paisible et qu'il n'eust onques meffait ne mesdit a Pierre Collemart, tavernier demeurant audit Rouen, a l'enseigne du Barillet, neantmoins quant noz ennemis et adverseres estoient en la tour de nostre chastellet dudit Rouen, nostre bailli dudit Rouen ou son lieutenant eust a la requeste dudit Collemart mandé par devant lui ledit suppliant, auquel il eust fait defense de par nous, a peine de cent saluz d'or a appliquer a nous, que audit Collemart il ne meffeist ne mesdit, combien que ledit suppliant ne l'eust aucunement menacé ne lui fait chose pour laquele il lui deust avoir fait fere lesdictes defenses. Et il soit ainsi que depuis, a certain jour ensuivant, et ledit siege estant encores devant ladicte tour, icelui suppliant feust, environ six heures après midi, alé en l'ostel dudit Collemart pour veoir un sien amy, natif de nostredit royaume d'Angleterre, qui audit siege avoit esté tres fort blecié. Et lui estant avec icelui malade et en sa chambre, sans mesfaire ne mesdire aucunement audit Collemart, a sa femme ne autres dudit hostel, iceulx Collemart et sa femme, de leur volenté desraisonnable et sans cause nulle, se prindrent a crier haro a haulte voix, c'est assavoir ledit Collemart en pleine rue devant ledit hostel et sadicte femme en icelui hostel; dont ledit suppliant, qui ne pensoit a aucun mal et qui ne leur avoit fait ne vouloit fere aucun desplaisir, fu tout courroucié et esbahy, et se parti incontinent dudit hostel, devant lequel il trouva ledit Collemart criant toujours ledit harou. Auquel ledit suppliant, tout courroucié et esmeu de ce que sans quelque raison il faisoit ledit cry de haro, lui bailla trois cops du plat de son espée sur la teste ou ailleurs sur son corps, sans ce toutesvoies qu'il le navrast ne mutilast aucunement. Pour laquele chose, icelui suppliant doute estre appelé a noz droiz ou autrement poursuy par nostre procureur ou autres noz officiers de justice audit lieu de Rouen ou ailleurs... Si donnons en mandement par ces mesmes presentes a nostre bailli de Rouen... Donné a Paris, le vendredi devant Pasques, xvij e jour d'avril, l'an de grace mil CCCC XXXI et de nostre regne le dixiesme. Ainsi signé : Es requestes tenues par mons. le gouvernant et regent le royaume, duc de Bedford, esqueles vous les evesques de Beauvais et de Noion, le Premier President, maistre Guillaume le Duc et pluseurs autres estoient. Ja. de Lunain.

CCVIII*. — Paris, 19 avril 1432 (n. s.).

Rémission à Jean Laisné, du Merlerault, pour le meurtre de Guillaume Sirel, mari de sa nièce, avec lequel il s'était pris de querelle au sujet d'une haie que ledit Sirel voulait élever entre leurs héritages. (JJ 175, n. io3, fol. 3a recto.)

Henry, etc., Savoir faisons, etc., nous avoir receu l'umble supplicacion des amis charnelz de Jehan Laisné, demourant en la parroisse du Melle Raoul, ou bailliage d'Alençon, contenant comme puis certain temps ença feussent venuz et escheuz audit Jehan Laisné et a Romé Laisné, son frere, certaines maison, terres et au tres heritages par le trespas de feu Macé, leur nepveu, filz de feu Jehan Laisné, leur frere ; et pour ce, depuis six sepmaines ou environ et après le trespas dudit Macé, ledit Jehan Laisné, son oncle, a voulu avoir sa part desdiz heritages, ainsi que raison et la coustume du lieu le donne; duquel partage ainsi faire ledit Romé son frere fu aucunement refusant ou delaiant, pour ce qu'il avoit baillé, comme l'en dit, icelui heritage a neuf ans a Guillemet Sirel, son gendre, qui avoit espousé sa fille ; et finalement appointerent entre eulx tellement que ledit Jehan Laisné auroit un jardin estant devant l'uis dudit hostel, et du consentement d'iceulx freres fu baillié ledit hostel a Jehanne Laisnée, leur suer, pour en joir jusques a certain temps. Depuis laquele chose ainsi faicte, ledit Jehan Laisné frequentoit et estoit souvent avec sadicte suer et y faisoit le plus sa demeure, et avoient en cas de necessité, et mesmement quant noz ennemis et adverseres brigans ou autres survenoient, icelui Jehan pour soy sauver et autres avoient leur yssue par un huis estant oudit jardin. Lequel Guillaume Sirel, ou contempt dudit appointement ainsi fait entre lesdiz freres et pour empeschier icele yssue ou autrement, commença a fere et de fait vult faire une forte haie, disant que ja homme n'y passeroit ne ystroit. Et pour ce ledit Jehan Laisné, oncle de la femme d'icelui Guillemet, lui dist et depria qu'il ne fist point icele haie ne empeschast l'issue dudit jardin. Lequel lui respondi que, qui le vouldist veoir, il la feroit, et ledit Jehan Laisné lui dist doncques qu'il la despereroit. Et adonc ledit Sirel le frappa d'une besche par deux foiz, tant qu'il lui fist sang et plaie et navra tres fort. Et lors ledit Jehan Laisné, soy voiant ainsi navré, gecta une serpe qu'il tenoit et l'en asséna un seul cop par la teste, duquel cop par faulte d'apareil, huit jours après ou environ, il ala de vie a trespasement. Pour occasion duquel cas, ledit Jehan Laisné s'est destourné et destourne de son lieu... Si donnons en mandement par ces mesmes presentes au bailli d'Alençon... Donné a Paris, le xix e jour du mois d'avril, l'an

de grace mil CCCC XXXI avant Pasques et de nostre regne le dixiesme. Ainsi signé : Es requestes tenues par vous, esqueles les evesques de Beauvais, de Noion et de Paris, le chastellain de Beauvais, le Premier President, les seigneurs de Courcelles et de Clamecy et plusieurs autres estoient. J. Thiessart.

CCIX. — Paris, 19 avril 1432. (n. s.)

Rémission à Pierre Hamelin, sergent d'une des portions de la sergenterie du Val de Saire, coupable d'avoir falsifié et grossi d' environ vingt livres tournois le rôle des amendes de la vicomté de Valognes pour le terme Saint-Michel 1427. (JJ 175, n. 1 23, fol. 38 verso.)

Henry, etc., Savoir faisons, etc., nous avoir receu l'umblé supplicacion des parens et amis charnelz de Perrin Hamelin, nagaires sergent d'une des porcions de la sergenterie du Val de Sere en la viconté de Valongnes soubz Robin le Coq, sergent ordinaire d'icelle sergenterie, povre homme chargé de femme et de plusieurs enfans, contenant comme pour cueillir et faire venir ens les amendes d'icele viconté du terme saint Michiel qui fu l'an mil CCCC XXVII, certain role signé de Lyon Baudouyn, lieutenant general du viconte dudit lieu de Valoingnes, eust esté baillié audit Hamelin. Et après ce que ledit Hamelin, qui est jeune, de l'aage de xxviii ans ou environ, l'eust receu, considerant que il avoit moult grant peine a fere venir ens lesdictes amendes et que les personnes nommez oudit roule estoient plus contens et se plaindroient moins de paier chascun xij deniers ou deux solz oultre et par dessus les dictes amendes que de paier le salaire desdis sergens, par temptacion de l'ennemy, par son ignorance ou autrement, fu meü de faire et de fait fist et escrivy de sa main un autre roule et haulsa sur aucunes desdictes personnes nommées en icelui roule le taux ausquelz ilz estoient assis et y mist autres personnes qui n'estoient point oudit roule a lui baillié, et le creust de vint livres tournois ou environ, et contrefist le seing manuel dudit lieutenant dont icelui roule estoit signé. Et ce fait, icelui Hamelin doubla partie dudit roule ainsi contrefait en son papier et bailla ledit roule a un nommé Perrin Trois Solz, aussi sergent d'une autre porcion d'icele sergenterie, pour icelui metre a execution, et lui dist que c'estoit le roule qui lui avoit esté baillié par ledit lieutenant. Et il soit ainsi que, pour ce que ledit Hamelin oist dire que icelui Trois Solz se faisoit paier du contenu oudit roule et que le peuple s'en plainnoit et disoit qu'il n'estoit pas bon, ledit Hamelin, qui encores n'avoit aucune chose receu a son proufit ne autrement de chose qu'il eust haulsé ou escript oudit roule, et soy repentant de ce qu'il avoit fait, ala par plusieurs foiz devers ledit Trois Solz lui demander ledit roule pour le casser et adnuller, afin que plus ne feust executé ne monsté. Lequel respondi audit Hamelin qu'il alast en son hostel le jour Nostre Dame des Advens lors ensuivans oudit an mil CCCC XXVIII, et ilz yroient querir ledit roule en l'ostel d'un appellé Jehan le Bauscage, qui le avoit pris et mis en sa coqueluche. Lequel Hamelin y ala ledit jour au soir, mais ledit Trois Solz lui dist qu'il n'y povoit aler jusques au lendemain au matin et qu'il retornast et ilz yroient. Pour quoy ledit Hamelin, desirant de tout son cuer de adnuller icellui roule, retourna le lendemain et alerent eulx deux ensemble en l'ostel dudit Bauscage, lequel ilz ne trouverent point. Et atant se departirent, et s'en ala ledit Hamelin aux assises dudit lieu de Valoingnes, que tenoit le bailli de Coustentin. Pardevant lequel bailli ledit Hamelin fu mandé esdictes assises ; auquel nostre advocat, a qui avoit esté baillié ledit roule ainsi contrefait, demanda en jugement se c'estoit le roule par vertu duquel il levoit et cueilloit lesdictes amendes pour ledit terme saint Michiel. Lequel Hamelin, tout espoventé, esmeü et honteux après ce qu'il ot veu ledit roule, dist et afferma par son serement que onques mais il n'avoit veu icelui roule. Pour occasion duquel cas, icelui Hamelin fu lors detenu prisonnier es prisons dudit lieu de Valoingnes ; esqueles, après ce qu'il y ot esté par l'espace de douze sepmaines ou environ, doubtant estre durement traictié et de finir miserablement ses jours en grant peine et douleur et que sesdiz povres femme et enfans feussent destruis et mandiens, apperceut l'uis d'icelle prison ouvert et s'en yssi hors environ heure de vespres et s'en ala hors dudit bailliage en lieu toutesfoiz a nous obeissant... Si donnons en mandement... au bailli de Coustentin... Donné a Paris, le xixe jour du mois d'avril, l'an de grace mil CCCC XXXI avant Pasques et de nostre regne le dixiesme. Ainsi signé : Es requestes tenues par vous, esqueles les evesques de Beauvais, de Noyon et de Paris, le chastellain de Beauvais, le Premier President et plusieurs autres estoient. J. Thiessart.

CCX. — Paris, 7 juin 1432.

Rémission à Jean Grosparmi, écuyer de la vicomté de Caen, pour le meurtre de Gervais Revel, avec lequel il était entré en débat au sujet d'un mendiant dont ledit Revel s'était emparé et qu'il ne voulait pas remettre en liberté. (JJ 175, n. 121, fol. 38 recto.)

Henry, etc., Savoir faisons, etc., nous avoir receue l'umblé supplicacion de Jehan Grosparmy, escuier, chargé de femme et de plusieurs enfans, demourant en la viconté de Caen, contenant comme ledit suppliant ait tout son temps esté et soit nostre bon vray et loyal subget, tenu nostre parti et nous servy en armes ou fait de noz guerres et es journées, sieges et armées, qui faiz et tenuz ont esté depuis xij ans ença contre noz ennemis et adverseres, sans avoir tenu aucun parti a nous contraire. Et aussi se soit icelui

suppliant apliqué, avec autres en sa compaignie, de aler souventes foiz sur les champs, montez et armez, afin et pour prendre et destrousser les brigans, noz ennemis et adverseres et de la chose publique, qui sont et se tiennent sur le pais, et mesmement pour prendre et amener a justice lesdiz brigans et les larrons, qui pillent et rovent noz subgez et ceulz du pais ; laquele chose ledit suppliant a tousjours fait par auctorité de justice. Et par son moien et pourchas, avecques sesdictes gens, aient esté destroussés et fait mourir par justice plusieurs traitres, larrons et brigans noz ennemis et adverseres. Et il soit advenu que, depuis un mois ença, à l'occasion de ce que un povre homme, querant son pain pour Dieu, passant a un jour de dimenche par emprès l'ostel dudit suppliant, près duquel lieu avoit et estoit une taverne, que tenoit Henry du Bosq, en laquele se bouta ledit povre homme querant son pain et demandant l'aumosne et estre logié pour Dieu en passant le chemin. Lequel povre homme en icelui lieu fu prins par Gervais Revel et Colin Langlois, lesquelz le raençonnerent a xx s. t., en lui disant qu'il estoit espie de brigans et qu'il seroit pendu. Lequel povre homme, aiant paour des dessusdiz et d'avoir pis que ledit raençonnement, qui par eulx lui avoit esté fait, leur requist et fist tant que ilz l'amenerent en l'ostel dudit suppliant, qui pour lors y estoit et faisoit bonne chiere avec plusieurs de ses amis, qui là estoient assemblez pour raison de la feste et gesine de sa femme, qui avoit esté acouchée d'enfant et relevée ce jour. Lesquelz estoient eschauffez pour raison de la bonne chiere qu'ilz avoient faicte toute la journée et qu'il estoit ja sur le vespre. Et ainsi que lesdiz Gervais et Colin entrerent en l'enclos du manoir dudit suppliant, en admenant ledit povre homme, survint sur eulx d'aventure ung nommé Pierre Langlois, oncle d'icelui Colin Langlois, qui dist a icelui Colin, son nepveu, qu'il ne faisoit pas bien d'avoir prins et raençonné icelui povre homme et que il ne ledit Revel n'en auroient ja denier, et leur feroit rescourre et delivrer par ledit suppliant. Et a ceste cause se meut noise et debat entre eulx, et se prindrent a eulx entrebatre, tellement que ledit Colin et Revel eurent la force d'icelui Pierre Langlois. Par quoy il fist cry de haro. Laquele chose fu incontinant dicte a icelui suppliant. Lequel, cuidant bien fere, yssi tout eschauffé hors de son hostel, pensant que ce feussent mauvaises gens. Et quant il apperceut les dessusdiz et qu'il les congneut, leur dist qu'ilz se cessassent. Et de fait mist la main a eulx, en les departant l'un de l'autre et en leur disant que c'estoit mal fait a eulx et qu'ilz s'en allassent en leurs maisons. Mais lesdiz Gervais Revel et Colin Langlois n'en furent pas bien contens; ainçois en continuant en leur fait, noise et entreprise, fu baillié par icelui Gervais Revel audit suppliant deux cops d'un baston, l'un sur le bras et l'autre sur la main. Lequel suppliant, soy veant et sentant ainsi feru, lui estant eschauffé de boire avec sesdiz amis et esmeu de ce qu'il avoit esté frapé, mist la main a sa dague, et par chaleur en bailla un cop audit Revel par le derrière de la cuisse. Et ce fait, se departirent lesdictes parties, et print icelui suppliant ledit povre homme, le mist en son hostel et le fist couchier, pour doubte que les dessusdiz ne le repreissent et afin que ilz ne lui feissent plus de destourbier. Et combien que ledit Gervais Revel, qui s'en ala en son hostel, eust incontinant esté appareillié par un barbier, qui dist lors que ouudit cop n'avoit aucun peril de mort, toutesvoies il est advenu que pour ledit fait, après ce que pour raison dudit cop icelui Revel s'est geu en son lit par deux jours ou environ malade, il est alé de vie a trespassement... Si donnons en mandement par ces presentes au bailli de Caen... Donné a Paris, le vij e jour de juing, l'an de grace mil CCC XXX II et de nostre regne le dixiesme. Ainsi signé : Par le Roy, a la relacion du Grant Conseil. Oger.

CCXI. — Paris, 26 juin 1432.

Rémision à plusieurs mariniers de Dieppe au sujet d'une rixe survenue dans le port du Crotoy entre des mariniers Bretons et eux, alors qu'ils revenaient d'Abbeville chercher les bagages de l'archevêque de Rouen. (JJ 175, n. 126, fol. 40 recto.)

Henry, etc., Savoir faisons, etc., nous avoir receu l'umblé supplicacion des parens et amis charnelz de Robin Martel dit Cardot Divers, Miquelin de la Plache dit Lubin, Vincenot le Sueur dit Herches, Perrin Poret, Perrotin du Four, Olivier Bernard, Philippot Mabille et Jehanninot Dalphin, povres mariniers demourans en la ville de Dieppe, chargez de femmes et de vint sept enfans, contenant que come pour la venue de nostre amé et feal conseiller l'arcevesque de Rouen a son benefice archiepiscopal et en sadicte ville de Dieppe, aucuns ses officiers en icelle ville eussent nagaires envoie de ladicte ville en la ville d'Abbeville un petit vaissel par mer, duquel estoit maistre ledit Divers, et en sa compaignie les autres dessusnommez, en intencion de porter en icelui vaissel de ladicte ville d'Abbeville en ladicte ville de Dieppe nostredit conseiller, pour eschever le dangier du chemin par terre. Et eulx arrivez audit Abbeville, feussent alez vers nostredit conseiller, lequel ilz eussent trouvé delibéré prendre ledit chemin par terre et non par la mer, mais eust fait chargier son bagage dedens ledit vaissel pour icelui bagage porter par la mer en ladicte ville de Dieppe. Lequel bagage ainsi chargé, les dessusnommez, ensemble ung des gens et serviteur de nostredit conseiller, qui estoit garde dudit bagage, deux hommes d'eglise et deux autres hommes qui tendoient aler dedens ledit vaissel en ladicte ville de Dieppe, desquelz les dessusnommez ne scevent les noms, feussent partiz dudit Abbeville et arrivez au Crotoy le dimenche premier jour de ce present mois de juing. Et comme ilz estoient audit vaissel, attendens vent et marée pour eulx partir a aler en ladicte ville de Dieppe, pour ce que les portes dudit Crotoy estoient fermées et que bonnement ilz ne

povoient tous couchier en icelui vaissel, se feussent partiz dudit vaissel aucuns des dessusnommez et alez pour couchier en aucuns autres vaisseaulx dudit Dieppe, qui estoient joignans ou auprès dudit vaissel ; et entre les autres se feussent partiz lesdiz Poret et Dalphin et entrez dedens le vaissel d'un nommé Guillemain Quesnel dudit Dieppe. Et tantost qu'ilz y furent entrez, pour ce que les compaignons dudit vaissel Quesnel et iceulx Poret et Dalphin voudrent boire et qu'ilz n'avoient que boire en icelui vaissel Quesnel, et aussi qu'ilz avoient oy dire ou pensoient que en une nef de Bretagne, estant audit Crotoy auprès dudit vaissel, avoit du vin a vendre, envoient un jone filz en ladicte nef de Bretagne demander un pot de vin pour l'argent. Auquel jeune filz fu respondu par le maistre d'icele nef de Bretagne qui ne vendoient point de vin en ladicte nef. Et lors ledit Poret, qui avoit oye la response dudit maistre, lui dist doucement en priant qu'il leur vouldist bailler ou faire bailler pour l'argent un pot de vin de ladicte nef. Lequel maistre lui respondi que en sadite nef n'avoit point de vin, dont ledit Poret et ceulx de sa compaignie peussent boire, et que le vin qu'ilz avoient estoient vin et eue meslez ensemble. Et adonc un Breton, dont les dessusnommez ne scevent le nom, qui estoit en une autre nef dudit Bretagne estant audit Crotoy, près d'icelle nef, auquel icelui Poret ne parloit point ne il ne le veoit, car il estoit nuyt, et si ne lui demandoit riens, dist tout hault ces mots ou aucuns d'iceulx ou autres en substance : « Que demandez vous, traistres quiens angloiz, godons plains de cervoise? Alez boire vostre cervoise, vous n'aurez ja vin ! » Et ledit Poret lui dist qu'ilz ne lui demandoient riens, en lui disant qu'il s'en alast et qu'il avoit menty ou failli d'avoir dit iceles paroles. Et incontinent icelui Breton sailly ou entra dedens ladicte autre nef de Bretagne, et tantost furent par icelui Breton ou autres en son aide gectées de ladicte nef plusieurs pierres contre les dessusnommez et autres estans avec eulx esdiz vaisseaulx, en leur disant et criant qu'ilz auroient male estraine ou moz en substance, en faisant grant noise. Et tant continuerent et persevererent a gecter lesdictes pierres, tant de ladicte nef que d'autres nefz dudit Bretagne, de la hune de l'une d'icele[s] nefz et autrement, ou confort et aide l'un de l'autre, que aucuns des dessusnommez et ledit serviteur de nostredit conseiller furent feruz et bleciez, et tant que, pour éviter greigneur inconvenient, leur convint partir de leursdiz vaisseaulx et eulx mettre a terre. Et adonc lesdiz Bretons en grant nombre armez et embastonnez de dars, pavois, bastons, pierres ou autres habillemens de guerre, yssirent de leursdictes nefz ou de l'une d'iceles et coururent sus aux dessusnommez ou persevererent a leur gecter lesdictes pierres, dont ilz les ferirent ou aucuns d'eulx. Et quant ledit Cardot, qui estoit couchié en sondit vaissel, oy ladicte noise et descord, il yssi de sondit vaissel et ala au maistre de ladicte nef de Bretagne, en entencion de apaisier a son povoir icelui descord, lui dist et pria que pour Dieu il apaisast ses gens et les fist retraire. Lequel maistre lui respondi qu'il ne pourroit. Et encores cria icelui Cardot ausdiz Bretons que pour Dieu ilz se deportassent, ce qu'ilz ne firent pas promptement, ainçois persevererent et continuerent en ladicte noise et debat, et a gecter lesdictes pierres. Ouquel debat en la repulcion, resistance ou defense que faisoient et firent les dessusnommez, ou autrement en la chaude d'icelui descord, ot par les dessusnommez ou aucuns d'eulx plusieurs hommes feruz de leurs bastons, trait et cousteaux sur aucuns desdiz Bretons, tant que a celle occasion deux d'iceulx Bretons, que l'en dit estre ou avoir esté appelez l'un Jehan Denis et l'autre Perrot Dagorne, autrement ne scevent leurs noms, sont alez depuis de vie a trespasement. Pour occasion duquel cas les dessusnommez, qui, comme dit est, sont povres mariniers chargez de femmes et de vint sept enfans, doubtans rigueur de justice, se sont absentez et retraiz en aucuns lieux de nostre obeissance, sans aler ailleurs... Ledit Robin Martel dit Cardot Divers... a autresfoiz obtenu de nous ou de feu nostre tres chier seigneur et pere, que Dieu absoille, remission de ce qu'il avoit esté consentant avec aucuns autres de mettre en ladicte ville de Dieppe Loys de Braquemont et ses complices noz ennemis... Si donnons en mandement par ces presentes au bailli d'Amiens... . Donné a Paris, le xxvj e jour de juing, l'an de grace mil CCCC XXXII et de nostre regne le dixiesme. Ainsi signé : Par le Roy, a la relacion du Conseil. Oger.

CCXII. — Paris, 5 septembre 1432.

Rémision à un gentilhomme de la paroisse du Tordouet, employé à la garde du château de Courtonne, lequel, étant allé trouver un certain Massot Hébert, rebelle, pour l'engager à faire sa soumission, s'est pris de querelle avec lui au sujet d'une petite rivière, où ledit Massot prétendait avoir le droit de pêcher, et l'a frappé mortellement de plusieurs coups de dague. (JJ 175, n. 143, fol. 44 verso.)

Henry, etc., Savoir faisons, etc., nous avoir receu l'umble supplicacion des parens et amis charnelz de Henry du Buisson, povre gentilhomme, aagié de vint six a vint sept ans, ou environ, chargez de jeune femme et de deux petiz enfans, demourant en la parroisse de Tordoit ou viconté d'Orbec, a deux lieues ou environ près du chastel de Courthonne, contenant que comme, le dimenche penultime jour de mars derrain passé, ledit Henry feust aie veoir son mesnage en ladicte parroisse de Tordoit, où estoit un appellé Massot Hebert, filz de Jehan Hebert, d'icelle parroisse, lequel Massot estoit retourné en nostre obeissance par le moien de certaine remission qu'il avoit obtenue de nous, pour occasion de ce qu'il avoit tenu le parti de noz ennemiz et adverseres, et pour ce que l'en disoit qu'il traictoit durement et malgracieusement ses pere et mere, qui avoient employé le leur a obtenir ladicte remission, laquelle ne pouvoit encores estre vérifiée pour les grans maulx et oultrages commis par ledit Massot, et que pour celle cause ou autrement s'en

vouloit retourner ou parti desdiz adverseres, ainsi que l'en disoit au pais, ledit du Buisson, cuidant bien fere, se feust charitablement trait par devers ledit Massot pour lui dire et remonstrer qu'il se deportast d'estre ainsi rude a sesdiz pere et mere, qui tant avoient mis et emploié du leur a lui pourchacier sadicte remission, et qu'il feust obeissant a eulx, si comme filz doit estre a ses pere et mere, et aussi qu'il se mariast et gouvernast doucement et ne retornast pas avec lesdis ennemis, et que s'il cuidoit qu'il y voulüst retourner, il le prendroit et meneroit prisonnier oudit chastel, où ycelui du Buisson estoit retraict et aidoit a le garder. Et en disant ce que dit est aimablement, ainsi qu'ilz estoient assis a table et buvoient ensemble en l'ostel dudit Massot, par bonne amour et comme amis et voisins pevent fere l'un avec l'autre, ledit Henry, qui ne pensoit que a tout bien et a retraire icelui Massot et l'exhorter ad ce que devant est touchié, lui dist entre autres choses qu'il avoit entendu qu'il s'estoit venté de peschier en certain doir ou porcion d'une petite riviere ou ruisseau, qui est au pais, ouquel ledit Henry disoit avoir droit de peschier. A quoy ledit Massot respondi bien arrogamment que voirement il y pescheroit et que ledit Henry ne le pescheroit que une foiz en l'an, et usoit ledit Massot a l'encontre d'icelui Henry de paroles couvertes, innuans ou demonstrans qu'il avoit volenté de peschier ledit doir. Pour quoy icelui Henry, veant son obstinacion, fu chaudement et hastivement meu et bailla de la paulme une buffe en la joe a icelui Massot ; lequel lui dist incontinent qu'il s'en repentiroit. Et adoncques icelui Henry, esmeu tant de ce come des paroles premieres, print ledit Massot par le collet de sa robe et le tira a soy, en disant qu'il le emmeneroit oudit chastel de Courthonne ; et en ce faisant, la table chey, et lors s'entreprendrent ensemble, et ou conflict ledit Henry, par temptation de l'ennemy ou autrement, tira une dague qu'il avoit, dont il frappa un cop ledit Massot ou costé, et deux autres cops du plommel d'icelle dague sur la teste, et tantost après ce ledit Massot ala de vie a trespas. Pour occasion de quoy, ledit Henry s'est éloigné ou absenté, a delaissé son mesnage, ouquel il ne oseroit jamais retourner, doubtant rigueur de justice... Actendu la jeunesse dudit Henry, lequel... s'est exposé en nostre service a l'encontre de nosdiz ennemis, lesquelz a cause de ce l'ont prins et mené prisonnier ou chastel de Nogent le Rotrou, où il a esté par eulx longuement detenu et tres durement et inhumainement traictié, et après l'ont mis a grant rançon, qu'il lui a convenu paier, dont il a esté et est come destruit et sa chevance moult diminuée, et si a ledit Henry fait satisfacion et composé avec le pere dudit feu Massot... Si paiera pour le salut et remede de l'ame d'icelui deffunct dix livres tournois, c'est assavoir la moitié a l'ostel dieu de Paris et l'autre a celui de Lisieux. Si donnons en mandement par ces presentes au bailli de Rouen. • . Donné a Paris, le Ve jour de septembre, l'an de grAce mil CCCC XXXII et de nostre regne le dixiesme. Ainsi signé : Es requestes tenues par Mons. le gouvernant et regent de France, duc de Bedford, esquesles vous les evesques de Beauvais, de Noion et de Paris, les seigneurs de Courcelles et de Clamecy et autres estoient. Ja. de Lunain.

CCXIII. — Paris, 23 septembre 1432.

Rémision à Colin Le Douchet de Saint-Marcouf, qui s'est introduit, pendant la messe, dans l'hôtel de Jean Le Bougueret, pour recouvrer certains biens que ce dernier lui avait pris par exécution pour défaut de paiement de dettes, et qui, cinq ou six ans auparavant, étant collecteur d'une taille de quinze livres tournois due par les habitants de ladite paroisse à Guillaume Girot, vicomte de Valognes, a majoré le rôle à son profit d'une somme de dix livres. (JJ 175, n. i5i, fol. 47 verso.)

Henry, etc., Savoir faisons, etc., nous avoir reçu l'umblé supplication de Colin le Douchet, povre simple homme laboureur de bras, chargé de jeune femme et de trois petiz enfans, aagé de xxx a xxxiiij ans ou environ, demourant en la parroisse de Saint-Marcouf, ou bailliage de Coustantin, en la viconté de Valoignes, contenant comme, puis la Saint Jehan Baptiste derrain passée, un nommé Thomas Davourie ait fait fere execucion sur ledit suppliant, par vertu de certaines lettres contenant huit livres tournois et trois boisseaux de froment, et semblablement un nommé Perrin le Fevre, collecteur de ladicte parroisse de certaine taille mis sus en ycele, le ait fait contraindre pour la somme de cinq solz six deniers tournois, en quoy il estoit assis en ladicte parroisse. Lesqueles contrainctes et execucions aient esté faites par Guillaume Vaquelin, nostre sergent, lequel eust pour ce prins une sarge, une escuele d'estain, une hachete et une faucille appartenantes audit suppliant et iceulx biens portez et mis en garde de par nous en l'ostel Jehan le Bougueret, demourant en ladicte parroisse ; lequel les eust mis en sa huche et enfermez a clef. Et il soit ainsi que ledit suppliant, en venant de l'eglise de ladicte parroisse, eust rancontré une femme qui estoit brus audit Bougueret, et lui eust demandé où estoient sesdiz namps ou biens. Laquele lui eust respondu qu'ilz estoient enfermez en ladicte huche dudit Bougueret. Oyes lesquels paroles, ycelui suppliant, tempté de l'ennemy, feust venu a l'ostel dudit Bougueret, et, considerant que les gens estoient au moustier et a la messe, feust entré oudit hostel par une fenestre d'icelui et venu a ladicte huche, où il pensoit que sesdiz biens estoient. Laquele huche il eust ouverte a l'aide d'une hachecte qu'il avoit et rompu le pesne, et ce fait prins et emportez sesdiz biens en son hostel. En oultre, cinq ou six ans a ou environ au devant du cas dessusdit avenu, ait icelui suppliant esté ordonné collecteur pour cueillir en ladicte parroisse la somme de xv livres tournois qui estoit deue a Guillaume Girot, pour lors viconte dudit lieu de Valoignes. En faisant laquele cueillecte il ait eu et exigié desdiz habitans, oultre icele somme, environ dix livres tournois. Pour

occasion desquelz cas et faiz ou d'aucuns d'iceulx, ledit suppliant a esté prins et apprehendé par ledit Vaquelin, nostre sergent dessusdit. Duquel, en le voulant mener parler au lieutenant particulier dudit viconte, il se eschappa et mist en franchise. Et depuis s'est parti d'icele franchise et alé sur le país, où il se tient de present... Ledit suppliant nous paiera l'amende de vint livres tournois pour le delict, forfait et extorcion desdictes dix livres tournois, pour emploier a l'emparement de haies de Valongnes et restituera lesdictes dix livres a yceulx habitans ; sera aussi puny civilement et si sera prisonnier deux mois au pain et a l'eaue. Si donnons en mandement au bailliy de Coustantin.,. Donné a Paris, le xxiiij e jour de septembre, l'an de grace mil CCCC XXXII et de nostre regne le dixiesme. Ainsi signé : Par le Roy, a la relacion du Conseil. Adam.

CCXIV. — Paris, 25 septembre 1432.

Rémision à Jaquet de Gaillardbois, frère de Perceval, détenu prisonnier au Château-Gaillard pour n'avoir pas révélé un projet d'agression des Français contre cette forteresse et s'être, par crainte d'un châtement, réfugié auprès d'eux à Beauvais. (JJ 175, n. 160, fol. 50 recto.)

Henry, etc., Savoir faisons, etc., nous avoir receu l'umble supplicacion des parens et amis charnelz de Jaquet Gaillardboc, escuier, prisonnier en nostre chastel de Gaillard, contenant que, pour le temps que Guillaume Bisshopston, chevalier, estoit capitaine de Gaillard, furent monstrées unes lettres par un nommé Languedor audit Jaquet, qui venoient de noz ennemis et adverseres. Lequel Jaquet de Gaillardboc, pour doubte que ledit Languedor n'en eust a souffrir, ne le revela aucunement au capitaine, ne a homme de justice, non pensant le dangier qui par faute de revelement s'en povoit ensuir, combien que a ceste cause n'en advint aucun mal a nous ne a nostre seigneurie ou subgiez; neantmoins a ceste cause fu ledit Jaquet mis prisonnier oudit chastel et tous ses biens prins par le filz dudit Bisshopston. Duquel chastel ledit Jaquet, doubtant d'estre rigoureusement traictié, se eschappa et parti dudit chastel de Gaillard et s'en ala demourer a Beauvais avec noz ennemis et adverseres. Depuis laquele desobeissance ledit Jaquet a tousjours mené guerre et fait et tenu forme d'appatiz sur noz subgez. Et il soit ainsi que Perceval de Gaillardboc, escuier, frere dudit Jaquet, lequel nous [a] loyaument servy ou fait de noz guerres et fait encores un chascun jour a vuidenge et repulsion des brigans frequentans oudit pays, come de ce avons esté acertenez par nostre bien amé Thomas de Beaumont, chevalier, capitaine dudit Gaillard, come tres courroucié et desplaisant de la rebellion et absence de sondit frere , desirant de tout son pover le retraire en nostre obeissance, eust ycelui Perceval dit audit de Beaumont qu'il vouloit mettre peine de prendre aucuns brigans qui souvent repairoient environ ledit Gaillard et ledit Jaquet son frere, lui priant que s'il le povoit prendre qu'il lui voulsist aidier a avoir sa remission et il lui feroit fere serement d'estre bon et loyal doresnavant et de ce seroit baillée bonne caucion. Lequel capitaine eust promis audit Perceval que de ce feroit toute la diligence qu'il pourroit. En perseverant par lequel Perceval en son entreprise, est advenu de nouvel que, par grande et bonne diligence, ledit Jaquet de Gaillardboc, son frere, avec autres noz ennemis et adverseres a esté prins et admené prisonnier oudit chastel de Gaillard, où il est en grant povreté et misere et en voie de brief y finer ses jours... Si donnons en mandement au bailli de Gisors et Vernon... Donné a Paris, le xxv e jour de septembre l'an de grace mil CCCC XXXII et de nostre regne le dixiesme. Ainsi signé : Par le Roy, a la relacion de mons. le gouvernant et regent de France, duc de Bedford. J. de Rinel.

CCXV. — Paris, 31 octobre 1432.

Rémision à Perrenot de Froville, de Vesly, qui, à la suite d'une expédition heureusement menée par les habitants de Dangu et de Vesly contre des partisans Français venus piller cette dernière paroisse, s'est pris de querelle avec Jean Le Dain, son compagnon, au sujet du règlement d'un écot réclamé par les habitants de Dangu, et l'a frappé mortellement d'un coup d'épieu. (JJ 175, n. 154, fol. 48 verso.)

Henry, etc., Savoir faisons, etc., nous avoir receu l'umble supplicacion des parens et amis charnelz de Perrenot de Froville, jeunes homs charretier de l'aage de xxiiij ans ou environ, chargé de jeune femme et de trois petiz enfans, demourant a Velly ou bailliage de Gisors, contenant que, le vij e jour d'aoust derrenierement passé, le capitaine de Joy et autres noz adversaires en sa compagnie en grant nombre coururent audit lieu de Velly, et ylec prindrent plusieurs chevaux, vaches et autres bestaulx et biens, lesquelz ilz rançonnerent et composerent a grant finance ; et pour le paiement d'icele finance retindrent un nommé Jehan Bellier et plusieurs desdiz bestaulx et autres biens. Et ce veans les compaignons de ladictie ville de Velly, qui s'estoient retrais ou moustier et eglise d'illec, ilz se assemblerent jusques au nombre de xxiiij ou environ, entre lesquelz estoit ledit Perrenot, et se alerent complaindre de ce que dit est au capitaine de Dangu et lui requirent aide a l'encontre de nosdiz adversaires. Lequel capitaine de Dangu et le capitaine de Gisors se assemblerent avec plusieurs de leurs gens et des compaignons dudit Dangu et d'environ et alerent tous a l'encontre de nosdiz adverseres et les rancontrerent au dessoubz de la ville de Serens le Bouteillier et ylec les combatirent, prindrent ledit capitaine de Joy entre autres et rescourrent ce qu'ilz

emmenoient dudit Velly, et ce fait s'en retournerent audit lieu de Dangu. Auquel lieu les compaignons d'ilec qui avoient esté a ladicte besoinne et destrousse, dirent aux compaignons dudit Velly qu'ilz leur devoient bien donner a boire et qu'ilz avoient ledit jour prins grant paine et diligence pour eulx. A quoy lesdiz compaignons de Velly respondirent que tres volentiers leur donroient, et de fait leur donnerent a boire, et pour ce faire despendirent audit Dangu environ iiij frans et demi, dont yceulx compaignons de Velly respondirent jusques au lendemain qu'ilz promistrent retourner audit Dangu pour paier ladicte somme et partir tous ensemble leur butin. Auquel jour de lendemain pluseurs desdiz compaignons de Velly, et entre les autres un nomé Jehan le Dain, en l'absence dudit Perrenot, retournerent audit Dangu pour fere ce que dit est. Et quant ce vint a la congnoissance dudit Perrenot, il ala après eulx, vestu d'un roquet de toille et tenant un plançon en sa main. Mais en alant, il les rancontra a leur retour sur les fossez dudit Dangu. Ausquelz il demanda se ledit escot estoit paie. A quoy ilz respondirent que non, et il leur demanda a quoy il tenoit. Lesquelz ou aucuns d'eulx respondirent qu'il s'en falloit demy franc que son sire, pere de sa femme, devoit paier. A quoy ledit Perrenot respondi que sondit sire n'en paieroit riens, car il avoit esté dit et appointié que ceulx qui avoient esté ou envoié a ladicte besongne et destrousse ne paieroit riens dudit escot. Or estoit il vray que il y estoit alé pour sondit sire et pour rescourre ses chevaulx qui avoient esté prins, et ainsi ycelui son sire n'en devoit riens. Et sur ce orent pluseurs parolles rigoureuses entre aucuns desdiz compaignons, mesmement entre ledit Jehan le Dain et ledit Perrenot ; et tant que ledit Jehan le Dain, qui tenoit une lance, baissa ycele lance et en cuida frapper, et de fait en eust frappé ledit Perrenot parmy le corps, se aucuns de la compaignie n'eussent aucunement destourné son coup. Et neantmoins ycelui Perrenot fu actaint et frappé par le costé jusques au sang. Et ce veans, aucuns desdiz compaignons pour empeschier la noise, tindrent lesdiz Jehan le Dain et Perrenot et osterent a icelui Perrenot son plançon. Mais neantmoins en alant leur chemin, ledit Jehan le Dain et deux ou trois ses parens et amis, qui estoient de son aliance, persevererent en rigoureuses et injurieuses paroles a l'encontre dudit Perrenot et s'efforcerent de le frapper, dont pluseurs des assistens avoient desplaisance, mesmement un nommé Jehan le Beret, qui tenoit et gardoit le plançon dudit Perrenot. Lequel Perrenot disoit et crioit a ceulx qui le tenoient qu'ilz le laissassent aler, ou ilz le feroient tuer en leurs mains. Et ce veant, ledit Beret bailla audit Perrenot son plançon, en lui disant qu'il se defendist s'il povoit et qu'il seroit des siens et en son aide. Et ce oyant ledit Jehan le Dain, il baissa sa lance et s'efforça de en frapper ledit Beret. Et lors ledit Perrenot, considerant qu'il avoit esté blecié, come dit est, et que ledit le Dain et ses complices s'efforçoient encores de le blecier et frapper, et aussi ledit Beret, lequel veant le tort d'iceulx s'estoit offert a lui aidier a l'encontre d'eulx comme dit est; et mesmement ycellui Perrenot, veant que ledit le Dain avoit baissié sa lance pour ferir ledit Beret, afin de defendre ycelui Beret, s'avança et de sondit plançon frappa ledit le Dain sur la teste, et du cop chey a terre. Et depuis fu porté audit lieu de Dangu en l'ostel d'un barbier, où il est trespasé environ xij jours après par faulte de bon mire ou estre bien appareillié, comme pluseurs le presument. Et ledit Perrenot, pour occasion dudit cas, tantost après ledit cop frappé, s'enfouy et absenta du pais et n'y oseroit retourner pour doubte de rigueur de justice... Si donnons en mandement par ces presentes a nostre bailli de Rouen et des exempcions de Gisors... Donné a Paris, le derrenier jour d'octobre, l'an de grace mil CCC et trente deux et de nostre regne le unzeiesme. Ainsi signé : Es requestes tenues du commandement et ordonnance de mons. le gouvernant et regent le royaume de France, duc de Bedford, esquelles l'evesque de Beauvais, messire Jehan le Clerc, le Premier President de Parlement et autres estoient. Fontenoy.

CCXV*. — Paris, 31 octobre 1432.

Rémission à Pierre le Marchand, prêtre, de Bellengreville, qui, s'étant entremis de délivrer Robin Tardif, son cousin germain, prisonnier des Anglois de Domfront, a été capturé par ces derniers, mais a réussi à leur échapper et à gagner Fougères. (JJ 175, n. 1 56, fol. 49 recto.).

Henry, etc., Savoir faisons, etc., nous avoir receu l'umble supplicacion de Pierre le Marchant, povre homme prestre, demourant a Nostre Dame de Berengreville ou bailliage de Caen, contenant comme, trois ans a ou environ, aucuns Anglois de la garnison de Dampfront feussent alez courir ou pais de Bretagne et yleceussent rencontré un nommé Robin Tardif, cousin germain dudit suppliant, lequel ilz eussent prins et mené prisonnier audit lieu de Dampfront. Et tantost après, eussent yceulx Anglois envoié devers les pere et mere dudit Robin, qui estoient et sont demourans a Conteville près dudit lieu de Caen, leur dire qu'ilz avoient ledit Robin leur filz prisonnier. Lesquelz pere et mere se feussent trais par devers ledit suppliant, qui est simples homs, et lui eussent tres instamment requis qu'il voulsist aler audit lieu de Dampfront par devers ceulx qui avoient leurdit filz a prisonnier et mettre peine de trouver maniere comment il feust delivré, feust par raençon ou autrement, et que ledit pere n'y oseroit aler pour ce qu'il y a grant chemin dudit Conteville jusques a Dampfront, de tres dangereux et perilleux chemin pour noz ennemis qui souvent y repairent. Lequel suppliant feust alé audit Dampfront et eust tant fait qu'il eust parlé aux maistres dudit Robin et que par le moien des promesses qu'il leur fist, soubz umbre de ce que lui avoient promis lesdiz pere et mere, yceulx Anglois eussent eslargi ledit Robin et donné saufconduit d'aler faire et

pourchacier la finance a laquele il s'estoit mis. Durant le temps duquel saufconduit ledit Robin ne feust point retourné devers sesdiz maistres. Laquele chose veant yceulx maistres, ilz s'en feussent venuz en la ville de Caen, où ilz eussent trouvé ledit suppliant, auquel ilz eussent demandé se il avoit oy aucunes nouveles dudit Robin. Lequel suppliant eust respondu que non. Et après lui eussent dit qu'il estoit venu par devers eulx et avoit acquittié sondit saufconduit et païé sadicte finance, et eussent tant fait que par belles paroles ilz eussent trait ycelui suppliant hors de ladicte ville de Caen. Et incontinent qu'il fu hors, le prindrent et menerent audit lieu de Dampfront, où ilz l'ont par long temps detenu prisonnier pour ledit Robin son cousin come pleige. Durant le temps de laquele prison, il et autres prisonniers dudit pays de Bretagne eussent trouvé maniere d'eulx partir de ladicte prison et forteresse et s'en feussent alez en la ville de Fougieres la Royal en Bretagne, laquele tient nostre parti, en laquele il a esté long temps, sans ce qu'il soit osé retourner en son pays, jusques a long temps après et que lesdiz Anglois aient esté paiez de la rançon dudit Robin Tardif et aussi d'aucuns autres prisonniers, qui s'estoient partiz et eschapez avec lui. Depuis le quel temps ycelui suppliant se feust celement retrait au pays. Et il feust advenu que aucunes gens qui avoient le gouvernement de certaines villes et parroisses dudit bailliage et congïé de nous de obtenir saufconduit de nosdiz ennemis, se feussent traiz par devers ledit suppliant, lequel ilz eussent chargïé d'aler devers nosdiz ennemis querir saufconduit pour estre et demourer en leurs maisons et faire leurs labours, marchandises et besoingnes seurement. Lequel suppliant leur eust esté querir lesdiz saufconduiz par devers nosdiz ennemis et les ait apportez ausdiz laboureurs, sans ce qu'il ait esté advisé ne adverti de prendre congïé de nous ou de noz gens et officiers pour aler querir lesdiz saufconduiz. Pour occasion desquelz cas, tant d'avoir fraint et brisé lesdictes prisons come d'avoir esté querir saufconduit par devers nosdiz ennemis sans noz congïé et licence, par simplece et ignorance esperant gangnier pour ce qu'il n'a office, benefice, rentes ne revenues se non tres pou de son patrimoine, doubtant rigueur de justice, s'est absenté du pais... Si donnons en mandement a nostredit bailli de Caen... Donné a Paris, le derrenier jour d'octobre, l'an de grace mil CCCXXXII et de nostre regne le xj e. Scellées de nostre scel ordonné ou l'absence du grant. Ainsi signé : Es requestes, du commandement et ordonnance de mons. le gouvernant et regent le Royaume de France, duc de Bedford tenues, esqueles l'evesque de Beauvais, messire Jehan le Clerc, le Premier President de Parlement, maistre Guillaume le Duc, president dudit Parlement, le seigneur du Mesnil et autres estoient. Chambaut.

CCXVI. — Paris, 31 octobre 1432.

Rémision à Georges Notis, écuyer anglais, pour le meurtre de Raoul Beatrix, tué dans un conflit survenu entre les gens du seigneur de Courseulles et plusieurs habitants de Béný, au sujet d'une certaine quantité de vesce que ledit écuyer avait fait scier sur des héritages dépendant de la seigneurie de Courseulles et que lesdits habitants de Béný voulaient l'empêcher d'enlever, (il 175, n. i65, fol. 52 recto.)

Henry, etc., Savoir faisons, etc., nous avoir receu l'umble supplicacion des parens et amis de George Notis, escuier, serviteur de nostre amé et feal Hartenk Waughoux, chevalier, seigneur de Courseulle, ou bailliage de Caen, contenant come, ou mois de juillet derrenierement passé, ledit suppliant pour prendre la possession de certains heritages, assis en la parroisse de Benye, pour garder le droit de la seigneurie dudit lieu de Courseulle, eust envoïé par Fouquet le Masurier et Davy Denise, aagiez de xiiij ans ou environ, ses serviteurs, querir deux trousseaux de vesce qui avoit creu sur lesdiz heritages, laquelle chose il pavoit et devoit fere, selon la coustume de nostre pais de Normandie, en gardant les droiz de ladicte seigneurie. Et quant lesdiz serviteurs orent chargïé lesdiz deux trousseaux de vesce, ung nommé Raoul Beatrix, de son auctorité et de fait, vint a eulx et leur rescouy et osta ycele vesce, en empeschant ledit chevalier en ses droiz de ladicte seigneurie. Et non content de ce, dist ausdiz serviteurs que ledit George Notis, leur maistre, estoit un vilain murdrier et que il n'estoit a riens bon, sinon a croupir es cendres. Lesqueles paroles et aussi ladicte rescousse furent rapportées par lesdiz Masurier et Denise a ycelui Notis, dont il fu mal content. Et pour cause de ce, et afin d'en savoir la verité, et aussi afin de garder le droit dudit chevalier et de sadicte seigneurie, ycelui Notis, acompaignïé desdiz Masurier et Denise, de Fouquet le Masurier dit Bertault, d'un Anglois nommé Hannequin Contest Notis, frere dudit George, de Thomas Willeston, archier, et d'un page nommé Robin le Tellier, se transporta en l'eritage où estoit ladicte vesce, et ylec fist soyer certaine porcion de ladicte vesce, en esperance de la vouloir fere emporter. A quoy survindrent ledit Raoul Beatrix, Denis Beatrix, son frere, et pluseurs autres gens dudit lieu de Benye, lesquelz par force rescouirent et osterent ycele vesce. Et de fait fu ledit Fouquet le Masurier, le jeune, pris au corps par ledit Raoul Beatrix, et en ce faisant s'entrebatirent telement que ledit Fouquet donna audit Raoul deux cops du plat de son espée, et ycellui Raoul aussi donna audit Fouquet pluseurs cops de baston. Et pour ce que ycelui Fouquet le Masurier crioit a l'aide, ledit page, qui tenoit un petit baston en sa main, fery un cop ycelui Raoul Beatrix par la teste. Et pour ce que lesdiz Fouquet et page estoient en peril d'estre murdriz et tuez et que tres fort ilz crioient a l'aide, pour les secourir vindrent a eulx lesdiz Contest, George Notis et Thomas Willeston, et aussi ledit page nommé Tellier; et ledit Contest ainsi venu et arrivé audit conflict, ledit Denis Beatrix, frere dudit Raoul, fery ycelui Contest d'un baston par la teste, telement que sang en sailly et que il chey a terre tout pasmé et

estourdy. Et aussi fery ledit Denis un autre cop par la teste ledit Willeston, telement que semblablement yl chey a terre. Et lors icelui Georges Notis, moult courroucié et desplaisant des choses, bateures et violences ainsi faictes, tira son espée, en disant teles paroles ausdiz Beatrix et autres leurs complices : « Vous estes faulx garçons et mauvaises gens de batre et ainsi villener mes gens et les serviteurs de monsieur de Courseulle! » Et adont lesdiz Contest et Willeston se releverent et par ledit Contest furent donnez audit Raoul Beatrix sur la teste plusieurs cops d'espée, et ledit Masuier dit Bertault print au corps ledit George et l'empescha telement que il ne peut ferir ledit Beatrix, et tant se departirent. A l'occasion desqueles bateures, ung mois après ou environ, ycelui Raoul ala de vie a trespasement. Pour lequel cas ledit George a esté appréhendé et mis en noz prisons a Caen, où il a desja esté detenu par l'espace de trois mois ou environ, et encores y est, en grant misere et povreté, et les autres dessusdiz se sont desfuys et absentez du pais, et par ainsi ycelui George, qui est un bon escuier et qui nous a bien et loyaument servy en noz guerres, est en peril et dangier de finer ses jours miserablement... Si donnons en mandement a nostre bailli de Caen... Donné a Paris, le derrenier jour du mois d'octobre, l'an de grace mil CCCC et XXXII et de nostre regne le xj e . Seellées de nostre seel ordonné en l'absence du grant. Ainsi signé : Es requestes tenues du commandement et ordonnance de mons. le gouvernant et regent de France, duc de Bedford, esqueles l'evesque de Beauvais, maistre Guillaume le Duc, President en Parlement, messire Jehan de Pressy, chevalier, et autres estoient. J.de Drosay.

CCXVII. — Mantes, 10 décembre 1432.

Rémision à Colin de Seulle et Thomas Maheult, pour le meurtre dun homme d'armes normand qui était venu, en compagnie d'une troupe d'Anglais, piller les habitants de Saint-Germain-d'Ectot. (JJ 175, n. 195, fol. 63 verso.)

Henry, etc., Savoir faisons, etc., nous avoir receu l'umblé supplicacion des parens et amis charnelz de Colin de Seulle, chargé de femme et enfans, et de Thomas Maheult, povre jeune homme demourant en la parroisse de Saint-Germain-d'Esquetot, ou bailliage de Caen, contenant comme puis nagaires certaine compaignie d'Anglois et autres gens de guerre de cestui nostre parti se feussent alez logier en ladicte parroisse, entre lesquelz estoit et chevauchoit un jeune homme dont on ne scet le nom, natif du pais de Normandie, come l'en dit, lequel se parti de la compaignie dudit capitaine et ala en l'ostel dudit de Seulle, et entra es chambres et soliers dudit hostel et commença a cerchier et querir partout ledit hostel savoir s'il y trouveroit aucune chose pour emporter ou rançonner, et ne trouva aucune chose, exceptez aucuns peu de biens qu'il rançonna a xv s. t. Lors trouva ledit Seulle et deux femmes, dont l'une estoit aagée de lx ans passez, a laquele il voulu fere entendant que elle lui avoit osté son chaperon et arrachié des cheveux de sa teste, pour avoir occasion et trouver cause de raençonner lesdictes femmes. Et ja soit ce que lesdiz chaperon et cheveux ne lui eussent point esté otez, si leur demandoit il pour ce six saluz d'or. Et lors la congnoissance de la raençon et malefaçon que avoit faicte ou s'efforçoit de fere ledit homme Normant, les nouvelles alerent a la notice dudit capitaine, qui estoit logié ailleurs en ladicte ville. Lequel capitaine dist a celui qui lui adonça qu'il en feroit bonne justice, et monta et fist monter a cheval aucuns de ses gens pour aler querir ledit malfaicteur, pour ce qu'il savoit bien qu'il estoit costumier de fere telz raenconnemens et pilleries comme il disoit. Et quant ledit capitaine fu venu oudit hostel, trouva que ledit de Seulle avoit baillié xv s. t. pour la raençon de sesdis biens. Et lors quant ledit malfaicteur apperceut que sondit capitaine estoit là venu, aiant congnoissance que il le querroit, s'enfouy es bois auprès d'ilec et ne peut estre trouvé. Et assez tost après iceulx gens d'armes se alerent logier en une autre ville, nomée Linguievre, a une lieue ou environ dudit Saint Germain. Et après qu'ilz furent partiz, ledit malfaicteur, sachant que ledit capitaine et ses gens s'en estoient alez, retourna en ladicte ville de Saint Germain et dist a plusieurs personnes qu'il les destruiroit, pour ce qu'ilz l'avoient encusé vers ledit capitaine et si tueroit ledit de Seulle et autres et ardroit leurs hostelz et maisons, et d'autres menaces. Lesquelz de Seulle et Maheult, doubtant ces menaces, partirent pour aler après lui en esperance de le mener parler audit capitaine. Lesdiz Seulle et Maheult trouverent ledit malfaicteur ; lesquelz lui distrent ces paroles ou semblables en substance : « Venez hardiement avec nous a vostre capitaine faire vostre paix, et s'il vous couste six ou sept frans, nous le vous rendrons, afin que nous demourions voz amis ». Et adonc commencerent a cheminer ensemble. Et ainsi qu'ilz s'en aloient ensemble audit capitaine, icelui compaignon, malcontent d'eulx, et en perseverant en sa mauvaise volenté, sacha son espée du fourrel et se efforça de les ferir d'icelle espée et les navrer. Et lors ledit Maheult, en repellant la force et male volenté d'icelui, se print a lui et lui osta son espée ainsi qu'il le cuidoit ferir. Et alors ledit Maheult donna un cop de ladicte espée sur la teste d'icelui malfaicteur, dont il lui fendi le test. Et aussitost ledit de Seulle print ladicte espée, et derechief fery un autre cop ou plusieurs sur la teste dudit compaignon malfaicteur, dont desdiz coups ledit compaignon est alé de vie a trespasement... Si donnons en mandement par la teneur de ces mesmes presentes au bailli de Caen ... Donné a Mante, le dixiesme jour du mois de decembre, l'an de grace mil CCCC XXXII et de nostre regne le xj e . Ainsi signé : Es requestes tenues du commandement et ordonnance de mons. le regent et gouvernant le royaume de

France, duc de Bedford, esques l'archevesque de Rouen, l'evesque d'Evreux, l'abbé du Mont Saint Michiel, le seigneur de Saint Pierre et plusieurs autres estoient. J. de Drosay.

CCXVIII. — Mantes, 14 décembre 1432.

Rémision à plusieurs habitants de Ferrières et d'Alges, près Gournay, inculpés de complicité avec Jean Touaillier, ancien homme d'armes de la compagnie du comte de Huntingdon, qui s'est mis au service des Français et a fait plusieurs courses avec eux dans les environs de Gournay. (JJ 175, n. 197, fol. 64 verso.)

Henry, etc., Savoir faisons, etc., nous avoir receu l'umble supplicacion des parens et amis charnelz de Philippe le Voyer, prestre, Jehannin le Voyer, son frere, demourant a Ferieres près Gournay et de Jehannin Bezelin, demourant a Age aussi près dudit Gournay en Normandie, tous et chascun d'eulz de l'aage de xxiiij a xxv ans, ou environ, contenant comme un leur cousin nommé Jehan Touaillier, le jeune, natif de Gournay, homme d'armes nagaires estant en nostre obeissance et soubz le conte de Huntyngton, puis certain temps ença feust alé courir avec un des gens dudit seigneur devant la ville de Beauvais. A laquele course ledit Touaillier fu prins par noz ennemis et adverseres dudit lieu et mené audit Beauvais, où ilz le tindrent longuement, et après ce le raençonnerent et mistrent a si grosse finance que lui ne tous ses amis n'eussent peu finer. Et voiant qu'il ne pouvoit estre delivré des mains desdis ennemis s'il ne consentoit estre de leur parti, pour éviter la mort, se accorda a eulz ad ce, et par ce fu delivré de prison et ala en plusieurs courses avec lesdis ennemis. Et en une certaine nuit ala en l'ostel desdis prestre et frere, qu'il trouva couchiez et dormans, et les esvilla et entra dedens leur chambre par une fenestre qu'il ouvry par force de pierres ou autrement, et print ledit prestre par ses cheveux. Lequel tout effraï se leva et parla audit Touaillier, qui lui dist qu'il avoit oy dire que ledit Bezelin son cousin estoit prisonnier audit Gournay et qu'il lui sceust ce a dire le lendemain où il le trouveroit es bois de Bouville, ce que fist ledit prestre et lui ala dire esdis bois que ledit Vezelin estoit prisonnier audit Gournay, dont ledit Touaillier fu moult courroucié. Et orent après lesdis Touaillier et prestre plusieurs paroles ensemble, desqueles il n'est recors. Et atant s'en retourna ledit prestre en son lieu audit Ferieres. Mais trois sepmaines après, ledit Touaillier retourna de rechief devers lesdis prestre et son frere et entra en leur chambre come avoit fait l'autre foiz, et iceulx trouva dormans et les fist lever et demanda audit Jehannin le Voyer se on avoit apporté unes cuirasses en son hostel, qui estoient audit Gournay et appartenoient audit Touaillier. Lequel Jehannin Voyer respondi que non ; et atant se parti le ledit Voier d'avec lui. Mais ledit prestre convoia ledit Touaillier jusques a une haye assez près de son hostel, et en alant demandoit audit prestre se un nommé Buisson estoit point couchié en son hostel ne aussi un nommé Jehan Varnier et qu'ilz lui paieroient unes bonnes chausses. Auquel ledit prestre dist que ce seroit mal fait de les prendre, et qu'ilz estoient bonnes gens et ses voisins et que de ce ne lui parlast plus ; et atant se departirent l'un de l'autre. Et en la fin du mois d'aoust derrenierement passé, environ minuit, retourna ledit Touaillier devers ledit prestre et son frere. Auquel frere il demanda se il avoit point eu ses cuirasses ; qui lui respondi que non. Et lors dist audit Jehannin qu'il dist a Jehan le Touaillier, son pere, que sesdictes cuirasses, qui estoient a Gournay, il vouldist fere porter audit lieu de Ferieres, en l'ostel dudit Jehannin. Lequel son pere lui respondi qu'il ne lui en parlast plus et qu'il n'en feroit riens, et avoit assez perdu pour ledit Touaillier ; et après ce se departirent. Mais ledit prestre et Touaillier conclurent ensemble que ledit Vezelin yroit à Gournay querir lesdictes cuirasses et les mettre en vieille maison, où ne demeure personne, seant audit lieu d'Age, appartenante a Jehan le Cauchois. De quoy se chargea ledit Vezelin, et iceles cuirasses print a unes estables ou demeure a vaches, estant audit Gournay, et les porta a ladictie vielle maison, où les a prises ledit Touaillier. Lequel, puis certain temps après, se embuscha en un lieu nommé le Sources des Eaues, près de l'ostel dudit Vezelin; lequel Touaillier, lui ij e , se descouvry sur ledit Bezelin et lui dist qu'il vouloit aler courir la parroisse d'Ernemont. Auquel ledit Bezelin dist que ce seroit mal fait et qu'il s'en vouldist deporter, actendu que sa femme y estoit demourante et estoient lesdis habitans ses voisins, et aussi qu'il se vouldist retraire de la compagnie où il estoit et tenir nostre parti come autrefois avoit fait, et que ledit Bezelin se faisoit fors de le pourchacier devant Thomas Kyriel, capitaine dudit Gournay. Et atant se departirent, sans aler fere ladictie course. Mais est advenu que pour lesdis cas lesdis prestre, son frere et Vezelin ont esté prins et mis prisonniers en noz prisons audit lieu de Gournay... Si donnons en mandement par ces mesmes presentes au bailli de Caux... Donné a Mante, le xiiij e jour de decembre, l'an de grace mil CCC XXXII et de nostre regne le xj me . Ainsi signé : Par le Grant Conseil estant a present par devers Mons. le gouvernant et regent de France, duc de Bedford. J. de Drosay.

CCXIX. — Mantes, 14 décembre 1432.

Rémision à Jean Langlois, du hameau de Bizy près Vernon, qui, après avoir longtemps servi de guide aux Anglais de la garnison de cette ville, a quitté leur parti pour celui des Français et s'est trouvé présent à plusieurs actes de brigandage commis par ces derniers dans les villages environnants. (JJ 175, n. 198, fol. 64 verso.)

Henry, etc., Savoir faisons, etc., nous avoir receu l'umblé supplicacion des parens et amis charnelz de Jehan Langlois, povre homme laboureur en vignes demourant ou hamel de Bisny, ou diocese d'Evreux, chargé de femme et de quatre petiz enfans, contenant comme, depuis la conquête faicte par feu nostre tres chier seigneur et pere, cui Dieu pardoint, du pais et duchié de Normandie, ledit suppliant se soit entremis de fere son labour continuellement, et par aucun temps, pour ce qu'il congnoissoit le pais, ait esté guide et meneur des compaignons Anglois estans en garnison en nostre ville de Vernon et y ait fait son devoir, jusques a environ le mois de septembre l'an mil CCCC XXXI que il fu souspeçonné d'estre coupable de la prise de treize hommes qui furent prins a Saint Pierre d'Autix par noz ennemis et adverseres ; de la prise desquelz il n'estoit aucunement en faulte ou coulpe ; mais doubtant rigueur de justice et ce que par aucuns de ses amis lui fu raporté que, s'il estoit trouvé, il seroit mis en prison, se retray au bois de Houlebec. Auquel lieu il trouva Guillaume de Sabrenas, nostre ennemi et adversere, et autres pluseurs en sa compaignie, lesquelz le prindrent et lui distrent qu'il estoit guide des Anglois et que, s'il ne les menoit et conduisoit a Longueville, ilz le tueroient. A laquele chose fere, pour eschever la mort, il se condescendi et accorda et audit lieu de Longueville les guida et y prindrent Guillot le Grant. Et tantost après fu nouvelles en la ville de Vernon que ledit Langlois avoit esté avec ceulx, qui avoient prins ledit Guillot le Grant. Pour laquele cause ledit Langlois n'osa plus soy retraire en son hostel, et se departi, et trouva certains brigans avec lesquelz il s'associa, considerant qu'il n'avoit de quoy vivre, et ala avec eulx a Saint Marcel, où ilz prindrent Pierre Elye et pluseurs de ses biens, et en l'ostel Jehan Mulot prindrent semblablement des biens, et depuis en la forest de Vernon print ledit suppliant deux bestes chevalines, dont l'une appartenoit à Guillaume Huret, dont il ot une paire de chausses. Item, a un autre voiage de nuit, icelui suppliant fu a Gamilli, près dudit Vernon, en la compaignie de pluseurs autres brigans, et ylec prindrent pluseurs biens meubles et huit ou neuf vaches, et si y fu feru ou batu un nommé Gosset le Marchant. Et a une autre foiz, fu prins Philippot le Marchant et autres dudit Gamilli. Item ledit Langlois depuis ledit temps, pour ce qu'il n'osoit revenir ne converser en nostre obeissance, s'est associé en pluseurs et diverses compaignies de brigans, où ont esté prins pluseurs personnes noz subgez, de la raençon desquelz il a eu pour sa part environ douze saluz d'or. Et avec ce, ou precedent du temps dessusdit, ledit Langlois, en venant des bois de Premont de fere des eschalaz, encontra Jehan le Breton, Jehan le Mesgre et un nommé Gieffroy, qui portoient un canon. Lesquelz lui distrent que il estoit appaticé a Merey et que il leur merroit ledit canon jusques audit Merey. Et pour acomplir leur voulenté et ce que ilz estoient les plus fors, leur porta icelui canon sur sa beste jusques a la riviere d'Eure près dudit Merey, sans ce que il eust pour ce fere aucune chose. Pour laquele cause icelui suppliant... n'osa bonnement retourner en nostre seigneurie et obeissance. Et mesmement que ledit suppliant a fait prendre depuis nagaires iiij ou v brigans par ceulx de la garnison de nostre ville de Vernon et se emploiera ainsi qu'il fait de en fere encores prendre... Si donnons en mandement par ces mesmes presentes a nostre bailli d'Evreux... Donné a Mante, le xiiij e jour de decembre, l'an de grace mil CCCC XXXII et de nostre regne le xj me . Ainsi signé. Par le Grant Conseil estant a present par devers mons. le gouvernant et regent de France, duc de Bedford. G. de Ferieres.

CCXX. — Paris, 24 décembre 1432.

Rémision à Guillaume la Chose, de Saint-Georges-de-Boscherville, pour le meurtre de Pierre le Noir, ménétrier, qui avait refusé de lui donner une danse et de lui prêter son instrument. (JJ 175, n. 184, fol. 58 verso.)

Henry, etc., Savoir faisons, etc., nous avoir receu l'umblé supplicacion des parens et amis charnelz de Guillaume la Chose, povre homme demourant en la parroisse de Saint Joirre de Bauquerville, chargé de femme et enfans, contenant que come, le xiiij e jour de juillet derrenierement passé, jour de dimenche, icelui Guillaume la Chose avoit disné en l'ostel de la femme qui fu Jehan Chambre, jadis escuier, natif du pais d'Angleterre, avecques un nommé Raoulin Huart, un surnommé Briffault et pluseurs autres ; laquele femme avoit cedit jour de dimenche fait le pain benoit en l'eglise de ladicte ville, et tous avoient faicte bonne chiere ensemble. Et advint que, après ledit disner, ainsi que ledit la Chose yssoit hors de l'ostel de ladicte femme, passoit par devant ledit hostel un nommé Pierre le Noir et un autre nommé Coulon, menestriers, lesquelz icelui la Chose appella en leur disant : « Donnez nous une dance, et vous aurez chascun un breton ». A quoy ledit Coulon demoura pour jouer, et ledit Noir s'en ala en l'ostel Robin d'Esqueville, sans riens dire. Par quoy ledit Guillaume la Chose demanda audit Coulon pour quoy son compaignon ne venoit. Lequel Coulon respondi qu'il ne savoit. Alors ledit la Chose dist : « Je le vois querre ». Et le trouva oudit hostel d'icelui Robin d'Esqueville, avecques Jehannin de la Houille, qui atendoient avoir a boire, que on leur estoit alé querre. Lesquelz icelui la Chose salua, disant : « Dieu gard les compaignons ! » Et dist a icelui Pierre Le Noir : « Venez nous donner une dance avecques vostre compaignon, et je vous en prie, et vous aurez un breton ». Lequel Pierre Le Noir moult arrogamment et felonnessement respondi qu'il renyoit Dieu qu'il n'y entreroit ja, ne savoit icelui la Chose pour quoy. Et alors lui dist : « Baillez nous vostre bombarde et nous la porterons, puisque vous n'y voulez venir ».

Laquele ledit la Chose print. Et tantost ledit Pierre le Noir renya Dieu de rechief que s'il la là prenoit, il crieroit harou sur lui. Lequel la Chose lui respondi qu'il ne criast point harou et qu'il ne lui demandoit riens, combien que ledit Pierre le Noir usast tousjours de paroles malgracieuses. Et soubz umbres d'iceles paroles, icelui la Chose print ung pain, faisant semblant de l'en ferir, ce qu'il ne fist mie. Et ce fait, se parti ledit la Chose de la compaignie dudit Pierre le Noir, en demandant par ledit la Chose en l'ostel dudit d'Esqueville où estoit Perrenet le filz dudit d'Esqueville, a la chamberiere dudit hostel. Et ainsi qu'il eust ce dit a ladicte chamberiere, se retourna, et en soy retournant, ledit Pierre le Noir, sans dire mot, lui bailla un horion d'une fourche fiere sur le visage environ l'œil, et lui fist plaie, dont il yssy grant effusion de sang, et un autre horion du bout de ladicte fourche fiere par la poitrine, en lui disant en anglois : « Va-t'en, vilain » et autres paroles injurieuses. Et alors ledit la Chose trouva un baston ferré par le bout, qu'il ala querir en sa maison, qui est auprès et joingnante de la maison dudit d'Esqueville, et retourna oudit hostel où estoit ledit Pierre le Noir. Et ainsi qu'il y entroit, trouva Alain Mercher, dit Baron, qui demanda audit la Chose qui lui avoit fait ce qu'il avoit ou visage. Lequel la Chose respondi que ce avoit fait ledit Pierre le Noir. Et quant icelui Pierre le Noir entendit ledit la Chose, s'adreça a lui atout sadicte fourche fiere, pour derechief le vouloir grever, ja soit ce qu'il feust bien blecié et seignast fort. Et alors quant ledit la Chose se retourna et vit que ledit le Noir le poursuivoit, et disoit que encores en auroit il, en voulant frapper ledit la Chose, icelui La Chose bouta de son baston un cop contre le visaige dudit Pierre le Noir auprès de l'oeil, sans cop lever, fors seulement bouter et ung cop seulement, come dit est ; duquel cop yssy sang, et ne s'en fist point appareillier pour lors ne jusques au lendemain bien tart. Après lequel cop il vesqui jusques au vendredi ensuiant, qui furent cinq jours qu'il vesqui depuis, a la fin desquelz cinq jours il ala de vie a trespassement. Pour occasion duquel cas, ledit Guillaume la Chose, doubtant rigueur de justice, s'est absenté du pais... ledit Guillaume la Chose a tousjours esté homme de bonne vie... excepté que ou mois de may l'an mil CCCC XXIX il obtint de nous noz autres lettres de grace et remission en laz de soie et cire vert pour avoir enfraint certaines treves qu'il avoit données a Alain Baron et sa femme, combien que l'en dit que a la coustume de nostre pais de Normandie, s'il n'y a sang et plaie, ne pevent estre enfreintes teles treves pour recevoir mort, mais y a grant amende... Si donnons en mandement par ces mesmes presentes a nostre bailli de Rouen... Donné a Paris, le xxiiij de decembre, l'an de grace mil CCCC XXXII et de nostre regne l'unziesme. Ainsi signé : Es requestes tenues par mons. le gouvernant et regent le royaume de France, duc de Bedford, esqueles vous les evesques de Lisieux et de Paris, le chastellain de Beauvais, les abbez de Fescamp et du Mont Saint Michiel et pluseurs autres estoient. Oger.

CCXXI. — Paris, 30 décembre 1432.

Rémision à Guillaume Bernart, clerc du guet du château d'Alençon, pour le meurtre de Thomas Sanson, de la garnison dudit lieu, avec lequel il s'était pris de querelle à propos de son office et qui voulait lui passer sa guisarme au travers du corps. (JJ 175, n. 173, fol. 54 recto.)

Henry, etc., Savoir faisons, etc., nous avoir receue l'umble supplicacion de Guillaume Bernart, natif de nostre royaume d'Angleterre, aagié de cinquante ans ou environ, contenant comme il eust nagaires esté commis clerc du guet du chastel d'Alençon par nostre amé et feal chevalier Jehan Ffastolf, garde et gouverneur des chastel et ville dudit lieu d'Alençon soubz nostre tres chier et tres amé oncle Jehan, gouvernant et regent nostre royaume de France, duc de Bedford, capitaine dudit lieu d'Alençon, ouquel office il se soit bien et loyaulment gouverné sans aucune reprehencion. Neantmoins, a l'occasion de ce que ycelui suppliant vouloit ou se efforçoit de contraindre, comme raison estoit, Thomas Sanson, de la garnison dudit lieu d'Alençon, pour les defaulx en quoy icelui Sanson avoit esté mis par pluseurs foiz pour non estre alé ne comparu, ne personne pour lui, au guet dudit chastel, non obstant que par ledit suppliant, ainsi commis clerc dudit guet, y eust esté semons et anoncié par pluseurs foiz et que ledit Sanson feust ad ce subgiet et tenu, et dont il avoit esté remis et defaillant, ycelui Sanson a conceue grant haine contre lui, tellement que, en un certain jour du mois de juing derrenierement passé, pour ce que ledit suppliant print gaige sur ledit Sanson pour lesdiz defaulx, qui bien se montoient a xvij solz tournois et laquele some ledit suppliant avoit pour lui païée, ycelui Sanson tira sa dague sur ledit suppliant et s'efforça de l'en fraper. A quoy ycelui suppliant lui dist qu'il ne feist nul effort sur lui et que s'il cuidoit qu'il lui feist tort qu'il s'en alast avecques lui devers son connestable pour soy plaindre de ce. Et en perseverant tousjours en son mauvais propos et male volenté, pour cuidier grever ledit suppliant, ycelui Sanson print son arc et de fait en vult ou cuida grever ledit suppliant ; ce qu'il eust fait se n'eussent esté aucuns de la garnison dudit lieu d'Alençon qui l'empescherent. Et depuis, ou mois de juillet ensuivant et derrenierement passé, pour ce que ledit suppliant ne vult prendre ledit Sanson a pleige pour Guillaume Dean, de ladicte garnison, pour pareille somme de xvij s. t., qu'il devoit audit suppliant et qu'il avoit païée pour lui pour les defaulx de ses guetz, ycelui Sanson, ou contempt de ce et des autres choses dessusdictes, le menaça et usa de grans menaces, en lui disant qu'il se gardast de lui et que bien brief il le courrouceroit. Et lors ledit suppliant, ce oyant et pour eviter l'inconvenient qui en pavoit ensuir, se bouta dedens le chastel dudit lieu d'Alençon. Et la nuit ensuivante, pour cuidier tousjours grever ledit suppliant, se mist en aguet contre lui ; laquele chose il

ne pot lors faire. Et le landemain icelui Sanson, tenant une guiserme en sa main, en perseverant tousjours a sa male volenté et entreprise, actendi ledit suppliant jusques a environ neuf ou dix heures au matin que ledit suppliant yssy dudit chastel. Et tantost qu'il le vit, le ala assaillir, en le cuidant et voulant tuer, et de fait gecta plusieurs cops d'icele guiserme contre ledit suppliant, lequel au mieulx qu'il pot resista a la fureur et mauvaise volenté dudit Sanson, et tant que ycelui Sanson recula en usant de grosses paroles et menaces contre ledit suppliant. Lequel, indigné et courroucié de ce, se advança et d'une guiserme qu'il tenoit frappa du plat ledit Sanson ung cop tant qu'il chey a terre. Et lors ledit suppliant mist le pié sur la guiserme d'iceui Sanson et la lui cuida oster, ce qu'il ne pot fere ; mais tousjours disoit ycelui Sanson qu'il tueroit ledit suppliant et lui cuida bouter d'estoc sa guiserme dedens le corps. Et lors ycelui suppliant, voiant que tousjours ledit Sanson perseveroit en sa mauvaise et dampnable volenté, et pour éviter l'inconvenient de sa personne, et come tout esmeu et par eschaufeture, frapa un cop du doz de sa guiserme de la pointe ou bec de faucon de derriere ledit Sanson par la teste, duquel cop quatre jours après ou environ il ala de vie a trespas. Pour occasion duquel cas ledit suppliant s'est destourné et destourne de son lieu ... Si donnons en mandement par ces mesmes presentes au bailli d'Alençon ... Donné a Paris, le penultime jour de decembre, l'an de grace mil CCC XXXII et de nostre regne le xj me. Ainsi signé : Par le Roy, a la relacion du Conseil. Oger.

CCXXII. — Paris, 30 décembre 1432.

Rémision à Guillaume du Val, d'Argentan, impliqué dans le complot ourdi par un religieux Jacobin et d'autres habitants de cette ville, en vue de la livrer aux Français de la garnison de Bonmoulins. (JJ 175, n. 174, fol. 54 verso.)

Henry, etc., Savoir faisons, etc., nous avoir receu l'umble supplicacion de Guillaume du Val, aagé de xl ans ou environ, natif de la ville de Harrefleu et a present retrait et demourant en la ville d'Argenthen, contenant comme lui et ses predecesseurs par le moien de marchandise aient eu leur vie, estat et sustentacion. Et a ceste occasion ait ycelui suppliant eu et encores ait congnoissance d'un notable bourgeois et marchand de nostredicte ville de Caen, nommé Pierre Edouard. Lequel marchand, le jour de saint Michiel ot un an, qui estoit jour de foire, seant pres et hors ladicte ville de Caen, fu pris par noz ennemis et adverseres, qui pour lors firent une course sur ladicte foire et mené prisonnier en la forteresse de Bonsmoulins. Auquel lieu ycelui Pierre Edouard a esté rançonné et mis a la somme de deux mil saluz d'or, drois et despens, deux draps d'argent et pluseurs menues parties. Lequel Edouard, considerant qu'il n'avoit pas enfant de son corps yssant ne personne qui de sadicte finance se voulsist entremectre pour les dangiers de la guerre, qui lors estoient et encores sont entre la ville de Caen et ledit lieu de Bonsmoulins, aiant confiance audit suppliant, dont il avoit assez congnoissance, parce que pluseurs foiz ilz avoient esté et fait fait de marchandise ensemble, lui fist savoir que il voulsist penser de son fait et delivrance, et pour ce fere lui envoya saufconduit de nosdiz adverseres. Duquel prendre et user ledit suppliant, doubtant mesprendre envers nous, obtint congé et licence de nostre amé et feal le sire de Wilughby, lors nostre lieutenant en Normandie. Et après et pendant que ledit suppliant s'entremist de poursuivre la finance et delivrance dudit Edouard et que aucunes foiz pour ladicte cause il aloit pour en porter partie, lui fu par aucuns des gens de Bonsmoulins, noz adverseres, demandé que, ou cas que ilz ou aucuns d'eulx venroient devant ladicte ville d'Argenthen, se il leur mefferoit ou tireroit point a eulx. Et adonc ycelui suppliant leur respondi que non, sans ce toutesvoies qu'il eust de leur fere plaisir aucune volenté. Et après ces choses, demi an ou environ, un Jacobin dudit lieu d'Argenthen, nommé frere Guillaume Payan, rancontra es faulxbours dudit lieu ledit suppliant, auquel il demanda se il lui donroit sa part d'un pot de vin. Auquel Jacobin ycelui suppliant respondi que oyl tres volentiers. Et adonc ledit Jacobin lui dist qu'il alast en la chambre frere Jehan Laisné, et il auroit sa part de tele viande come il y avoit, feust beuf, mouton ou autre chose, qui estoit tout prest. Et ces choses faictes, s'en tourna ledit suppliant en ladicte ville d'Argenthen en sa maison ou ailleurs en ladicte ville, print un pot de vin, lequel il fist porter en la chambre dudit Jacobin. Et quant il y fu arrivé, après ce qu'il ot beu et mengié, demanda audit Jacobin qui estoit un homme qui estoit a table avecques eulx, vestu d'une calobe (i) de toile et un meschant chaperon. Lequel Jacobin lui respondi que c'estoit un compaignon de la garnison dudit Bonsmoulins qui avoit fait grant bien a lui et a ses compaignons, en lui priant qu'il lui voulsist fere bonne chiere. Et quant ycelui suppliant advisa par la fente du colet de ladicte calobe de toile qu'il estoit vestu d'un pourpoint lassé de soye, dist que ladicte robe, pourpoint et chaperon ne se accordoient pas bien. Et lors et après toutes ces choses ledit suppliant se departi d'avecques eulx, sans l'avoir aucunement dit ne revelé a justice depuis. Et depuis la feste saint Michiel derrain passée, ledit Jacobin dessusnommé et autres, come on dit, ont cuidié traire et livrer ladicte ville et chastel d'Argenthen; lesquelz ont pour ladicte cause depuis esté prins et arrestez prisonniers. Et en les examinant sur ledit cas eulx ou aucuns d'eulx, après ce qu'il leur fu demandé se ledit suppliant en savoit aucune chose, dirent que riens n'en savoit, mais ilz esperoient qu'il en avoit bien oy parler parce qu'il hantoit souvent audit lieu de Bonsmoulins. A l'occasion de laquele chose, trois ou quatre jours le cas ainsi advenu et les aucuns des dessusdiz prins, ledit suppliant fu arrêté et mis prisonnier audit lieu d'Argenthen. Auquel lieu il a esté

gehiné en tele maniere que on lui a desnoé un bras et une jambe. Par quoy il est en voie que jamais ne se puist aidier de membre qu'il ait, et telement qu'il a dit et confessé qu'il le savoit parce que il en avoit oy parler a aucuns, combien que l'en doit tenir que audit fait il n'eust onques voulenté, actendu que, puis ledit cas advenu et aucuns des dessusdiz mis prisonniers, ledit suppliant avec sa femme au devant de son empeschement fu et demoura trois ou quatre jours en ladicte ville d'Argenthen, sans soy aucunement absenter ne demucier, ce qu'il eust bien fait s'il eust voulu, considéré aussi que quant en ladicte ville fu crié alarme, trayson, ledit suppliant ala, armé et habillé souffisaument, sur les murs d'icelle ville come plusieurs autres. Pour occasion desqueles choses par lui non raportées a justice ou autrement, icelui suppliant est detenu, come dit est, prisonnier audit lieu d'Argenthen... Si donnons en mandement par ces mesmes presentes au bailli d'Alençon... Donné a Paris, le penultime jour du mois de decembre, l'an de grace mil CCCC XXXII et le xje de nostre regne. Ainsi signé : Par le Roy, a la relacion de mons. le gouvernant et regent le royaume de France, duc de Bedford. Brounyng.

CCXXIII. — Paris, décembre 1432.

Rémission à Perrin Hébert, de Belval, qui est allé à plusieurs reprises dans le pays de Couvains, en compagnie d'un certain Colin Masure, de Cambernon, et y a pillé et détrossé un grand nombre de voyageurs. (JJ 175, n. 171, fol. 53 verso.)

Henry, etc., Savoir faisons, etc., nous avoir receu l'umble supplicacion des femme, parens et amis charnelz de Perrin Hebert, povre jeune homme de l'aage de xviii ans ou environ, chargé de sadite femme, aagée de xiiij a xiiij. ans ou environ, a present ou nagaires demourant en la paroisse de Belleval, en la viconté de Coustances, contenant comme, depuis an et demy ença ou environ, un nommé Colin Masure, de Cambernon, en ladicte viconté, feust venu devant ledit Perrin Hebert, qui lors estoit en son mesnage, avec sadite femme, faisant sa besoingne, sans panser a aucun mal, et eust ledit Colin Masure, lors aagié de vint cinq ans ou environ, parlé secretement et a part audit Perrin Hebert, en lui disant et exposant que on devoit audit Colin Masure certain argent es parties d'oultre la ville de Saint Lo, en esloignant dudit lieu de Coustances, et en especial en la parroisse de Couvains, pour certains services que ledit Colin Masure disoit y avoir fais, en priant et exhortant par ledit Colin Masure audit Perrin Hebert qu'il vouldist aler avecques lui esdictes parties querir son argent. Lequel Perrin Hebert, qui lors estoit jeune simple homme, de l'aage de xvj a xvij ans ou environ, se feust simplement, et a l'induccion et mauvais conseil dudit Colin Masure, consenti et accordé d'aler avecques ledit Colin Masure, esdictes parties d'oultre Saint Lo, environ les marches dudit lieu de Couvains. Et de fait iceulx Colin Masure et Perrin Hebert, eulx estans partiz pour aler oudit voiage esdictes parties d'oultre Saint Lo, a une certaine journée et lieu trouverent et rancontrerent ylec deux hommes, alans et passans leur chemin, lesquelz Colin Masure et Perrin Hebert, qui lors avoit et tenoit un vouge, attesterent lesdiz deux hommes et de fait mistrent la main a eulz ; et pour les mectre en leur obeissance ledit Perrin Hebert les frappa et leur donna deux ou trois cops du plat de sondit vouge et du manche qu'il avoit et tenoit; et print et arresta ledit Perrin Hebert l'un desdiz deux hommes et ledit Colin Masure l'autre ; et par mauvaise convoitise et temptation de l'ennemy, et par force et contre le gré et voulenté desdiz deux hommes, prindrent et leur osterent leurs bourses ; et en la bourse de celui desdiz deux hommes que print ledit Perrin Masure et Perrin Hebert se firent convoier et guider et conduire a chevaulx par l'un desdiz hommes jusques et envers leurdit pais, et puis renvoierent lesdiz chevaulx par ledit homme qui les avoit convoiez et guidez et lui donnerent congié, et s'en vindrent yceulx Colin Masure et Perrin Hebert en leurdit pais, où ilz sejournerent par aucun temps, et pour les cas et larrecins dessusdiz ledit Colin Masure a esté prins et apprehendé et mis en noz prisons et par nostre justice pour ses demerites executé ; mais pour cause et occasion des faiz et cas dessusdiz ledit Perrin Hebert... pour doubte de rigoureuse justice s'est absenté du pais... Si donnons en mandement a nostre bailli de Coustantin, aux vicontes de Carenten et de Coustances... Donné a Paris, ou mois de decembre, l'an de grace mil CCCC XXXII et de nostre regne le xj e . Ainsi signé : Es requestes tenues par mons. le gouvernant et regent le royaume de France, duc de Bedford, où vous les evesques de Lisieux et de Paris, les abbez de Fescamp et du Mont Saint Michiel, le sire de l'Isle Adam, mareschal de France, le Premier President, messire Jehan de Courcelles, l'arcediacre de Paris et plusieurs autres estoient. J. Milet.

CCXXIV. — Paris, 7 janvier 1433 (n. s.).

Rémission à Guillemin du Val, de Bacqueville-en-Caux, qui, craignant d'être poursuivi par la justice à cause de ses relations avec un brigand, nommé Cardin Qyesnel, a quitté son logis et s'est mis au service de deux partisans français retirés dans la forêt de Lyons. (JJ 175, n. 175, fol. 55 recto.)

Henry, etc., Savoir faisons, etc., nous avoir esté exposé de la partie des amis charnelz de Guillemin du Val, de la parroisse de Baqueville en Caux, que ycelui du Val est simple homme laboureur de bras, aagié de vint

et six ans ou environ, chargé de femme et enfans et que, depuis demi an ença ou environ, feu Cardin Quesnel, estant lors en nostre obeissance, le admonnesta et exorta de soy aler rendre de la partie de noz adversaires. A quoy ledit du Val ne se vout consentir. Et depuis advint que ledit Quesnel se ala rendre avec nozdiz adverseres, et assez tost après fu prins et executé a Arques pour ses demerites, et fu environ le mois d'aoust derrain passé. Lequel du Val, doubtant que ledit Quesnel ne l'eust accusé des paroles qu'ilz avoient eu ensemble, et qu'il ne savoit bonnement de quoy vivre a l'occasion de la guerre, et aussi qu'il avoit perdu tout le sien, se parti dudit lieu de Basqueville, deux mois a ou environ, et s'en ala à Saint Lucien en la forest de Lyons, en l'ostel de Guillemot du Val, son parent. Auquel il dist qu'il le venoit veoir pour soy tenir avecques lui certain temps pour doubte de la mort qui estoit audit lieu de Basqueville. En l'ostel duquel du Val, son parent, il se tint ung mois ou environ. Duquel hostel ledit Guillemot du Val, soy sentant malade d'une apostume, se parti et s'en ala a Noleval près de ladicte forest, en l'ostel d'une nommée la Caille, ad ce que par sadicte apostume aucun dangier ne maladie ne survenist audit hostel de sondit parent. Lui estant ouquel hostel de ladicte Caille, survindrent en ycelui un nommé Guillemot Patenostre et Jehan de Bruieres noz adverseres, lesquelz le prindrent comme leur prisonnier. Et après ce que il le eurent prins et qu'ilz le vouloient mectre a finance hors dudit hostel, leur dist que de lui ilz n'auroient riens et qu'il s'estoit parti de son pais come tout desesperé, et ne lui chaloit qu'il devenist, car il avoit tout perdu le sien aux dez. Après lesqueles paroles ilz le receurent en leurs compagnies et s'en ala avecques eulx en la forest, portant une espée qu'il avoit apportée de son hostel dudit lieu de Basqueville, quant il en estoit parti. Lui estant en laquele forest de Lyons avecques lesdiz Patenostre et Bruieres, passerent aucuns chaçours de marée, dont ilz arresterent les deux et trois de leurs chevaux et les rançonnerent a cinq saluz, dont l'en ne paia que trois, l'un fu baillié audit de Bruieres et les deux autres demourerent devers ledit Patenostre, et n'en eut riens ledit du Val. Et après ce partirent de ladicte forest et s'en alerent en un bocquet a Bruguedalle, où ilz rancontrerent un homme qui portoit sept aulnes de drap violet ou environ. Lequel homme fu par eulx prins et arrêté. Et après ce baillerent a garder ledit homme audit du Val, lequel il garda pendant le temps que lesdiz Patenostre et de Bruieres alerent en la coste dudit bois veoir s'il survendrait riens sur eulx. Et ainsi que ledit du Val gardoit ledit homme, ycelui homme se leva et se bouta dedens le bois et se eschapa ; dont ycelui du Val ne fist aucune poursuite et desja se repentoit d'estre avecques les dessusdiz et eust bien voulu estre hors de leur compagnie. Et ainsi que lesdiz compagnons revindrent a ycelui du Val, ilz oirent gens qui les queroient, et en traversant un autre bois furent prins par ceulx de la garnison de Rouvray, duquel lieu de Rouvray il a esté admené en noz prisons a Rouen, esqueles il est de present pour occasion de ce que dit est... Si donnons en mandement a nostre bailli de Rouen ... Donné à Paris, le vij e jour de janvier, l'an de grace mil CCCXXXII et de nostre regne le xj me. Ainsi signé : Par le Roy, a la relacion de mons. le gouvernant et regent de France, duc de Bedford. J. Milet.

CCXXIV*. — Rouen, 23 mars 1423 (n. s.).

Rémission à Guillaume Blondel, cordonnier de Bernay, pour le meurtre de Guillaume Bourgueil, avec lequel il était en procès au sujet d'une acre de terre que ce dernier lui avait promise en échange du paiement de sa part de la taille. (JJ 175, n. 229, fol. 74 verso.)

Henry, etc., Savoir faisons, etc., nous avoir receu l'umblé supplicacion de Guillaume Blondel. aagé de cinquante ans ou environ, du mestier de cordouennerie, chargé de femme et de quatre petiz enfans, comme il soit ainsi que pour l'aide a nous accordée a nostre joyeux advenement en nostredit royaume de France, pour lequel aide eust esté baillée certaine porcion aux manans et habitans de la parroisse Nostre Dame de la Couture de Bernay, ou bailliage d'Alençon, pour laquele asseoir eussent ledit suppliant, Guillaume Bourgueil, son filz, et plusieurs autres habitans dudit village assemblez, ou en laquele assiete faisant plusieurs paroles eussent esté parlées entre ledit Bourgueil son filz et eussent dit audit suppliant qu'il estoit plus riche que eulx et qu'il en pouvoit plus paier que ilz ne feroient. A quoy leur fu respondu par ledit suppliant que une acre de leur terre valoit mieulx que tout son vaillant. Et lors eussent respondu lesdiz Bourgueil et son filz a icelui suppliant qu'ilz lui donnoient la meilleur acre de terre qu'ilz eussent, mais qu'il les vouldist acquicter dudit aide et taille. Ce que ledit suppliant leur accorda, et marchanda a eulx. Et peu de temps après, ledit suppliant fist citer lesdiz Bourgueil et son filz devant l'official de Lisieux pour enteriner ledit marché. Et eulx estans audit lieu de Lisieux a leur journée, prindrent arbitres pour eulx accorder, et leur eussent iceulx arbitres baillié journée pour venir devant eulx. Et dudit lieu de Lisieux se partit ledit suppliant. Et incontinent vindrent lesdiz Bourgueil et son filz après lui ; lesquelz lui dirent environ deux lieues dudit lieu de Lisieux qu'ilz lui feroient desplaisir et le batroient se il ne les quictoist dudit procès. Lequel suppliant leur dist que ilz avoient bons arbitres et que ilz les sauroient bien appointier, et s'en attendoit a eulx. Et incontinent lesdiz Bourgueil et son filz, ladicte response oye, se prindrent audit suppliant et le batirent, et lui donnerent plusieurs cops de poing et de pierre et le gecterent a terre, et lui firent sang et plaie; duquel conflict ledit suppliant se eschappa des dessusdiz et s'en fouy parmi le chemin. Mais lesdiz Bourgueil et son filz le suivirent, tousjours disans a icelui suppliant : « Tu ne nous eschaperas pas ! » Et incontinent ledit suppliant print une pierre et la gecta derriere lui, en soy enfuiant tousjours, et en

frappa ledit Bourgueil par la teste ; duquel cop icelui Bourgueil ala viij jours après de vie a trespas. Pour occasion duquel cop ledit suppliant se feust retrait en nostre obeissance, en l'ostel de ses parens a trois lieues de son hostel ; auquel lieu il fu prins par nos ennemis et adverseres de la garnison de Bons Moulins, et mené audit lieu, auquel lieu il a esté longuement tenu en fers et en fosse en grant povreté et misere et jusques ad ce qu'ilz l'ont contrainct a ouvrer de sondit mestier de cordouennerie, sans soy entremectre aucunement du fait de guerre, duquel mestier il a ouvré jusques a nagaires qu'il s'est retrait en nostredicte obeissance, en laquele il est mussié a l'occasion du cas dessusdit et ne s'oseroit monstrez ne repaier avecques sesdiz femme et enfans pour doubte et crainte de justice... Si donnons en mandement au bailli d'Alençon... Donné a Rouen, le xxiiij jour de mars, l'an de grace mil CCC XXXII et le xj me de nostre regne. Ainsi signé : Es requestes tenues par mons. le gouvernant et regent le royaume de France, duc de Bedford, esqueles vous les evesques de Lisieux, d'Evreux, l'abbé du Mont Saint Michiel, le seigneur de Saint Pierre et autres estoient. J. Le Clerc.

CCXXV. — Rouen, 24 mars 1433 (n. s.).

Rémision à Robin Le Longuet, boucher de la paroisse de Lieusaint, qui, manquant d'argent pour s'acquitter d'une dette de six livres tournois envers Jean de Hennot, dit Colomby, et pour payer les frais de ses noces, s'est emparé de deux bœufs errant dans la forêt de Brix et les a vendus à Montebourg. (JJ. 175, n. 232, fol. 75 verso.)

Henri, etc., Savoir faisons, etc., nous avoir oye l'umblé supplicacion de Robin le Longuet, de la parroisse de Lieux Sains, es bailliage de Coustantin et viconté de Valoingnes, simple homme bouchier, aagé de xxv ans ou environ, chargé de jeune femme, contenant que, puis deux ou trois mois ença ou environ, ledit suppliant, Godefroy et Raoul les Longuetz, ses freres, et Robine leur mere, se sont trouvez ensemble en certaine nuit, dont il n'est recors. Et en parlant de leurs besoingnes et affaires, entrerent a parler comme ilz pourroient finer a Jehan de Hennot dit Colombie, qui avoit sur ledit suppliant un gaige ou obligacion montant à la somme de six livres tournois, a cause de ce qu'il avoit plegié Simon Marie de ladicte somme envers ledit Hennot, et si y avoit encores a cause de ce certains despens ; de laquele somme et despens icelui suppliant avoit tousjours cuidié que ledit Simon le delivrast envers icelui Hennot, come tenu y estoit. Et disoient entre eulx ledit suppliant et sesdiz mere et frere qu'il convenoit faire grans fraiz et mises tant pour les nopces d'icelui suppliant, qui avoit nagaires fiancée femme et estoit le terme près de espouser, comme autrement. Et toutesfoiz doubtoient que ledit Hennot les fist executer pour ladicte somme, non obstant qu'ilz n'eussent de quoy faire lesdiz fraiz et mises ne dont ilz se peussent acquitter ; et ainsi se complaignoient les ungs aux autres. Lequel Raoul, frere dudit suppliant, leur dist qu'il avoit en la forest, vers l'eaue de Clere, un beuf esgaré et qu'il avoit demandé a aucuns des pasteurs ou bergiers qui gardoient les bestes a qui il estoit, lesquelz lui avoient dit qu'ilz ne savoient. Pour quoy commencerent a dire qu'ilz l'auroient et le yroient querir et que se il venoit a congnoissance a qui il feust ilz le rendroient. Et sur ce prindrent terme que le mercredi ensuivant, ledit Raoul yroit querir ledit beuf, et ledit suppliant le jeudi ensuivant yroit au soir au devant de lui en ladicte forest. Et ainsi le firent et admenerent ledit beuf en leur hostel et ylec le tuerent et en fu la char mengée aux nopces dudit suppliant. Lequel après ce en vendi le cuir au marchié a Montebourg, le prix et somme de xix s. vij d. t. Et xv jours après ou environ ledit cas ainsi advenu, ledit suppliant et ledit Godefroy, son frere, tempez de l'ennemi, voians qu'ilz ne pvoient avoir de quoy eulx acquicter audit de Hennot, alerent en ladicte forest et en icele prindrent un autre beuf, qui appartenoit a certaines gens nommez les Mesnagiers. Lequel beuf ledit suppliant, qui est bouchier, comme dit est, tua et le porta vendre audit lieu de Montebourg et icelui distribua ainsi qu'il peust a plusieurs personnes, dont il receut les deniers tant de la char come du cuir, et valoit bien icelui beu lx s. t. ou environ. Et il soit ainsi que depuis lesdiz cas ainsi faiz et commis par ledit suppliant et sesdiz freres, il soit venu a leur congnoissance que lesdiz deux beufs appartenoient ausdiz Mesnagiers. Pour laquele cause, recongnoissant leur meffait et pechié, voulans aussi de ce fere restitution comme raison estoit et est, leur en ait ledit suppliant fait satisfacion et paiement et tant qu'ilz en sont contens, mais ce non obstant pour ce que lesdiz faiz et cas sont venuz a notice de justice, ilz doubtent la rigueur d'icele justice... Si donnons en mandement au bailli de Coustantin. .. Donné a Rouen, le xxiiij e jour du mois de mars, l'an de grace mil CCCXXXII et de nostre regne le xj me . Ainsi signé : Par le Roy, a la relacion du Conseil. Oger.

CCXXVI. — Therouanne, 4 avril 1433 (n. s.).

Rémision à Jean Hauce, du pays de Hollande, pour plusieurs actes de brigandage par lui commis pendant le siège de Louviers par les Anglais. (JJ 175, n. 245, fol. 82 recto.)

Henry, etc., Savoir faisons, etc., nous avoir receu l'umblé supplicacion des parens et amis charnelz de Jehan Hauce, homme d'armes a cheval, aagé de xl ans ou environ, natif du pays de Hollande, nostre homme lige et subgiet, contenant que come, alors que derrenierement nostre ville de Louviers estoit occupée par noz

ennemis et adverseres durant le siege mis et ordonné de par nous devant ladicte ville, ledit Hauce, lors de la garnison de nostre ville d'Evreux, et autres de sa com la poullaille et du poisson, dont ledit Hauce ne ceulx de sadicte compaignie n'eussent aucune chose païé. Lesqueles choses sont venues a congnoissance de nostre justice et mis par noz officiers prisonniers en noz prisons audit lieu de Louviers et depuis admené en noz prisons du Pont de l'Arche... Si donnons en mandement par ces mesmes presentes au bailli de Rouen... Donné a Therouenne, le iiije jour d'avril, l'an de grace mil CCCXXXII et de nostre regne le xj me. Ainsi signé : Par le Roy, a la relacion du Conseil. Oger.

CCXXVII, — Paris, 11 avril 1433 (n. s.).

Rémision à Colin Robert, accusé de la mort de Guillaume Picot, de Coulouvray, avec lequel il était en rivalité au sujet d'une jeune femme qu'ils avaient tenue l'un et l'autre en concubinage. (JJ 1 yS, n. 233, fol. 76 recto.)

Henry, etc., Savoir faisons, etc., nous avoir receu l'umble supplicacion des parens et amis charnelz et affins de Colin Robert, povre homme laboureur, chargé de pluseurs enfans, contenant que, come de nouvel la femme qu'il avoit espousée feust alée de vie a trespassememt et feust demouré tres despourveu chargé de pluseurs petiz enfans, come dit est. Et, lui estant en cest estat, une jeune femme qui s'en estoit alée es parties de Poitou, laquele s'estoit mauvaïsement gouvernée et delaissié son mary, se feust venue rendre d'aventure en son hostel, qui est assis en pais estrange et près de bois et de forests. Et lui voiant qu'il estoit depourveu de femme et que bonnement ne se pavoit chevir, tant pour le gouvernement de ses enfans que de ses bestes aumailles et mesnage, eust qu'il menoit en sa compaignie, et ledit Colin se bouta en l'ostel dudit Picot, où il arriva sur l'anuitement environ jour failli, en esperance de parler a ladicte femme, et trouva que ledit Picot estoit en son lit couchié. Lequel oyt la frainte et le langage dudit Colin et cuida fermement que ce feussent brigans et ennemis, et tres esfraié et en haste se leva de son lit. Et ainsi qu'il fu levé, vit ledit Colin, et, cuidant que ce feust ung brigant, lui courut sus, en voulant eschaper, et le frappa. Lequel Colin, aiant paour de la mort, se defendi d'un baston de coudre non ferré qu'il avoit et frappa ledit Picot un cop ou deux par le corps sans lui fere sang ne plaie. Et tantost pour la noise qu'ilz faisoient se leva un hu pour fere assembler le voisiné et doubterent un chascun, tant ledit Colin que ledit Picot, que les brigans et ennemis qui par chascun jour hantoient le pais ou autres malveillans ne venissent. Pour quoy ledit Colin et ledit Picot se retrairent et mucerent en lieux forains pour eschever la rigueur des survenans. Et au regard dudit Picot, qui estoit non habillé de vesture, mais s'estoit levé en haste, se retray en un buisson où il fu tout au long de la nuit ou environ, et tant pour paour qu'il ot que pour la froidure et povreté qu'il receust en icele nuit, se sengmella et chey en tele foiblesse de corps que assez tost après il ala de vie a trespassememt, après ce qu'il ot esté confessé... Si donnons en mandement... a nostre bailli de Caen... Donné a Paris, le xj me jour du mois [d'avril], l'an de grace mil CCCXXXII, veille de Pasques, et de nostre regne le xj me. Ainsi signé : Par le Conseil. Chembaut.

tremect. Et incontinent, en l'absence de sondit mary et a son desceu, lequel estoit alé au matin au lieu de Meauffe, qui est environ a une lieue dudit Saint Lo, où il a un pou d'eritage, qu'il estoit alé faire labourer, pour en avoir sa vie bien et loyaument, icele femme entra en l'ouvroir de sondit mary, lequel elle ferma sur elle, et le plus secretement et celement qu'elle peut, fondit icelui calice et le mist en lingoz, pour cuider trouver maniere de le vendre et en avoir l'argent pour s'en acquicter, afin que son mary n'en eust aucune congnoissance. Et combien que, incontinent et si tost que icelui Joret, suppliant, peut avoir congnoissance du fait dessusdit, ainsi commis par sadicte femme, et dont il fu tres amerement courroucié et desplaisant en son cuer, il fist tant que des lendemain au matin dudit jour de jeudi que ledit cas estoit advenu, l'argent, en l'estat qu'il avoit esté mis quant fondu avoit esté, fut rendu par sadicte femme, et si furent iceulx supplians moult merriz et courrouciez de ce. Et oultre icele femme, tres amerement soy repentant et elle aiant grant contriccion et douleur au cuer de ladicte temptacion en quoy elle estoit ainsi encheue, s'en ala confesser bien et devotement, et si fu l'argent dudit calice rendu ausdiz religieux abbé et convent de ladicte abbaye, a qui il appartenoit, qui en furent bien contens. Par quoy iceulx supplians, qui sont simples gens, cuidans ladicte femme estre bien deschargée tant en conscience que autrement et que par le moien de ladicte restitution faite ainsi volontairement que dit est, la justice n'y eust que veoir, ne s'en fuirent ne demucerent aucunement de dessus leurs heritages, où ledit suppliant faisoit fere sondit labour, et toustesvoies, non obstant icele restitution depuis qu'elle fu faite, furent prins par l'ordonnance de justice et admenez prisonniers es prisons dudit lieu de Saint Lo... Si donnons en mandement par ces mesmes presentes a nostre bailli de Coustantin... Donné a Paris, le xxij e jour du mois d'avril, après Pasques, l'an de grace mil CCCXXXIII et de nostre regne le xj me . Ainsi signées : Par le Conseil. Greslé.

CCXXVIII*. — Calais, 12 juin 2433.

Rémission à Guillaume Pepin, Guillaume et Eliot de Houdetot, dits les Fieux, écuyers, pour avoir tué, à Grainville en Caux, Jean Faucon, écuyer, avec lequel ils avaient eu une discussion au sujet du paiement d'un écot. (JJ 175, n. 25g, fol. 87 recto.)

Henry, etc., Savoir faisons, etc., nous avoir receu l'umble supplicacion des parens et amiz charnelz de Guillaume Pepin, aagié de xxij ans ou environ, de Guillaume de Houdetot, dit le Fieux, aagié de xxxvj ans ou environ, chargé de femme et de plusieurs petiz enfans, et de Eliot de Houdetot, dit le Fieux, aagié de xxviii ans ou environ, escuiers, contenant comme, environ le jeudi xiiij e jour du mois de may derrain passé, Jehan Faulcon, escuier et ledit Guillaume Pepin et autres plusieurs eussent disné en la ville de Granville ou bailliage de Caux, en l'ostel de Rogier le Besié, tavernier audit lieu. Et soit ainsi que, tantost après, lesdis Jehan Faulcon, Guillaume Pepin et autres de leur compaignie se feussent partiz dudit hostel et feussent alez en l'ostel de Tassin du Forestel, tavernier aussi demourant audit lieu de Granville, auquel hostel les chevaulx desdiz Faulcon et Pepin estoient logiez. Et lors ledit Guillaume Pepin dist audit Jehan Faulcon que c'estoit mal fait a lui qu'il n'avoit païé son escot ; et ledit Faulcon lui respondi qu'il en avoit païé un breton ; et icelui Pepin lui dist derechief qu'il en avoit païé ou demouré a l'oste de iiij bretons, oultre ce que lui povoit appartenir, sans trois autres que ledit Guillaume de Houdetot avoit paiez. A quoy icelui Faulcon respondi qu'il avoit mieulx païé son escot que ledit Pepin; et icelui Pepin respondi que sauve sa grace; et après plusieurs paroles ledit Faulcon dist audit Pepin qu'il en avoit menti comme mauvais vilain. Et lors icelui Faulcon tira son espée toute nue, et ledit Pepin semblablement pour soy defendre, mais ils ne s'entreferirent point, pour ce que Robinet de Houdetot, ledit Guillaume de Houdetot, ledit du Forestel et autres estoient presens qui les departirent. Et tantost après, ledit Faulcon s'escouy et eschapa des dessusdis et tira de rechief son espée et poursuy ledit Pepin, qui faisoit brider son cheval pour s'en aler, et fery icelui Pepin un horion sur son espaule et un autre sur la temple, tant qu'il lui fist sang et plaie a grant effusion de sang, et tant qu'il en chey a terre et ledit Faulcon dessus en le voulant tuer de sa dague, se n'eussent esté lesdis de Houdetot et du Forestel qui l'osterent de dessus. Et incontinant ledit Faulcon monta sur son cheval pour s'en aler. Et ledit Pepin, veant l'oultrage et vilenie que lui avoit faicte icelui Faulcon, se fist tantost mediciner par un barbier, et après manda ledit Eliot de Houdetot, son compere, qu'il alast parler a lui ; ce que il fist. Et lors ledit Pepin remonstra audit Eliot, son compere, et audit Guillaume de Houdetot, lesquelz sont prouchains parens de la femme Pepin, la grande villenie et outrage que lui avoit fait ledit Faulcon, en leur priant qu'ilz lui vouldissent aidier a l'en vengier. A quoy ilz se accorderent. Et incontinent monterent a cheval et poursuivirent ledit Faulcon tant qu'ilz le actaignirent au bout de ladite ville de Granville en une petite ructe auprès d'une croix de bois. Et lors ledit Pepin et ledit Eliot sacherent leurs espées en escriant audit Faulcon qu'il se defendist ou qu'il estoit mort. Et après ce fait ledit Pepin cuida fraper icelui Faulcon de sadicte espée par le col, mais il faillit. Et alors ledit Pepin le prist par le corps et par ses draps, et le tira a terre de dessus son cheval, et puis de rechief le cuida fraper de son espée, mais il ne pot, pour ce que icelui Faulcon gecta la sienne au devant du horion, tant qu'il lui chey sur la main. Et adoncques icelui Eliot descendi de dessus son cheval et fery ledit Faulcon d'une espée sur l'espaule un horion et un autre sur la teste a sang et plaie et grant effusion de sang, tant ce que icelui Faulcon chey envers. Et lors ledit Eliot tourna son espée de plat et en frappa ledit Faulcon sur le front, en disant qu'il en avoit assez, et atant s'en departirent. Et ce fait, vesqui depuis icelui Faulcon quatre jours ou environ, qui d'iceulx horions ala tantost après de vie a trespassement... Si donnons en mandement par la teneur de ces presentes au bailli de Caux ... Donné a Calais, le xij e jour du mois de juing, l'an de grace mil CCCXXIII et le unziesme de nostre regne. Ainsi signé : Par le Roy, a la relacion de mons. le Gouvernant et regent de France, duc de Bedford. Brounyng.

CCXXIX. — Paris, 18 juillet 1433.

Rémission à Colin Descharpy, de La Forêt-Auvray, qui, enfermé dans les prisons de Falaise à cause de ses relations avec les brigands, s'en est évadé à deux reprises et y a été ramené une troisième fois par les Anglais. (JJ 175, n. 243, fol. 81 verso.)

Henry, etc., Savoir faisons, etc., nous avoir receu l'umble supplicacion de Colin Descharpy, povre simple homme aagié de .1. ans ou environ, demourant en la parroisse de la Forest en la viconté de Faloise, chargé de femme et de neuf petiz enfans, contenant comme il ait tousjours demouré en ceste obeissance en ladite parroisse, qui est lieu de boscage et pais de brigans, où souventes foiz iceulx brigans et autres noz ennemis frequentent et loing de bonne ville et forteresse. Et soubz umbre que les Anglois ou autres gens lui meissent assus et imposerent que il avoit conseillié, conforté ou favorisié lesdis brigans, ce que non a son povoir, mais bien est vray que ledit suppliant demourant en boscage, loing de bonne ville et forteresse, comme dit est, lui a aucunes foiz convenu consentir et malgré lui que lesdis brigans aient repeu, beu et mengié en son hostel, dont aucunes foiz quant il povoit s'enfuiroit mussier au bois et autrefois n'avoit pas loisir de s'enfuir et convenoit qu'il demourast avec lesdis brigans ; lesquelz par plusieurs foiz lui avoient fait paier rançons d'argent, chevaulx et autres choses qu'ilz povoient prendre sur lui, et lui convenoit ainsi

souffrir, voulsist ou non, pour ce qu'il ne savoit où aler pour lui vivre, sa femme et enfans sinon par son labour et de son heritage, assis audit lieu de la Forest ; ouquel, pour doubte qu'ilz ne le murdrissent, lui a convenu souffrir mainte peine et durté, tant pour doubte de mort come pour avoir sa povre vie et de sa femme et enfans; iceulx Anglois le menerent prisonnier en nos prisons a Faloise, esqueles il fu le temps et espace de six mois ou environ sans lui ouvrir voie de justice. Laquele prison durant, furent admenez et mis prisonniers avec ledit suppliant aucuns brigans, entre lesquelz avoit un larron qui estoit condampné a mort et un nommé Michiel Fauvel, lequel avec ledit larron condampné se descendirent par un trou des chambres aisiées desdictes prisons au fons et par ce trou eschaperent jusques au nombre de sept prisonniers, dont ledit suppliant fu l'un, qui oultre son gré se y consenti, et pour doubte qu'ilz ne le meissent a mort ; et lui yssu s'en ala en son hostel sans aler autre part et sans ce qu'il feust oncques aidant, confortant et favorisant ne en compagnie d'aucun brigant pour fere ne porter dommaige a personne quelconque en quelque maniere. Pour lequel cas il fu reprins et ramené esdictes prisons et obtint noz autres lettres de grace et remission, a lui octroïées ou mois de may l'an mil CCCCXXV, come par iceles ces choses et autres l'en dit plus a plain apparoir. Lesqueles lettres ainsi par lui obtenues furent presentées a nostre bailli de Caen et requis l'effect et enterinement d'iceles, et avoit sur ce a comparoir a un certain jour es assises de Faloise. Auquel jour il fu prins par aucuns Anglois et mené oultre la ville de Messy, a vij lieues ou environ de Faloise, oultre son gré et plaisir. Par quoy il n'avoit peu venir a temps ausdictes assises de Faloise et par ce fu mis en default et depuis remis es prisons audit lieu de Faloise, esqueles il fu par l'espace de long temps. Et pendant ladicte prison les geoliers d'icele lui distrent qu'il partist desdictes prisons et aidast a mettre en icele geole du bois qui estoit devant, et a lui en ce faisant vint certaine personne qui lui vint dire qu'il s'en alast. Lequel, considerant la durté de prison, se destourna et ala bouter en franchise en l'eglise de la Trinité de Faloise, près de ladicte geole, où il fu l'espace de viij ou ix jours, et après leva une verriere et y mist une corde, faignant par ilec s'en estre parti, ce que non, mais actendi bien un jour et s'en yssi de nuit et s'en ala a l'ostel des Cordeliers de Faloise, où il fu deux jours et s'en yssi environ midi d'icelui hostel, monta sur les murs de la ville de Faloise et print une corde pour mettre a un carnel de la muraille, qui fu trop courte pour venir jusques a terre, qui rompi, et il chey a terre tant qu'il fu en dangier de mort. Et s'en ala en sondit hostel en la Forest, ouquel il a esté longuement avec sa femme et enfans, et cependant a esté mis es appeaulx et mis en pluseurs defaultx, et depuis a esté reprins en sondit hostel en son lit par Anglois et autres gens et ramené es prisons dudit lieu de Faloise, esqueles il est encores de present prisonnier... Si donnons en mandement par ces mesmes presentes a nostre bailli de Caen... Donné à Paris, le xvij e jour de juillet, l'an de grace mil CCCC XXXIII et de nostre regne l'unziesme. Ainsi signé : Par le Roy, a la relacion du Conseil. Chembaut.